

O LE EKALEZIA A IESU KERISO O LE AU PAIA O ASO E GATA AI • SETEMA 2018

O Le Liahona



**O Olo o le Malosiaga:
Auauna Atu i Autafa o le
Perofeta ii. 12, 18**

O Le a le Uiga o le Faapea o le Ekalesia
Moni Lenei? i. 24

Mauaina o le Malosi i le Tala o le Olaga
o Lo'u Tuua, i. 36



“O NISI O AUUPEGA
AUPITO LELEI A SATANI O
LE LE MAGAFAGAFA I MEA
FAALAVEFAU, TAUFAASESE,
MA FAALEAGAGA... TUUFAATASI
LATOU TE AVEA MA
**LUITAU SILI O LO
TATOU TAIMI.**”

ELDER KEVIN W. PEARSON

Mai le, "Aua le Tuua le Faaola," itulau 44.



TALA FAAALIA

6 Mataupu Faavae mo le Auaunaga: Fefautuaai e uiga i o Latou Manaoga

12 Peresitene Dallin H. Oaks: Mulimuli i Ala a le Alii
Saunia e Elder David A. Bednar

18 Peresitene Henry B. Eyring: Maoae le Atamai, Lotomaulalo faapei o se Tamaitiiti
Saunia e Elder Jeffrey R. Holland

24 O Le Ekalesia Moni: "Mo le Faaatoatoaina o le Au Paia"
Saunia e Elder J. Devn Cornish
Atonu tatou te le vaaia le atoatoa i taitai ma tagata o le Ekalesia ua mavae, ae e mafai ona tatou mautinoa o aooaga faavae ua aoao mai e le Ekalesia—aoaoga faavae a Keriso—e atoatoa ia.

26 Au Paia: O Le Tala o le Ekalesia—Mataupu 7: Uso a Auauna
Sa saili e Iosefa ma Oliva le taitaiga ina ua la faitau e uiga i le papatisoga ao faia le faaliliuga. Sa saunia e le Alii ni tamalii e toatolu e ave ma molimau i papatusi auro.

36 O Le Mana o le Faatuatua ma Tala o Aiga
Saunia e Adam C. Olson
O le iloaina o mea sa tuu faasolo mai e ona tuua sa fesoasoani lea ia Rosalini e maua ai le faamoemoe i le taimi o ona lava tofotofoga.

FAITAUGA VAVE

4 O Ata o le Faatuatua: Libuletswe Gofrey Mokgatle—Gauteng, Aferika i Saute

10 I le Pulelaa: Ou te Manatu O Le A Ou Avea ma A'u Lava
Saunia e Jutta Baum Busche

34 O Lau Tusigamanatu o le Konafesi: Konafesi Aoao ia Aperila 2018

40 O Leo o Le Au Paia o Aso e Gata Ai

80 Seia Tatou Toe Feiloai: Taitaiina e Perofeta Soifua
Saunia e Elder Mark E. Petersen



I LE FAAVAA

O se *Maa faamanatu Mamalu*, saunia e Jolynn Forman. Na ta'ua i se taimi muamua sa fai mai Peresitene Polika Iaga (1801-77) o olo e tolu i le itu i sasae o le Malumalu i Sate Leki e faatusa i le Au Peresitene Sili ma le Perisitua Mekisateko (e pei ona lipotia mai e Viliamu Uarota, i le "Who Designed the Temple?" *Deseret Weekly*, Ape 23, 1892, 578). Ia faamasani i "olo" e lua o le Au Peresitene Sili o aso nei, o Peresitene Dallin H. Oaks ma Peresitene Henry B. Eyring, i itulau 12 ma le 18.



48

44 Aua le Tuua le Faaola

Saunia e Elder Kevin W. Pearson
E tatau ona faaauau pea ona faamalolosia a tatou molimau ina ia le tataiese a tatou.

48 Mauaina o Lo'u Tulaga Paia

Saunia e Daiane Korth da Silva
O le vaai a au lava e ala i mata o le lalolagi na ou le iloa ai lou lava taua.



Vaai pe mafai ona e mauaina le Liahona o loo natia i le lomiga lenei. Faaitete: E faapefea ona e manatua e alofa Iesu ia te oe?



52

50 Pe o Oe o se Uo e Saogalemu Ai?

Saunia e Marissa Widdison
E mafai ona tatou faaogaina ni auuala faatauvaa e faaali atu ai le alofa e fesoasoani ai i a tatou uo o loo feagai ma ni tauiviga.

52 Amapasa o le Faamoemoe: Galulue Faatasi e Puipui le Pule i le Ola

Saunia e Maryssa Dennis
Faamasani oe lava i faailoga o lapataiga ma auuala e puipui ai le pulse i le ola.

56 Leiloa i le Aai Faasaina

Saunia e Sarah Keenan
Mata o le a mafai ona ou toe maua tagata o lau vasega i lenei aai ese ma le pisi?

58 Faaaliga i le Perofeta o Iosefa Samita—ma ia te Oe

Saunia e Ryan Carr
E pei ona faaaliga e Iosefa Samita, e leai se matua faatulagaina mo le mauaina o faaaliga faaletagata lava ia.

60 O Le Taua mo Lou Faitalia

Saunia e David Dickson
O le latalata lava o le tatou mulimuli i le Faaola, o le atoatoa atili foi lena o le a tatou maua ai le saoloto lea e tuuina mai e le faitalia.

62 O La Tatou Avanoa

64 Pepa Lautele o loo I Ai se Savali: Faatuatua Moni la Keriso

65 Perofeta: O Se Faatusa o le Alofa o le Atua

Saunia e Elder Ulisses Soares



75

66 Faasusulu Atu Lou Malamalama: Tausia ma le Faasoa Atu

Ou te fiafia e fesoasoani i o'u matua e faasoa atu fua o a matou meatoto i isi.

68 Faatuatua, Faamoemoe, ma le Alofa Tunoa, Vaega 2: O Se Tatalo sa Taliina

Saunia e Megan Armknecht

70 Ua Molimau Aposetolo e uiga ia Keriso

Saunia e Elder Neil L. Andersen

71 Saogalemu mai le Afa

Saunia e Elder Joaquin E. Costa
Sa usitai Noa i le Alii mai lava i lona laitiiti, ma o lena mea sa saogalemu ai o ia i le taimi o faalavelave mulimuli ane.

72 O Le Kalapu Faitau o le Tusi a Mamona

74 Tatalo i Tua o le Tulaga

Saunia e Emily B.
E faafofoga mai le Tama Faalelagi i au tatalo e tusa lava po o fea ou te i ai.

75 E Le Afaina Lava Po o le A!

Saunia e Christian B.
Sa ou tau atu i lau uo e alofa Iesu Keriso ia te ia, e tusa lava po o le a le mea e tupu.

76 Tala i Tusitusiga Paia: Elia ma le Fafine ua Oti Lana Tane

Saunia e Kim Webb Reid

79 Itulau e Valivali: E Mafai Ona Ou Tautala i le Sa'o

SETEMA 2018 VOL. 42 NU. 9
O LE LIAHONA 14753 890

O Le Lomiga Faamaonia Faa-Samoa a le Ekalesia
a lesu Keriso o le Au Paia o Aso e Gata Ai

Susuga a le Au Peresitene Sili: Russell M. Nelson,
Dallin H. Oaks, Henry B. Eyring

O Le Korama a Aposetolo e Toasefululua:

M. Russell Ballard, Jeffrey R. Holland, Dieter F. Uchtdorf,
David A. Bednar, Quentin L. Cook, D. Todd Christofferson,
Neil L. Andersen, Ronald A. Rasband, Gary E. Stevenson,
Dale G. Renlund, Gerrit W. Gong, Ulisses Soares

Faatonu: Hugo E. Martinez

Faatonu Lagolago: Randall K. Bennett, Becky Craven

Fautua: Brian K. Ashton, LeGrand R. Curtis Jr., Edward
Dube, Sharon Eubank, Cristina B. Franco, Donald L.
Hallstrom, Douglas D. Holmes

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: Adam Olson

Pule Faatonutonu Lagolago: Ryan Carr

Lagolago o Lomiga: Francisca Olson

Au Tusiutusi ma Faatonutonu: Maryssa Dennis, David
Dickson, David A. Edwards, Matthew D. Flitton, Lori Fuller,
Garrett H. Garff, LaRene Porter Gaunt, Jon Ryan Jensen,
Charlotte Larcabal, Michael R. Morris, Eric B. Murdock,
Sally Johnson Odekirik, Joshua J. Perkey, Jan Pinborough,
Richard M. Romney, Mindy Selu, Chakell Wardleigh,
Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus,
Mandie Bentley, C. Kimball Bott, Thomas Child,
David Green, Colleen Hincley, Eric P. Johnsen,
Susan Lofgren, Scott M. Mooy, Emily Chieko Remington,
Mark W. Robison, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Ira Glen Adair, Julie Burdett, Thomas G. Cronin,
Bryan W. Gygi, Ginny J. Nilson, Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tufatufaga: Troy R. Barker

Mo le okaina o mekasini, alu i le store.lds.org po o le
faletusi Tutotonu i Pesega. Telefoni 64127. Totogi o le
Mekasini: \$0.55 (Samoa) i i le kopi. Totogi mo le Tausaga
Atoa \$6.60 (Samoa).

**Auina atu tusitusiga ma faafesili i luga o le
initoneti** i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le "tapasa"
po o se "faatonuuala") e lomia i le faa-Alepania, Aminia
(Sasae), Pisilama, Palekeria, Kemupotia, Sepuano, Saina,
Kalaotia, Siekisolovakia, Tenimaka, Take, Igilisi, Esitonia,
Fiti, Finelani, Farani, Siamani, Eleni, Hanikeri, Initu, Iselani,
Initonesia, Italia, Iapani, Kiripati, Korea, Lativia, Litunia,
Malakasa, Masela, Monokolia, Nouei, Polani, Potukale,
Romania, Rusia, Samoa, Saina (ua faafaigofieina), Silovenia,
Sipaniolo, Suetena, Swahili, Tagaloka, Tahiti, Tai, Toga,
lukureini, Urutu, ma Viatename. (E eseese lava gagana.)

© 2018 Puletaofia e le Intellectual Reserve, Inc. Ua taofia
aia tatau uma. Lomia i le Iunaitesetete o Amerika.

Faamatalaga o le Puletaofia: Vagana ua faailoa atu,
e mafai e tagata taitoatasi ona kopiina anomea mai le
Liahona mo lo latou faaaogaina patino, ma le saili tupe
(e aofia ai mo valaauga o le Ekalesia). O lenei aia tatau
e mafai ona faaleaogaina i soo se taimi. O anomea o
mea faitino e le mafai ona kopiina pe afai o loo faailoa
mai se faasa i le laina o loo i ai ma le faatufugaga.
O fesili mo le Puletaofia e tatau ona faatuatusi mai
i le Intellectual Property Office, 50 E., North Temple
St., FL 13, Salt Lake City, UT 84150, USA; email:
cor-intellectualproperty@ldschurch.org.

For Readers in the United States and Canada:
September 2018 Vol. 42 No. 9. O Le Liahona (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address label
from a recent issue; old and new address *must* be included.
Send USA and Canadian subscriptions to Salt Lake
Distribution Center at address below. Subscription help
line: 1-800-537-5971. Credit card orders (Visa, MasterCard,
American Express) may be taken by phone. (Canada Post
Information: Publication Agreement #40017431)

POSTMASTER: Send all UAA to CFS (see DMM 507.1.5.2).
NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Faaopoopoga i le Initoneti



Faitau tusiga ma auina atu la oe lava
tusiga i le liahona.lds.org



Sue savali musuia e mafai ona
faasoa atu (i le gagana Peretania,
Potukale, ma le Sipaniolo) i le
[facebook.com/liahona](https://www.facebook.com/liahona).



Auina mai finagalo faaalua i le
liahona@ldschurch.org



la lesitala i le store.lds.org
Po o le asiasi i se faletusi atu, fesili atu i
taitai o le uarota, pe valaau i le
1-800-537-5971 (I.S. ma Kanata).

AIKONA MAILE GETTY IMAGES

AUTU I LE LOMIGA LENEI

E tau mai e numera le itulau muamua o le tusiga.

Agaga Paia, 56, 58
Alofa, 75

Auauna atu, 6, 42, 66
Auaunaga, 6

Faaaliga, 26, 58, 80
Faamaoni, 79

Faatuatua, 24, 36, 44,
68, 76

Faaouaga, 50, 52, 63
Faigata, 4, 36, 42

Faitalia, 60
Fesoootaiga, 6

Iesu Keriso, 44, 60, 65,
70, 75

Iosefa Samita, 26, 58
Molimau, 44, 62

Papatisoga, 26
Perisitua, 26

Perofeta, 12, 18, 26,
76, 80

**Puipuiga mai le pule i le
ola,** 50, 52

**Sauniuniga mo faalave-
lave faafuasei,** 42

Taitai o le Ekalesia, 12, 18
Talafaasolopito o aiga, 36

**Talafaasolopito o le
Ekalesia,** 24, 26, 58

Tama Faalelagi, 43
Tatalo, 56, 63, 68, 74

Taua o le tagata lava ia,
10, 43, 48, 75

Tulaga faatinā, 40
Tusi a Mamona, 4, 26, 72

Upu o le Poto, 41
Usiuitai, 60, 71

O ATATOSI O LE FAATUATUA

Sa tauaso Libuletswe ina ua 21 ona tausaga. Sa ia toe aoaoina le tele o mea, ae na te lei aoaoina le gagana Patupatu. Sa fia faitau o ia i tusitusiga paia, o lea sa tatalo ai i le Atua mo se fesoasoani.

CODY BELL, TAGATA PUEATA

Libuletswe Gofrey Mokgatle

Gauteng, Aferika i Sautē

I le taimi o se asiasiga faaleaiga, sa ou fai atu ai i se tuafafine sa ma asia, “E le mafai ona ou faitauina tusitusiga paia ona e le mafai ona ou pupula. Ou te fia alu i se aoga ina ia mafai ona ou aoao ai e faitau ma tusitusi i le gagana Patupatu.”

Sa faigaluega lona tuagane i se aoga mo tagata tauaso. Sa fesoasoani o ia ia te au i lau talosaga. O aso uma lava sa ou aoao ai i le gagana Patupatu. Sa oo foi ina ou ala i po e faataitai le faitau i le gagana Patupatu. Sa nao le fa masina ae mafai ona ou faitau ai.


Sa uma lau aoga ma ou fai atu i lou peresitene o le paranesi, ua mafai nei ona ou faitau i le gagana Patupatu. Sa ia tuuina mai ia te au se atigipusa sa i ai se tusi lesona mo le au perisitua ma tusitusiga paia uma i le gagana Patupatu. Ou te lei iloaina lava e i ai na mea i le Ekalesia. O le taimi lena na amata ai ona ou matuai malamalama ma fialia i le talalelei.

Ou te iloa e moni tusitusiga paia. Ou te aoao mai ai i taimi uma ou te faitauina ai. E i ai lava i taimi uma se mea ou te maua mai ai.

SAILI NISI MEA

Aoao e uiga i punaoa a le Ekalesia mo [tagata] e i ai manaoga faapitoa i le lds.org/go/9184.

E mafai ona e maua isi Atatosi o le Faatuatua i le lds.org/go/18.





Mataupu Faavae mo le Auaunaga

FEFAUTUAAI ATU E UIGA I O LATOU MANAOGA

E te le tau faia nao oe lenei mea. O le fefautuaai e mafai ona tuuina atu ai le fesoasoani e te manaomia e fesoasoani ai i isi.

Ua valaaulia oe e le Atua e te auauna atu i se tagata e toatasi po o se aiga i lau uarota po o le paranesi e tusa ai ma o latou manaoga. Ae e faapefea ona e iloa po o a na manaoga? O le mataupu faavae o le fefautuaai, lea ua avea ma taulaiga i le Ekalesia, e taua lea.

A uma ona talanoaina autu atonu tatou te mafaufau e fefautuaai ai, o le a tatou talatalanoa:

1. Fefautuaai ma le Tama Faalelagi.
2. Fefautuaai ma le tagata ma le aiga ua atofaina atu.
3. Fefautuaai ma a tatou soa.
4. Ma le fefautuaai ma isi na tofia atu i le tagata po o le aiga lava lea e tasi.

E taua tele foi le fefautuaai ma o tatou taitai. O se tusiga i le lumanai o Mataupu Faavae o le Auaunaga i le *Liahona* o le a suesue ai fefautuaaiga ma taitai faapea foi ma le matafaioi o faatalatalanoaga e uiga i auaunaga i lena faagasologa.

O Mataupu Tatou te Fefautuaai e uiga i ai

O le malamalama i manaoga e taua tele i le auaunaga i le tasi ma le isi. Ae o a ituaiga mea e mafai ona i ai na manaoga, ma e i ai nisi mea nai lo o manaoga e tatau ona tatou sailia?

O manaoga e tele ituaiga mea e mafai ona oo mai ai. Atonu o feagai i latou o loo tatou auauna atu i ai ma luitau e faalelagona, faaletupe, faaletino, faaleaoaoga, ma isi mea faapena. O nisi o manaoga e sili atu ona maualuga le faamuamua e tatau ona ave i ai nai lo o isi. O nisi o le a tatou saunia e fesoasoani atu i ai; o isi e ono manaomia ai ona tatou ofo atu i tatou lava e fesoasoani i ai. I a tatou taumafaiga e fesoasoani e taulima ia manaoga faaletino, aua nei galo o lo tatou valaauga e auauna atu e aofia ai le fesoasoani i isi ia agai i luma i le ala o le [osia ma tausia] feagaiga, saunia mo ma le mauaina o sauniga o le perisitua e taua mo le faaolataga.

E faaopoopo atu i le fefautuaaiga e uiga i manaoga o se tagata po o se aiga, e tatau ona tatou saili ia iloa o latou malosiaga. O a mea latou te le manaomia ai le fesoasoani? O a ni o latou tomai ma meaalofa o i ai e mafai ona faamanuiaina ai isi? E faapefea ona fetau lelei i le fesoasoani e fausia le malo o le Atua? O malosiaga o se tagata atonu e taua le malamalama i ai e pei foi o ona manaoga.

1 Fefautuaai ma le Tama Faalelagi

O se tasi o talitonuga autu o le tatou faatuatuga o le, e fetalai mai le Tama Faalelagi i Ana fanau (tagai Mataupu Faavae o le Faatuatua 1:9). A tatou maua se tofiga fou e auauna atu i se tasi, e tatau ona tatou fefautuaai ma le Tama Faalelagi i le tatalo, saili faaaliga ma le malamalamaaga i o latou manaoga ma malosiaga. O lena taulumaga o le fefautuaai e ala i le tatalo e tatau ona faaauau lava i le taimi atoa o le tatou tofiga e auauna atu.



Otusiga “O Mataupu Faavae o le Auaunaga” ua faamoe-moeina e fesoasoani ia i tatou e aoao e fetausia’i ai le tasi ma le isi—ae le o le faasoaina atu o ni savali i taimi o asiasiga. A o tatou iloina i latou tatou te auauna atu i ai, o le a unaia i tatou e le Agaga Paia ia iloa po o le a le savali latou te ono manaomiaina e faopoopo atu i la tatou tausiga ma le agaalofoa.

2 Fefautuaai ma Tagata Taitoatasi ma Aiga

O auala ma taimi e faalatalata atu ai i tagata taitoatasi ma aiga ua valaauina i tatou e auauna atu i ai e eseese lava e faalagolago lea i tulaga, ae o le fefautuaai tonu ma le tagata po o le aiga e taua lea mo le fausia o sootaga ma malamalama ai i o latou manaoga, e aofia ai auala latou te mananao e fesoasoani atu ai. O nisi fesili e ono tataua ona faatali seia oo ina atinaeina se mafutaga anoa. E ui e leai se auala sao e tasi e fai ai lena mea, mafaufau i mea nei:

- Saili pe faapefea ma o afea latou te mananao e faafesootai atu ai i latou.
- Aoao e uiga i mea latou te fiafia i ai ma siosiomaga e o mai ai.
- O mai ma ni fautuaga mo auala e mafai ona e fesoasoani atu ai, ma fesili atu mo ni a latou fautuaga.

A o tatou atinaeina le talitonuina, mafaufau e talanoa i manaoga o le tagata po o le aiga. Fai atu fesili pe a uunaia ai e le Agaga Paia.¹ Mo se faaitaiga:

- O a ni luitau o feagai ma i latou?
- O a ni sini a le latou aiga po o le tagata? Mo se faaitaiga, pe latou te mananao ia lelei i le faia e le aunoa o afiafi faaleaiga, po o le ia faateleina le ola tutoatasi?
- E mafai faapefea ona tatou fesoasoani ia i latou ma a latou sini ma luitau?
- O a ni sauniga o le talalelei o loo loma i o latou olaga. E faapefea ona tatou fesoasoani ia i latou ina ia saunia?

Manatua e ofo atu le fesoasoani fitoitonu e pei o le, “O le a se mea, po o le a mafai ona matou aumaia ai se meatausami mo outou i le vaiaso lenei?” O se ofo e le manino e pei o le, “Tau mai pe afai e i ai se mea e mafai ona matou faia,” e le aoga tele.



3 Fefautuaai ma a Tatou Soa

Ona atonu e le o taimi uma o le a oulua faatasi ai ma lau soa i le taimi e te lua fegalegaleai ai ma le tagata po o le aiga, e taua le faamaopopopo ma fefautuaai faatasi a o e saili mo musumusuga i le aveai o se soa. O nisi nei o fesili e mafaufau i ai:

- E faapefea ma o le a faafia ona oulua talanoa ma le tasi ma le isi i le aveai o se soa?
- E mafai faapefea e oulua taitoatasi ona faa-aoga lua malosiaga taitoatasi e auauna atu ai i manaoga o le aiga po o le tagata.
- O a ni mea ua e aoaoina, o a ni aafiaga ua e oo i ai, ma o a ni uunaiga ua e maua talu mai le taimi mulimuli na e talanoa atu ai e uiga i le tagata po o le aiga?

4 Fefautuaai faatasi ma Isi ua Atofaina

Atonu e lelei mai lea taimi i lea taimi le talanoa i isi o e ua atofaina e auauna atu i le tagata po o le aiga lava lena e tasi ua atofa i ai oe.

Talanoa e Foia ai Luitau

Ua faaoga e Elder Chi Hong (Sam) Wong o le Au Fitugafulu se tala mai le Mareko 2 i o tatou aso e faamatala ai le auala na mafai ai e le fefautuaai faatasi o ni tagata e toafa ona fuafua le auala e mafai ai e se alii sa ma'i i le supa, ina ia i ai i le nofoaga sa i ai Iesu.

Fai mai Elder Wong, “Atonu e tai faapenei.” “E toafa tagata sa faataunuina se tofiga mai le latou epikopo e o e asiasi, i se fale, o se alii sa maua i le ma'i o le supa. . . . I se fonu a le uarota lata mai nei, ina ua uma ona fefautuaai faatasi e uiga i manaoga i totonu o le uarota, sa tuuina atu e le epikopo ni tofiga 'laveai'. Sa tofia nei tagata e toafa e fesoasoani i lenei alii. . . .

“[Ina ua latou taunuu atu i le maota lea sa i ai Iesu,] ua tumu saisai tele le potu. Sa le mafai ona latou ofi mai i le faitotoa. Ou te mautinoa sa latou taumafai mea uma na mafai ona latou mafaufau i ai, ae sa le mafai lava ona ofi atu i totonu. . . . Sa latou fefautuaai faatasi i le isi mea e fai—pe faapefea ona latou aumaia le tagata ia Iesu Keriso mo le faamalologa. . . . Sa latou faia se fuafuaga—e lei faigofie, ae sa latou faataunuina.

“. . . 'Ona latou tatala lea o le ufi o le fale sa i ai o ia: ua faasosofa i ai, ona latou tuutuu ifo ai lea o le moega o taoto ai le supa' (Mareko 2:4). . . .

“. . . 'Ua silafia e Iesu lo latou faatuatua, ona fetalai atu lea o ia i le supa, Lo'u atalii e, ua faamagaloina au agasala' (Mareko 2:5).”²



O le fausia o mafutaga o se vaega taua foi o le fefautuaai faatasi. Tagai foi i le tusiga Mataupu Faavae o le Auaunaga “Fausia o Sootaga Anoa,” i le lomiga o Aokuso 2018 o le *Liahona*, i le itulau e 6.

Valaaulia e Faatino

Na faamalosi mai Elder Dieter F. Uchtdorf o le Korama a Aposetolo e Toasefululua e faapea, “Ia fefautuaai faatasi, faaoga uma punaoa o loo maua, saili atu i musumusuga a le Agaga Paia, ole atu i le Alii mo Lana faamautinoaga, ona afe lea i luga o lima o lou ofu, ma alu e galue.

“Ou te tuu atu ia te outou se folafolaga: afai tou te mulimuli i lenei mamanu, o le a outou mauaina taitaiga patino e faatatau i le *o ai, o le a, o afea*, ma *pe o fea* e faia ai i le ala a le Alii.”³ ■

FAAMATALAGA

1. Tagai *Tala'i La'u Talalelei: O Se Taiala mo le Galuega Faafaipeautalai* (2004), 183.
2. Chi Hong (Sam) Wong, “Laveai i le Lotogatasi,” *Liahona*, Nov. 2014, 14–15.
3. Dieter F. Uchtdorf, “O Le Faia i le Ala a le Alii,” *Liahona*, Nov. 2011, 55.

OU TE MANATU O LE A OU PEI O A'U LAVA

Saunia e Jutta Baum Busche

O lenei faasologa ua faamamafaina ai olaga o tamaitai tuuto ma a latou savali, na sii mai le tusi *I le Pulelaa: 185 Tausaga o Aoaoga o Saunia e Tamaitai o le Au Paia o Aso e Gata Ai* (2017).

Ou te manatua lelei lava ia fetuutuunaiga sa ma faia ina ua ma o atu e nonofo i Iuta. O lo'u vala-auga muamua lava i le matou uarota o le auuana atu lea o se faiaoga i le Aualofa. Sa ou mataituina ma le toto'a ia isi faiaoga ma sa matuai faagaetia a'u i a latou taumafaiga mo le atoatoa i a latou aoaoga. E oo lava i le faiga o o latou lauao ma laei na matuai mama ma lelei, sa faaalii ai lo latou taumafai mo le atoatoa. Sa ou faamemelo i le alu lelei ma le manino o le latou [tautatala] i le gagana Peretania. E mafai faapefea e a'u, ma la'u Igilisi le lelei, ona tauva ma i latou ma avea ma o latou faiaoga? Sa ou naunau e aoao ma sa ou fiafia lava ina ua ou faalogo sa i ai se vasega sauniuni a le siteki mo faiaoga o le Aualofa.

Ina ua ou auai i le fonotaga faamasani mo le taimi muamua lava, sa faatumulia au i ni faamoemoega maualuluga. Ou te lei saunia mo le fesili sa fesiligia ai au e uiga i le po o le a le ituaiga o teuga o le laulau o le a ou faaogaina pe a fai la'u lesona. Sa matuai ou lagona le leai o sou faamoemoe! Sa ou le iloaina po o le a le mea e tau o le teuga i le ogatotonu po o le a lona faamoemoega e i ai i le tuuina atu o se lesona. Sa amata e lagona le lelei e uiga ia te a'u lava ona faavaivaia ai lo'u lototele. . . .

Sa faaauu pea ona ou lagona le faatauva a o ou vaavaai atu i uso i lau uarota ma vaaia i latou o totoina ni faatoaga ma tuuapa ia fua o faatoaga. Sa latou faamalositino i aso uma e ala i le tamoemoe. Sa latou suisui ma fai faatauga i aitema e pau tau. . . . Sa latou aveina atu taumafataga o le afiafi i tina fou ma e mamai i o latou pito-nuu. Sa latou tausia se matua matua, o nisi taimi e toalua. . . . Sa latou faamamoni i le faiga o galuega o le malumalu, ma sa latou popole i le tusitusi soo ia latou apitalaaga.

O le lofituina ai i faataitaiga o le atoatoa na siomia atoa ai au, sa faateleina ai au taumafaiga ia pei o ou uso, ma sa ou lagona le ita ia te au lava faapea foi ma le tausalaina pe a ou le tamo'e i taeao uma, tao a'u lava falaoa, su'i o'u lava lavalava, pe alu i le iunivesite. Sa ou lagonaina e tatau ona ou pei o tamaitai ia sa ou nofo faatasi ai, ma sa ou lagonaina sa ou toilalo ona sa le mafai ona faigofie ona faamasani au lava i sitaile o o latou olaga.

Semanu na aoga ia te au i le taimi lea ia le tala e uiga i se tamaitiiti e ono tausaga le matua, o le, ina ua fesili i ai se tasi o lona aiga, "O le a se mea e te fia avea ai?" sa tali atu, "Ou te manatu o le a ou pei o au lava. Sa ou taumafai lava ia pei o se isi tagata. Sa ou toilalo i taimi uma lava!" E pei o



E UIGA IA SISTER BUSCHE

O Jutta Baum (f. 1935) sa ola ae i Dortmund, Siamani. Sa faaipoipo o ia ia Enzo Busche i le 1955, ma sa papatisoina i laua i le aso 19 o Ianuari, 1958, i se vaitaele mo tagata lautele i Dortmund.

Ia Oketopa 1977, sa la auai ai i se konafesi i Berlin ina ia mafai e Enzo, o se sui lisone a le Ekalesia, ona faaliliu mo Peresitene Spencer W. Kimball (1895–1985). I le maea ai o le konafesi, sa saunoa faalilolilo atu ai Peresitene Kimball ia Enzo ma valaauina o ia e auuana atu i le Korama Muamua a le Au Fitugafulu—o se tofiga tumau o le a manaomia ai ona siitia le au Busches.

O le la tofiga muamua lava sa faia i Munich, Siamani, lea sa taitai ai Enzo i le misiona mo le lua tausaga; ona la siitia atu ai lea i luta i le 1980. Sa tele lava ina femalagaai i laua, e asiasi i tagata o le Ekalesia i le lalolagi atoa, ma sa saunoa atu Jutta i konafesi faalisone faatasi ma lana tane.

Faatasi ai ma le faapaiaga o le Malumalu o Frankfurt Siamani i le 1987, sa avea ai i laua ma peresitene ma le faatina. Sa lei avea muamua lava ia Sister Busche ma se tagata faigaluega o le malumalu, o lea sa fautuaina ai o ia e Peresitene Gordon B. Hinckley (1910–2008) i se semina o aoaoga faamasani, "O le mea aupito taua lava o le i ai lea o le alofa ma le alofa ma le alofa." Sa ia teufatuina lana fautuaga. Sa ia talosagaina le au faigaluega o le malumalu ia avea ma mea ia sili ona faamuamua le fesoasoani i tagata ulu ia lagona le Agaga o le Atua.

O se vaega leni o le lauga na tuuina atu e Sister Busche i le Konafesi a Tamaitai i le Iunivesite o Polika Iaga i le 1989.

lenei tamaitiiti, ina ua mavae le toilalo faafia ina ia pei o se isi tagata, sa iu ina ou aoaoina e tatau ona ou pei o au lava. Peitai, o lona mea e masani ona le faigofie, ona o o tatou manao ia ofi ai, ia tauva ma faamalie, pe tau lava o le ia faamaonia, e taitai atu ai i tatou e faataitai i isi ma le faatauaina ai o tatou lava siosiomaga, a tatou lava taleni, ma o tatou lava avega ma luitau. . . . Sa tatau ona ou aoao e faatolalo lou lagona o le popole e faapea, afai ou te le mulimuli i ai, o lona uiga e lei lava lo'u lelei.

. . . Pe a ou taumafai e kopi i ou uso maoae pe a ou aoaoina lau vasega ma se teuga ogatotonu faapitoa ma isi metotia faafaiaoga sa ou le masani ai, sa ou toilalo ona e talanoa mai lava le Agaga ia te au i le faaSiamani, ae le o le faaPeretania. Ae pe a ou alu ifo i ou tulivae e ole atu mo le fesoasoani, sa ou aoao ai e faalagolago i le Agaga e taiala au, na saogalemu i le malamalama o au o se afafine o le Atua. Sa tatau ona ou aoao ma *talitonu* sa le manaomia ona ou faatauva i isi ia alofaina ma

taliaina ai e lou Tama Faalelagi.

. . . O a tatou taumafaiga e le tatau ona faapea ia *faafiafia* pe ia *faataitai* ae ia *suia* e le Agaga. . . .

O le tele o avega e noatia ai i tatou i le lalolagi. O le faamaoni moni e faasaoloto ai i tatou e iloa le finagalo o le Atua mo o tatou olaga. . . .

. . . E ui atonu tatou te aofia atoatoa i le faafetauia o o tatou luitau i aso uma ma avanoa mo le tuputupu ae, e le mafai ona tatou ola i le aso e tasi po o le minute tasi e aunoa ma le nofouta i le mana o loo i totonu o i tatou. ■





Saunia e Elder David A. Bednar

O Le Korama a Aposetolo e Toasefululua

PERESITENE DALLIN H. OAKS: Mulimuli i Ala a le Alii

Pe a silafia e Peresitene Oaks le mea e finagalo le Alii na te faia—na te faia.

I na ua uma ona valaauina e auauna atu o se uso o le Korama a Aposetolo e Toasefululua ia Aperila o le 1984, sa manatunatu loloto Elder Dallin H. Oaks i lana matafaioi fou ma suiga e le maalofia o le a tupu i lona olaga.

E le o se taimi muamua lea na talosaga ai Elder Oaks e tuua lana “upega” patino ma faalegaluega (tagai i le Mataio 4:18–20). I le 1970 na ia faamavae mai ai i lana galuega faafaiaaoga i le Aoga Faale-tulafono a le Iunivesite a Sikako i le tali atu i le valaaulia mai taitai o le Ekalesia ia avea ma peresitene o le Iunivesite o Polika Iaga i Provo, Iuta, ISA. Na fiafia tele o ia e aoao atu, faatautaia sailiiliga, ma fegalegaleai ma tagata aooga faaletulafono i Sikako. Ae na ia tali atu ma le faatuatua i le talosaga e auauna atu o se peresitene lona valu o le BYU.

Na feagai Elder Oaks ma se tulaga talitutusa i le 1984 i le mavae ai o lona valaauga i le Toasefululua, ao ia toe tuua foi se tofiga ma galuega na te fiafia i ai o se faamasino sili i faamasinoga i le setete o Iuta. Peitai, na ese le suiga lea.

I le 1970, atonu na mafaufau ma le talafeagai Elder Oaks o le a ia toe foi i lena galuega faaletulafono pe a maea lana tautua i le BYU, lea na iu lava na ia faia. Peitai o le valaauga i le 1984 sa tulaga ese lava—ao se tautinoga faapaiaina o lona agaga

atoa ma lona soifuaga atoa i le Alii. O le taua e faavavau ma le tulaga i le lalolagi atoa o ona tiutetauave fou na matuai lofituina lava.

Sa faamatala e Elder Oaks ona mafaufauga loloto e uiga i lenei suiga taua:

“I lenei vaitaimi o le sailiili ai, mafaufau i le auala o le a ou faaaluina ai le vaega o totoe o lou olaga, sa ou fesili ia te a’u lava pe o le a le ituaiga o aposetolo o le a ou avea ai. Pe o le a ou avea ma se loia ua valaauia e avea o se aposetolo, pe o le a ou avea ma se aposetolo o le

na avea ma se loia? Na ou faaiuina o le tali i lenei fesili e fuafua lava pe o le a ou taumafai e mamanu lo’u valaauga i o’u lava agavaa ma aafiaga patino, pe o le a ou faia le faagasologa tiga o le taumafai e mamanu au lava i lo’u valaauga.





E tele meaalofa ua manino mai i le soifuaga ma le galuega a Peresitene Dallin H. Oaks.

Faatuatua i le Faola

Ua faamanuiaina Peresitene Oaks i le meaalofa faaleagaga o le iloa e ala i le mana o le Agaga Paia o Iesu Keriso o le Alo o le Atua (tagai MF&F 46:13–14). Na aoa atu le aoaoga faavae o le Faaola ma le manino ma molimau atu e uiga ia te Ia ma le talitonuga mau-maututu. O le Alii o lona malamalama lea i soo se vaega o lona olaga. Pe a silafia e Dallin H. Oaks le mea e finagalo le Alii na te faia—na te faia.

E ala i ana aoaoga i le silia ma le tele o tausaga, ua fesoasoani Peresitene Oaks i tagata o le Ekalesia ina ia malamalama

“Pe a o le a ou taumafai e faatino lo’u valaauga i ala o le lalolagi, pe o le a ou taumafai e fuafua ma mulimuli i ala a le Alii?

“Na tonu ia te a’u o le a ou taumafai e suia a’u lava e fetau i lo’u valaauga, o le a taumafai e fua i agavaa ma tulaga faaleagaga o se aposetolo. O se luitau lena mo le olaga atoa.”¹

O le alofa tunoa paia o le Alii, o aafiaga o le olaga, o se aiga lagolagosua, ma uiga auau mama ma le amio pulea o le tagata lava ia na atiina ae e ala i le suesue ma le aoaoina ma le maelega, galue malosi, ma le auunaga alofa ua mafai ai e Peresitene Oaks ona “mulimuli i ala a le Alii” ma avea moni ma se Aposetolo lototoa lea na avea ma se loaia.

O le ulumatua o le fanau e toatolu, o Dallin (agavale mamao) sa na o le fitu tausaga ae maliu lona tama. A’o tuputupu a’e, sa ia aveina ni lesona vaiolini mo na’o ni nai masina ae sa ia fesoasoani i lona tina ua maliu lana tane mo le tele o tausaga.

atili atoatoa i le faamoemoega ma le taua o le fuafuaga o le faaolataga a le Tama, le Togiola a le Faaola, pule ma ki o le perisitua, le sauniga paia o le faamanatuga, le faagasologa o le na ona “faia” ae ia “avea ai,” o eseese i o tatou olaga i le lelei, lelei tele, ma le lelei silisili, ma le tele o isi mataupu faavae o le talalelei. O lana auala faigofie ma le faatulagaina lelei i le aoaoina o le talalelei ua faamalositia ai le faatuatua o le Au Paia o Aso e Gata Ai i le salafa o le lalolagi.

Amio Sa’o

O Peresitene Oaks o se tamalii o le amio-sa’o. O ona talitonuga ma amio ua faavae i



mataupu faavae o le talalelei, ma e soifua o ia i mea ua ia talitonu i ai. O le faanatinati e lei avea lava ma se filifiliga mo ia ona na te naunau e faia le mea sa’o, e tusa lava pe o se faatinoga e le tauleleia ai lona tulaga po o vaaiga faaletagata. E leai ni auala pupuu i lona olaga—fai mea e sa’o po o le leai lava.

O lana amiosa’o ua atagia mai i lona nau-nautaiga e taulima ia faafitauli ma tofiga fai-gata. Ma e na te faia i se auala poto—le ala a le Alii. Sa ia aoao sa’o atu e uiga i autu e pei o le puipuia o tu masani faaleaiga, taulima-ina o taufaamatau i le saolotoga o tapuaiga, puipuia o fanau mai agasalala manatu faapito a tagata matutua, ma le tausala ina o mea leaga o ponokalafi.

Agamalu

O meatotino ma tomai faapitoa na ausia e Peresitene Oaks e tulaga ese i soo se tulaga. Ae ui i lea na faaalua e Peresitene Oaks le agamalu ma le nau-nautaiga ia aoaoina uma mai le Agaga Paia ma mai tagata e eseese uma talaaga ma aafiaga.

I se tasi o a tatou sauniga a le korama, sa faaalua ai e Peresitene Oaks se manatu malosi e uiga i le ala e faatino ai lea na ia talitonu e

O Peresitene Oaks ma lona faletua ua maliu, o June, o toafa le la fanau teine ma tama e toalua (na fanau le uii ina ua uma ona pueina le ata lenei).

Sa faigaluega Dallin Oaks o se faasalalau i le leitio ma se inisinia ma feiloai ai ia June ao faasalalauina taaloga pasiketipolo a aoga maualuga o se tagata tausaga muamua i le kolisi. Sa la faaipoipo i le 1952.

tatau ona tuliloaina. O mafuaaga na ia faaalua na faatosina, ma o lona malamalama e uiga i le mataupu e lautele. Na malosi ana finauga e faatatau i le faatinoga.

Ao matou fefautuuai faatasi, na faaalua e se tasi o le Toasefululua e itiito ifo lona sinia le maliega i le ala autu o le faatinoga ae na faailoa mai se faalotolotolua e uiga i le taimi ua tuupoina. Na mafai lava e Elder Oaks ona finauina le popole ma se tali e pei o le “Ou te talitonu ua sili atu lo’u poto masani i lenei mataupu nai lo oe.” Ae na te le’i faia. E aunoa ma se faailoga o le tetee po o le ita, sa fesili atu Elder Oaks i lona uso o le korama, “E mafai faamolemole



ona e fesoasoani e faamalalama mai ia te a’u lou faalotolotolua e uiga i le taimi?”

Ina ua mavae ona faalogologo ma le totoia i lona uso aposetolo, na mafau-fau loloto Elder Oaks mo sina taimi ona fai atu lea, “O le manatu na e faaalua e taua. Ou te lei mafau-fauina atoatoa ia aafiaga o lenei taimi o lenei faatinoga i le ala na e faia ai, ma ua ou talitonu ua tatau ona toe galueina le talosaga i mea ua tatou aoaoina i lenei talanoaga.”

Na faalogo ma aoao mai Elder Oaks mai lona uso a korama ona savali lea i le agamalu o le Agaga a le Alii (tagai MF&F 19:23) e

faataunuu ia faamoemoega e manaomia. Mo Dallin H. Oaks, o le mataupu e le faatatau lava i le mea na e manao i ai; ae e faatatau lava i le finagalo o le Alii ma e faatatau i le mulimuli i Ona ala.

Iloatino

Ua faamanuiaina foi Peresitene Oaks i le meaalofa faaleagaga o le iloatino ma le gafatia e iloa ai ia taunuuga uumi o talosaga, filifiliga, ma faatinoga. Ua faalia lenei gafatia i se fesili e masani ona ia fesiligia ai o ia lava faapea ma isi: “O fea e taitai atu i ai?”² E le mafai lava ona talanoa pe fautua se tagata i se fonotaga ma Peresitene Oaks ae le iloina i le taimi lava lena le auala ua faamanuiaina ai e lenei gafatia le lemafaitaulia o tagata ma aiga ma le Ekalesia ato a i le taimi o lona soifua ato a o le auaunaga i le Alii.



I se po o le taumafanafana i le 1970, sa feagai ai Peresitene Oaks ma se tulaga tau-faafefe ma se tagata faomea i le Itu i Saute o Sikako ao ia toe foi atu i lana taavale o loo paka. O lona faletua, o June, sa faatalitali mo ia i totonu o le taavale.

“Aumai ia te a’u au tupe,” na faatonuina ai e le gaoi.

“E leai ni a’u tupe,” o le tali atu lea a Brother Oaks, o faaali atu ia te ia lana atopue gaogao.

“Aumai ki o lau taavale,” na ia faatonuina. O ki o loo loka i totonu o le taavale ma Sister Oaks. “Fai atu ia te ia e tatala le taavale,” na uunaia ai e le gaoi. Sa fai atu Brother Oaks leai.

Sa faafefe o ia e le gaoi. “Fai, po o le a ou fasiotia oe.”

Sa fai atu ma le mausali Brother Oaks, “Ou te le faia.”

Ao toe fai atu e le gaoi ona manaoga ma taufaamatau, sa vaai e Brother Oaks se avanoa e fao ai le fana mai le alii talavou. E pei ona faamatalaina e Peresitene Oaks i se saunoaga o le konafesi aoao i le 1992, “O le taimi lava o le a ou faia ai la’u gaoioga, sa ou maua se aafiaga uiga ese. Ou te lei vaai i se mea pe faalogo i se mea, ae na ou *iloina* se mea. Na ou iloa le mea o le a tupu pe afai ou te aapa atu i lena fana. O le a ma tauivi, ma o le a ou faliu atu lena fana i le fatafata o lena alii talavou. O le a pa, ma o le a ia oti ai. Sa ou iloina foi e le tatau ona i ai le toto o lena alii talavou i lo’u mafaufau mo lo’u olaga atoa.”³

O lenei faaaliga faavavega o le meaalofa o le iloatino na mafai ai e Peresitene Oaks ona foia le finauga ma mulimuli ane faasoina lona lava ola ma le ola o le gaoi talavou.

Talu ai nei lava, i se fonotaga a le Aufono Faatonu a Faifeautalai, lea na taitaia e Elder



1932: Sa soifua mai i Provo, luta, ISA

1949: Auai atu i le Utah National Guard, tasi le tausaga ae le’i oo i le Taua a Korea

1952: Sa faaiipoipo atu ia June Dixon i le Malumalu o Sate Leki

1954: Faaui mai le Lunivesite o Polika laga ma se faailoga i le suetusi

1957: Faaui mai le Lunivesite o le Aoga Loia a Sikako

1957–58: Auauna atu o se failautusi mo le U.S. Supreme Court Chief Justice Earl Warren

1958–61: Avea ma loia i Sikako Illinois, ISA

1961–70: Faiaoga i mea tau tulafono i le Lunivesite o le Aoga Loia a Sikako

1971–80: Auauna atu o se peresitene i le Lunivesite o Polika laga

1980–84: Auauna atu o se faamasino i le Utah Supreme Court

1984: Valaauina i le Korama a Aposetolo e Toasefululua

1998: Malii June Dixon Oaks, tina o le la fanau e toaono

2000: Faaipoipo atu ia Kristen M. McMMain i le Malumalu o Sate Leki

2002–04: Auauna atu o se Peresitene o le Eria i Filipaina

2018: Valaauina o se Fesoasoani Muamua i le Au Peresitene Sili

Oaks i le taimi, sa matou fefautuagai faatasi ai e uiga i se talosaga e faatatau i faifeautalai o loo auuuna atu i se eria faapitoa o le lalolagi. Ina ua uma ona faaalua e sui uma o le aufono o latou manatu i le mataupu, sa tuu atu e Elder Oaks ni fesili ma aoteleina mea sa aoaoina. Ona ia fai mai lea, “Ou te lagona tatou te le o tasi i lena mataupu. E tatau ona tatou faatali i le Alii aua nei faia se faaiuga faaiu i le taimi nei.”

O mea na tutupu i nai masina mulimuli na matuai faamamafa mai ai lava le uunaiga lea na i ai i lena faaiuga e faatali. O le aufono, i le galue ai i lalo o le taitaiga musuia a Elder Oaks, sa faamanuiaina e faia se faaiuga sa’o, i le taimi sa’o, ma i le ala a le Alii e puipui ia faifeautalai ma ia manuia le galuega.

Aga Malie ma le Agalelei

E i ai se aga malie fiafia o Peresitene Oaks. Mo se faataiga, i le faaiuga o se taumafataga o le aoauli lea na auai atu i ai uso uma o le Toasefululua, o se tasi o le Usoga sa fautua mai o le a faigata ona ala i le taimi o le aoauli ina ua mavae ona fiafia i se ‘aiga ma matagofie. Na ataata faalauaitele atu Peresitene Oaks ma tali atu: “Pe afai lena e le mafai ona e mauaina se nofoaga lelei e te moe ai.”

E masani ona ia faia ni tala malie e uiga ia te ia lava ma lana tula. Ae na te puipuia malosi foi i latou o e tau leai ni lauulu i o latou ulu. E na te tautino soo atu, “E faia e le Alii le tele o ulu, ma o i latou e le aulelei tele na te ufufua i lauulu.”

O lona toafimalie ma le aga malie e mataina, ma e le faavaivai lona alofa ma le agalelei. E masani ona tuu mai ni manatu faaalua o tagata pe a mavae ona faatasi ma Peresitene Oaks faapea latou te fiafia i le ala na te faatoafimalieina ai o latou lagona ona o le malie o ona uiga, o le moni o lona alofa, ma ona uiga alofa.

O Uunaiga a Tamaitai Amiotonu

Faatasi ai ma mea uma ua ausia ma le faamamaluina e o faatasi ma lona soifuuga mataina, o Peresitene Oaks o se tagata muamua ua faailoa mai le aafiaga loloto o ni tamaitai amiotonu e toatolu i lona olaga. O Stella Harris Oaks, June Dixon Oaks, ma Kristen M. McMMain Oaks.

E fitu tausaga o Dallin Oaks ae maliu lona tama, o Lloyd E. Oaks, o se fomai, i le tuberculosis i le na o le

36 tausaga. Na lagomau o ia i le faamanatuina o le 11 tausaga o lana faaiipoiga i le tina o Peresitene Oaks, o Stella Harris Oaks. Sa nofo toatasi o ia mo le vaega na totoe o lona olaga ma tausia le la fanau e toatolu.

“Sa faamanuiaina a’u i se tina ofoofogia,” sa toe ta’ua e Peresitene Oaks. “Na mautinoa lava o ia o se tasi o le toatele o tamaitai tautupu o e na ola i aso e gata ai.”⁴

I le avea ai ma se tausaga muamua i le BYU, sa feiloai ai Peresitene Oaks ia June Dixon. Sa la faaiipoigo i le 1952 ma sa faamanuiaina e avea ma matua o se fanau e toaono. “Ou te lei galue i se tulaga maua ma faifai pea pe ana lei oo mai June i lo’u olaga,” o le saunoaga lea a Peresitene Oaks. “Ona o ia e tele mea na ou ausia i lo’u olaga.”⁵ O le aso 21 Iulai, 1998, na maliu ai June i le kanesa.



Na talanoa June ma Dallin e uiga i le lumanai o le la aiga ao lei maliu o ia. Sa la ioeina o le toe faaiipoigo o le a avea ma se faamanuiaga ia te ia ma le la aiga. O le aso 25 Aokuso, 2000, sa faaiipoigo atu ai Elder Oaks ia Kristen M. McMMain.

Ua faamatalaina e Kristen Oaks lona olaga ma Peresitene Oaks i se fuaiupu faigofie e tasi: “Ua tuufaatasia i maua i le galuega a le Alii, ma ua anoanoai faamanuiaga ua ma maua mai ai.” E fatuina e Kristen ni faatasitasa faaleaiga i le faatele e mafai ai ona e aumaia ai le tele o le olioli i le aiga atoa. E avea pea June ma se vaega o le talanoaga.

Ao aoao atu ma molimau atu ia Peresitene Oaks e uiga i upumoni o loo i ai i le “O Le Aiga: O Se Folafolaga i le Lalolagi,” na te muai silafiaina le taua o le avea ai ma

se tane ma se tama. Ua ia aoaoina ni lesona taua e uiga i tiutetauave e fefaasoai e tane ma ava “e alofa ma tasi e le tasi le isi ma a la fanau”—ma i “nei matafaioi paia, e ao i [tane ma] tama ma [ava ma] tina ona fesoasoani le tasi i le isi o se paaga tutusa.”⁶ O le tumau pea ma i le mea sili na te mafaia, sa soifua Peresitene Oaks i lona soifua faaleaiga i ala a le Alii.

O Le Tuuto Atu o le Olaga Atoa

O le aso 6 Aperila, 2018, na lagolago ai Peresitene Russell M. Nelson o se Peresitene o le Ekalesia a Iesu Keriso o le Au Paia o Aso e Gata Ai, faatasi ai ma Peresitene



Lauiloo ai i le faia o tagata ia lagona le tausia lelei, na faimalaga Peresitene Oaks i le lalolagi atoa e auaua atu ma faasoa atu le talalelei.

Agavale: O ia ma lona faletua o i ai nei, o Kristen, na saunoa e uiga i le faia o fesoootaiga faaleaiga i le konafesi mo talafaa-solopito o aiga 2018 Roots Tech.

FAAMATALAGA

1. Dallin H. Oaks, *The Lord's Way* (1991), 7.
2. Tagai Dallin H. Oaks, “Where Will It Lead?” (Faigalotu a le Iunivesite o Polika Iaga, 9 Nov. 2004), speeches.byu.edu.
3. Dallin H. Oaks, “Bible Stories and Personal Protection,” *Liahona*, Nov. 1992, 39–40.
4. Don L. Searle, “Elder Dallin H. Oaks: ‘It Begins by Following the Other Apostles,’” *Ensign*, June 1984, 14.
5. Dallin H. Oaks, “The Student Body and the President” (Brigham Young University devotional, Sept. 9, 1975), 6, speeches.byu.edu.
6. “O Le Aiga: O Se Folafolaga i le Lalolagi,” *Liahona*, Me, 2017, 145.
7. Tagai Dallin H. Oaks, “The Dedication of a Lifetime” (Faesaite a le Ofisa o Aoga a le Ekalesia mo talavou matutua, Me 1, 2005), 2, broadcasts.lds.org.

Dallin H. Oaks o se Fesoasoani Muamua i le Au Peresitene Sili ma Peresitene Henry B. Eyring o se Fesoasoani Lua.

Ua oo mai Peresitene Oaks i lona tofiga fou i le korama pulefaamalumu O Le Ekalesia a Iesu Keriso o le Au Paia o Aso e Gata Ai ma le “tuuto filemu ma le mausali o le olaga atoa”⁷—o se olaga ua tuuto atu i le Faaola ma Lana Ekalesia toefuataiina. O aoaoga patino faalesoo ma mamana a Peresitene Oaks, ma le tumau ai o lana faataitaiga amiotonu o le a uunaia ai ma le lelei ia tagata i le lalolagi atoa ma fesoasoani ia i latou ia mulimuli i ala a le Alii. ■



Saunia e Elder Jeffrey R. Holland

O Le Korama a Aposetolo e Toasefululua

PERESITENE HENRY B. EYRING: Maoae le Atamai, Lotomauualalo faapei o se Tamaitiiti

O le tele o vaega o le soifuaga ma uiga o Peresitene Henry B. Eyring e mama ao nisi taimi e feteenai.

Sa fai mai talu ai nei se tasi o atalii o Peresitene Henry B. Eyring, “E mafai ona faamatalaina lo’u tama i upu e lua: faamoemoega mama.” E mautinoa lava o tagata uma o e ua feiloai i lenei Fesoasoani Lua fou ia Peresitene Russell M. Nelson, vaavaai ia te ia o fegalealeai ma isi, pe faalogo ia te ia o tuuina atu se lauga e ioe i ai. E moni, e foliga mai o vaega eseese matagofie o le soifuaga o Hal Eyring (e pei ona iloga ai o ia e le aunoa i aiga ma uo) o se tasi o faaaliga umi o se uiga tupito lona mama, o se faaaliga faifai pea e tasi o le “faamoemoega mama”: ia i ai i upu ma galuega uma o le mea tonu lava lea ua finagalo le Atua ia i ai Lana fanau.

O le metotia a Peresitene Eyring mo le tuliloaina o lona sini e manino lava ma e le faigata e pei o le galuega lava ia—ma e le itiiti ifo le faigata! Mai lona laitiiti i le taimi nei e oo i le vaitau o lona 80, ua tauaveina e Hal nei taumafaiga ina ia sa’o i luma o le Atua e ala i le sailia ma le naunautai mo—ma naunau e galue e aunoa ma—le taitaiga a le Agaga Paia, o se soa faalelagi o le a ia faasino i ai e toetoe lava o talanoga uma ua ia faia, faaiuga uma faaletaitai na te faia, po o tautinoga lautele uma na te fofogaina. Ina ia fialia i le mafutaga a le Agaga Paia o se uiga taua ia Henry B. Eyring i se taunuuga faaselesitila. O se

faaaliga o lona lotomauualalo moni faapei o se tamaitiiti. O se faamaoniga o lona mama a’ia’i ofoofogia faaleagaga.

O se mea e ese mai ai, o ni feteenaiga e tele o lona soifuaga lea e avea ai le mama a’ia’i ma se mea e ese mai ai. Sa soifua mai ma faaigoaina i se saienitisi o vailaau sa finau mo le faailoga o le Nobel, sa taumafai Hal i le fisiki ma le kemisi ae na filifili mea faapisinisi mo lana matata faaleaoaoga, o se autu na mamao ese lava mai tu masani a le au Eyring. Ma le mauaina i le aluga o le olaga o se tamaoaiga tele, sa la filifili ma lona faletua, o Kathleen, i lona olaga faaipopopo atoia ina ia ola tauagafau ma fuafua lelei—i nisi taimi e matuai faaeteete lava





(e pei ona lipoti mai ma le talie e le la fanau). Sa aotauina ma le atamai i se tasi o iunivesite iloga o le Iunaite Setete, na faamanuiaina e avea ma polofesa i le isi [iunivesite], ma avea ma faiaoga asiati i le lona tolu, e leai se tasi ua sili atu ona faamanuiaina ma taua i aoaoga faapisinisi nai lo Hal i lona laitiiti tele, ae sa ia tuua lona aoaoga taua ma tulaga faapolofesa mautu e pulefaamalumalu i se kolisi e lua tausaga e toetoe lava a le mailoa (e le mailoa i nisi ma ana paaga aoga uma i le Harvard, Standford, ma le MIT), o se aoga na te lei asiati lava i ai—o le Kolisi o Ricks—i se nuu o lona nofoaga atonu e le mafai ona ia faasinoa i soo

Agavale: O le ola ae i New Jersey, ISA, o Henry laitiiti (o loo nofo i autafa o lona tina) na mauaina se molimau, e tusa lava pe na o ni nai tagata o le Ekalesia e feiloai i ai. I le 13 o ona tausaga, sa siitia ai o ia ma lona aiga i luta ona sa talia e lona tama se tofiga i le iunivesite o luta. Sa taalo pasiketipolo Henry mo le Aoga Mauafulaga a Sasae i le Aai o Sate Leki.

se tagata—o Rexburg, Idaho, ISA.

Ua faaauau pea le mama ma le feteenai. O le atamai i talaatu o faataitaiga masani o lona uiga faaleatamai, sa lei naunau Peresitene Eyring e faalagolago i lana lava taleni po o faautautaga poto faalemafau e faia soo se faaiuga i mataupu e i ai ni taunuuga faaleagaga. O le lototoa i le fuataga atoatoa o lona upu pe a manaomiaina ma le malosi i talaatu o le faaiuga masani o le malosiaga, na te le faia lava, e pei ona ta'ua e Peresitene M. Russell Ballard (ma le fanau lava a Peresitene Eyring), “ona faanatinati ona faia se faaiuga vave po o le filifili o se gaoioiga e aunoa ma le mafaufula toto a i. Na te le faia lava se faatinoga i soo se auala o le a tuu ai le Ekalesia po

o soo se tasi na te vaaia ia lamatia.”¹¹

O se tasi o faataitaiga faaiuga o le mama ma le feteenai o loo taoto mai i le ogatotonu tonu o le agaga o Henry B. Eyring e ono aotele ai le amiosa’o o lenei tamalii ofoofogia:

O se tasi taimi sa i ai se manaoga o Peresitene Eyring e tuuina atu le faamanatuga i se vaega sa le mafai ona auai atu i le nofoaga masani o le sauniga faamanatuga a le uarota. Ao lei taulai atu i lona faiga agalelei, sa ia faia se faasologa o valaau faananati i le epikopo o lana uarota e saili ai se faatagana e faia ai. Ioe, sa taliaina ma le naunau ma le alofa e le epikopo le talosaga.



1933: Sa soifua mai i Princeton, New Jersey, ISA

1955: Faaau mai le Iunivesite o Iuta ma se faailoga i le fisiki

1959, 1963: Mauaina lona faailoga o le matuaofaiva i pulega faapisinisi ma le faailoga fomai i pulega faapisinisi mai le Iunivesite o Harvard

1962: Faaipoipo atu ia Kathleen Johnson i le Malumalu o Logan Iuta

1962–71: Faiaoga i le Aoga Faaau o Faapisinisi i le Iunivesite o Stanford i Kalefonia, ISA

1971–77: Auauna atu o se peresitene o le Kolisi a Ricks

1980–85: Auauna atu o le Komesina a Aoga a le Ekalesia

1985: Valaauina o se Fesoasoani Muamua i le Au Epikopo Pulefaamalumu

1992: Valaauina i le Korama Muamua o Fitugafulu

1992–2005: Auauna atu o se Komesina o Aoga a le Ekalesia

1995: Valaauina i le Korama a Aposetolo e Toasefululu

2007: Valaauina o se Fesoasoani Lua i le Au Peresitene Sili

2008: Valaauina o se Fesoasoani Muamua i le Au Peresitene Sili

2018: Valaauina o se Fesoasoani Lua i le Au Peresitene Sili

Ua ou ta’ua lenei mea faapitoa na tupu mo se faamoemoega. E mautinoa lava ua manino le lesona i tagata uma. O se uso lenei o le Au Peresitene Sili o le Ekalesia o loo talosaga atu. O se Aposetolo ua faauuina lenei, o se tasi ua umia ki uma o le perisitua e mafai e soo se tagata soifua i luga o lenei fogaeleele ona umia. O se tasi lenei e mafai ma e tuuina atu faatonuga i taitai perisitua uma o uarota ma siteki i le Ekalesia, e aofia ai le epikopo o lana lava uarota i Bountiful, Iuta, ISA. O se tasi lenei e mafai e ana ki ona pulea ki a soo se taitai faalelotoifale ma i le avea ai ma se taitai pulefaamalumu o le Ekalesia e masani ona manaomia le faia. Peitai o le mama a’ia’i o le loto lea e faailoga ai mea uma na te faia ma le manatu fetee-nai e le o tagata uma o le matuai saunia e faaalua, o Peresitene Henry B. Eyring lenei o loo mulimuli ma le faaeteete i tulafono ua otootoina mai mo tagata uma o le Ekalesia i soo se nofoaga i le lalolagi, o loo tuuina atu ma le lotomauualalo lana talosaga i luma o le ua filifilia a le Alii ma ua sili atu le naunau e talia le fautuaga ma usitaia le faaiuga a lona taitai i le lotoifale.

O A’a o Lona Faatuatua

O lenei tamaoiga faaleagaga ma le mama a’ia’i manino o le faatuatua o Peresitene Eyring na amata i lona laitiiti. Sa soifua mai ia Henry ma Mildred Bennion Eyring i le aso 31 Me, 1933, ao avea Henry le Matua ma se polofesa tautaua i le lalolagi i le Iunivesite o Princeton, sa tausia Hal i se eria lea e tau le tele ni tagata o le Ekalesia lea na faia ai e le au Eyring ia sauniga o le Sapati i lo latou fale. Na talasua mulimuli ane Peresitene Eyring faapea o ia ma lona uso laitiiti, o Harden, na atoa ai le Peraimeria atoa o le paranesi, ma le uso matua, o Ted, na faatumulia ai le polokalama atoa o Alii Talavou.

O le latou tina, o Mildred, sa avea ma ta piano ma le taitai musika, e ui na te lei manatua tele pe na faapefea ona ia faia mea uma e lua.

O le lei mafai ona tapuai faatasi ma se uarota toatele e lei taofia ai Hal mai le amata ona mauaina o se molimau. “Sa ou aoaoina i lona taimi,” sa ia toe manatuaina, “o le Ekalesia e le o se fale; o le Ekalesia e le o le toatele foi o tagata. Sa ou lagona le latalata i le Tama Faalelagi ma iloa (i lona lava taimi) o Le Ekalesia a Iesu Keriso o le Au Paia o Aso e Gata Ai o Lana ekalesia lea; e lei afaina sa feiloai le matou tamai paranesi i lo matou potu ‘ai.’”

Ina ua 13 Hal sa talia e lona tama se tofiga taua tele i le Iunivesite o Iuta. Sa auai Henry laitiiti i le seminare i le vaveao ma sa fiafia e taalo i au pasiketipolo a lana aoga mauualuga, ma i lana lava faamatalaga na te lei faia lava ni ana uo mamae.


Ao lagona ai le faanoanoa mo ia lava i se tasi aso, sa ia mauaina se uunaiga o le a suia ai lona olaga. Sa ia lagona o se lapataga mai le Atua: “E i ai se aso, pe a e iloa moni ai lava po o ai oe, o le a e salamo



e te lei faaogaina lelei lou taimi.” Sa ia tali atu i lena uunaiga i le faitauina faatele o le Tusi a Mamona ao talavou. Sa ia lagonaina foi le taialaina e le tusi a Peresitene Tavita O. MaKei *Gospel Ideals*, lea, faatasi ai ma isi mea, sa aoao ai o ia i le ala e taulimaina ai ma le tataua ia tamaitai, o se tautino o le a ia faaalua i lona olaga atoa i lona toalua faapelepele, o Kathleen.

O Se Miti ua Taunuu

Talu mai lona laitiiti, o miti o’oo’o a Hal o le faaipopo ma faia se aiga. Sa ia mafaufau soo e



Agavale: O Peresitene Eyring o faiaoga i le Aoga Faauu Faapisinisi i le Lunivesite o Stanford ao lei talosagaina e avea ma peresitene o le Kolisi o Ricks (lea ua avea nei ma lunivesite o Polika laga-Idaho).

Luga: O Peresitene Eyring ma lona faletua, o Kathy, sa faamanuiaina i se fanau tama e toafa ma ni afafine se toalua.

uiga i sana fanau i le lumanai lea sa uma ona ia tuuina atu ia i latou se igoa tauvalaau tuufaatasii ‘O Le Au Lauulumumu,” vaai faalemafaufau atu ia i latou ma lauulu mumu e pei o lona tina.

O lenei miti na iu lava ina agai atu ina fua mai i le taimi o lana auunaga o se fesoa-soani i le au peresitene o le Itu a Boston, o se valaauga o le Ekalesia na umia e Hal ao tulimataia lana galuega mo faailoga maualuluga i le Iunivesite o Harvard i le mavae ai o



lana aoga mo se faailoga o le tagata malaga i le Iunivesite o Iuta. I le avea ai ma se tagata aoga faafomai i le taumafanafana o le 1960, sa fai ma sui Hal o le au peresitene a le itu i se faigalotu mo tagata matutua nofofua na faia i le Falelotu i Pines i sautesisifo o New Hampshire, ISA, o se faletele e taua i le eria. I le faigalotu sa ia vaai ai i se tamaitai talavou i se ofu lanu mumu ma le paepae ma sa faaga-eetia lava i le agalelei moni sa ia faasusuluina atu. Sa ia mafaufau, “O le tagata sili lea ona lelei ua ou vaai i ai. Afai e mafai ona ou faatasi ma ia mo le vaega o totoe o lo’u olaga, e mafai ona avea a’u ma tagata lelei na ou manao ia avea ai.”

O le tamaitai talavou o Kathleen Johnson mai Palo Alto, Kalefonia, ISA, e lei fuafua e i ai i Niu Egelani i lena taumafanafana peitai, i le tauanau a lana uo, sa auai ai i le aoga o le taumafanafana ma lana uo i Harvard. I le mavae ai o le faigalotu i fafo, sa faatulaga e Hal ia feiloai ia Kathy i le lotu i se tasi Aso Sa ma sa fiafia e faalogo e fiafia [Kathy] e taalo tenisi. Sa faatele ona taalo tenisi Hal i le vaiaso ma se uo o le kolisi ma o se tagata ua masani e taalo, o lea sa ia mafaufau ai o se taaloga tenisi o se tafaoga muamua lelei tele



ma o se auala mo ia e faia ai se faatosinaga matagofie. O le mea e lei tauina e Kathleen ia te ia sa avea o ia ma kapeteni o le 'au tenisi o lana aoga maualuga! "Sa ia matuai malo lava ia te a'u," e tomumu ai pea Hal e uiga i le taaloga. O le mea muamua lea o faaitaiga ofoofogia a lana ava i le lumanai o le ola ai ma le lotomauualalo ona fesoasoani lea i lana tane ina ia faia foi.

O Se Ala Fou

I le mavae ai o le la faaipoipoga ma le sosoo ai o le tofiga o Hal i le aiga o faiaoga i le aoga pisinisi o le Iunivesite o Stanford, i le tuneva o se tasi po ia Tesema 1970, i ni nai masina ao lei faamaloloina Hal o se epikopo o le uarota a tagata aoga i Palo Alto, sa fai ai se fesili a Kathy e lei mafauina. Ao oso Hal i luga o le moega i le mavae ai o se aso faigata, sa ia punou atu ma fesili atu, "O e mautinoa o loo e faia le mea e ao ona e faia i lau matata?"

O lana fesili na ia te'i ai. O mea uma i o la olaga na foliga atoatoa. Sa foliga malamalama ma manino mai le lumanai, na oo lava i le fale na miti i ai a le au Eyring lea na tusia talu ai nei e Hal le ata i lana api talaaga. O le a aofia ai ni faamatalaga auiliili e pei "o se potu mo

Valaauina o se Aposetolo i le 1995 (luga), ua auauna atu Peresitene Eyring o se fesoasoani i Peresitene e toatolu o le Ekalesia: Gordon B. Hinckley (taumatau), Thomas S. Monson, ma Russell M. Nelson i le taimi nei.

Taumatau: Talotalo atu Peresitene Eyring mai lona nofoaga o se taitai o le solo i le solo o Aso e 47 i le 2012 i le Aai o Sate Leki, luta.

galuega faatino, ia lava lona tele ma lava le malosi e galue ai i totonu ma teu ai se vaalo," faatasi ai ma le "ia le itiiti ifo ma le lima ni palaka i autafa o le laulau" ai ma "se taimai fale po o se fale e sui ai e filemu ma lelei e tusitusi ai."

"O le a le uiga o lau tala?" Sa fesili ai Hal i lona toalua.

"E le mafai ona e faia ni aoga mo Neal A. Maxwell?" sa ia fautua mai, sa faatatau i le Komesina fou o Aoga a le Ekalesia. I lenei mea, sa matuai te'i lava Hal. Sa na o le faatasi ona ia feiloai ia Neal A. Maxwell, ma sa ia iloa



e lei feiloai lava Kathleen ia te ia. Sa ia taumafai e faamatala ia te ia le mafuaaga o le a le fetai ai mo ia le sui o se galuega, peitai sa ia tauanau lava o ia ia tatalo e uiga i le mataupu. Sa ia faia lenei mea i le taimi lava lena, tootuli ifo i ona tuli i talaane o le moega ma tuuina atu se tatalo puupuu. Ina ua leai se tali na oo mai, sa lagona e Hal le faaiuina o le mataupu ma e lei umi ae moe.

Peitai, o le taeao na sosoo ai, sa maua e Hal ni uunaiga manino faaleagaga se lua lea o le a faavavau ona suia ai le ala o lana galuega ma lona soifuaga. Sa ia tusia uma uunaiga i totonu o lana tusi talaaga. Muamua, "Aua le

faaaogaina lou tomai faaletagata e teena ai avanoa ua tuuina atu ia te oe: tatalo e uiga uma i ai ma le mafaufau matala.” Ma le lona lua, “Galue i tofiga ua tofia i ai oe i le Ekalesia faapea foi ma lau galuega i le mea sili e te mafaia; o ni sauniuniga ia.”

O le uunaiga muamua na oo mai o se mea e uiga i se aoaiga o le a ola ai soifua ai pea Hal mulimuli ane. Ina ua teena talu ai ni galuega eseese se tolu na ofoina mai e aunoa ma le tatalo e uiga i ai, i lona mafaufau na oo mai ai upu, “Aua nei e toe faia lena mea sese. E te le iloa po o fea le itu o loo i luga i lau galuega.”

Faatasi ai ma lenei faatonuga faaleagaga ua fou i lona mafaufau, sa saunia Hal ina ua valaau atu le Komesina



Maxwell i le itiiti ifo ma le tolu vaiaso mulimuli ane, e faatulaga se feiloaiga ma ia i le Aai o Sate Leki. Sa tulaia sa’o atu lava Brother Maxwell i le mataupu. “Ou te fia talosaga atu ia te oe e ave ma peresitene o le Kolisi o Ricks,” sa ia fai atu ai. Sa tali atu Hal e manaomia lona tatalo e uiga i ai. Sa ia faia ma o le tali tuusao mai lava sa ia mauaina o le “O la’u aoga lea.” O le vaega atoa, e pei ona latou fai mai ai, o se talafaasolopito. O lana auaunaga i le Ekalesia talu mai lena taimi ua ave ma faataitaiga lelei e pei ona matauina, ma agai atu e auauna atu o se Sui Komesina o Aoga ona sosoo ai lea ma Komesina (faalua), sosoo ai ma valaauga i le Au Epikopo Pulefaamalumalu, o le Korama a Fitugafulu, o le Korama a Aposetolo e Toasefululua, ma se fesoasoani i Peresitene e toatolu o le Ekalesia.

Ae i se lagona moni lava ia Hal, e leai se valaauga i le Ekalesia na sili atu le taua mo ia nai lo le isi: “E mafai ona faaososoina i tatou e ta’iga o vaega uma o le olaga e tetee pe le amanaia ia valaauga e auauna atu ai i le Faaola,” na aoao mai ai Peresitene Eyring. “O nisi o nai valaauga atonu e foliga e le taua, ae o lo’u olaga, ma lo’u aiga, na suia mo le lelei atili e ala i lo’u taliaina o se valaau e aoao atu i se korama a tiakono. Sa ou lagonaina le alofa o na tiakono mo le Faaola ma Lona alofa mo i latou.”²

O se tasi o mea feteenai faaiu: E toetoe lava a leai se tasi ou te iloa e mafai ona ou mafaufau i ai o le ua sili atu ona le fiafia i feeseeseaiga ma tetee i sauaga nai lo la’u uo o Henry B. Eyring. Ae ui i lea sa sili o ia i le au faauu a le ROTC

i lana vasega i le Iunivesite o Iuta ma tautuaina lona atunuu ma le tulaga ese i le Ea Fosi a le Iunaite Setete. Afai e tataua ona alu se tagata i le taua—ma o loo tatou i ai moni lava i le taua lea na amata i le aufono i le lagi—atonu e te manao, muamua lava, ina ia taitaia e se tasi e ita i le mafaufau ai i le taua. Peitai afai o le taua (faaleagaga) lea e tataua ona i ai, ona e aioi atu lea i lena taitai ina ia mafaufau manino,



e oo lava i le atamai, ina ia fua filifiliga o metotia ma faiga uma agai i aoaoga faavae ua faaalua, ma ia ola mo ma saili le faamautinoaga a le Agaga Paia i faaiuga uma na te faia. O sea ituaiga pui-puiga tulaga ese o le paia i se taua e faasaga i soo se mea eleelea pe leaga foi atonu e faaalua ai le mama a’ia’i o le olaga lea o nisi taimi e foliga mai e feteenai o Henry B. Eyring. Ou te mitamita e auauna atu i lana ‘au felele, i luga o lana vaataua, po o lona malutaga i le palapala. ■

Talaaga o le Soifuaga o Peresitene Eyring, *I Will Lead You Along: The Life of Henry B. Eyring*, saunia e Robert I. Eaton ma Henry J. Eyring, sa matuai taua tele i le sauniaia o leni tusiga. O nisi o matauga ma talaaga autu o le soifuaga o Peresitene Eyring na oo mai mai leni punaoa.

FAAMATALAGA

1. Tusitusiga patino, 15 Ape, 2018.
2. Henry B. Eyring, “I Le Fanau a La’u Fanau,” *Liahona*, Nov. 2013, 71.



Saunia e Elder
J. Devn Cornish
Fitugafulu a le
Au Pulega Aoao

O Le Ekalesia Moni

“Mo le Faaatoatoaina o le Au Paia”

Eoo mai i le taimi lenei, ua e maua le avanoa e faitau ai i nai uluai mataupu o le voluma 1 o le tala fou e fa voluma o le talafaasolopito o le Ekalesia, *Aupaia: O Le Tala i le Ekalesia a Iesu Keriso o le Aupaia o Aso e Gata Ai*. E ese le manaia o le vaaia o le auala ua fausia ai o tatou faatuatua ma faafou ai o tatou faamoemoe e le talafaasolopito a Le Ekalesia a Iesu Keriso o le Au Paia o Aso e Gata Ai, ua faamatalaina i lona anotusi e pei ona sa oo i ai i latou o e sa soifua ai. Ua matou lagona le faamanuiaina e avatu lena talafaasolopito i se auala e mafai ona malamalama ma talisapaia ai e le salafa o le lalolagi ma le Ekalesia atoa.

O lagona e maua e se tagata mai le faitauina o le talafaasolopito o le Ekalesia, e faalagolago tele lea i mea ua faamoemoe le tagata e maua i lena talafaasolopito. Ua tatou faitau i le fetalaiga a le Alii lava ia e faapea, o lenei Ekalesia “o le ekalesia moni ma ola e tasi i luga o le lalolagi atoa” (MF&F 1:30). O lea la e foliga mai o se mea talafeagai le faamoemoe e faamatala mai e le talafaasolopito o le Ekalesia ni taitai atoatoa ua faaaogaina lelei se faasologa o taitaiga na faaalai mai e faaauau atu ai i se faalapotopotoga atoatoa ua taliaina ma lagolagoina e le lautele. Ae e le o le mea lena o loo faamatala mai e tusitusiga paia, pe faatusa i ai lo tatou talafaasolopito, aua o le faaatoatoaina o le Ekalesia i le aveai ai ma se faalapotopotoga sa le o le faamoemoe laualuga lea o le Alii.

O Le A le Faamoemoe o le Ekalesia?

E leai se vaipanoa o a tatou tusitusiga paia, a tatou aoaoga faavae, po o aoaoga a aposetolo ma perofeta o aso

e gata ai, o aoa mai ai e faapea, o le faamoemoe a le Alii o le, ia atoatoa po o le ia laveai le Ekalesia. Ae, o le faamoemoe o le Ekalesia “ina ia faaatoatoaina ai le au paia . . . seia tatou oo atu o i tatou uma lava ma le loto gatasi i le faatuatua . . . ia fai ma tagata matua, ia oo i le fua o le ua matua, e tataua ma le tumu o Keriso” (Efeso 4:12–13). O le faamoemoe sili lava o le Alii, ia atoatoa Lana Au Paia. E fesoasoani le Ekalesia e lagolago lena faamoemoe.

O le mea lea, o le a tatou matuai fiafia ai i mea tatou te tau i ai i lo tatou talafaasolopito pe afai tatou te faamoemoe na te faaalai mai le ala o le faagasologa o le Toefuataiga e le gata ina faatuina ai le Ekalesia moni a le Alii i luga o le lalolagi, ae ua tuuina mai ai foi aafiaga ina ia mafai ai e ona taitai ma tagata auai ona ola agai atu i le atoatoa a o latou aoa mai a latou ausiga ma o latou faaletonu. O o latou aafiaga e mafai ona faateleina ai lo tatou faatuatua i le Atua ma Keriso, ma fesoasoani tatou te iloa ai le ala e mafai ona tatou suia ma tatou manuia ai, i lo tatou auai i lenei lava faagasologa e tasi o loo taitaia mai le lagi. I nisi faaupuga, o le talafaasolopito o le Ekalesia e tuuina mai ia i tatou le faamoemoe ia iu ane ua mafai foi ona tatou “faaatoatoaina ia [Keriso]” (Moronae 10:32).

O Le A Le Uiga O Le Faapea O Le Ekalesia Moni Lenei?

Afai sa mafai e taitai ma le au paia ua mavae ona faatuina le Ekalesia a Keriso e ui lava o nisi taimi sa le atoatoa ai a latou taumafaiga, ma afai sa latou faia i nisi o taimi ni measese, o le a le uiga o le faaupuga, o le Ekalesia moni lenei? O lona uiga, ia mafai ona tatou maua le talitonu

mauai atoatoa i le moni o le pule o le perisitua ua toefuataiina mai, o sauniga faaola, o aoaoga faavae ua faaalai mai, o tusitusiga paia, ma korama tuufaatasi a le Au Aposetolo e Toasefululua ma le Au Peresitene Sili. O lona uiga, ia mafai ona tatou iloa o le Faaola lava Ia e taitaia le Ekalesia ma o le Agaga Paia o le a molimau atu i le au sailiili faamaoni uma e uiga i le moni o nei mea. O lona uiga, e ala i le taumafai e tausi feagaiga e faatatau i nei sauniga, ma faaaauu pea ona salamo, e oo lava foi i tagata le atoatoa ae faamaoni e pei o oe ma au, o le a nonofo i le mamalu selesitila faatasi ma le Atua ma Keriso ma o tatou aiga e faavavau, e ala i le Togiola a Iesu Keriso.

Matou te lagona le faamanuiaina e faailoa atu lenei tala o le talafaasolopito O Le Ekalesia a Iesu Keriso o le Au Paia o Aso e Gata Ai, ma matou te uunaia outou e faaaauu ona faitau i vaega o totoo o le faasologa pe a alu atu i tua ia voluma taitasi. E faamaoni lava i faamaumauga ma mea moni o loo maua. Matou te talitonu o se faitauga faamaoni o lenei talafaasolopito o le a faateleina ai lo tatou faatuatua i le alofa o le Tama Faalelagi ma i le mana o le Togiola a Keriso,

o le a faamalositia ai a tatou molimau i le taitaiga faalelagi a le Perofeta o Iosefa Samita ma le Toefuataiga, ma e mafai ona tatou maua ai le faamoemoe e faapea, o le a tatou maua foi faamanuiaga uma ua Laua folafolaina mai i e faamaoni. ■

Na auauna atu Elder Cornish o se Sui Pule Sili o le Matagaluega o Talafaasolopito o le Ekalesia i le taimi na ia tusia ai lenei tala.

Mataupu 7 o le *Au Paia* o loo faaalai i le tusiga lenei. O le voluma atoa muamua o loo maua i gagana e 14 i kopi mai le **store.lds.org** ma e leai se totogi i le polokalama o le Gospel Library ma luga o le initoneti i le **saints.lds.org**. O loo maua foi i le Igilisi, Sipaniolo, ma le Potukale i luga o uepisaita lauiloa o tusi faaeletonika [e-book] ma puega o le faitauga o le tusi.

Ina ia aoao atili e uiga i mea musuia na tutupu i le talafaasolopito o le Ekalesia, auai i le faigalotu i le lalolagi atoa, o se Faafesagaiga ma Elder Quentin L. Cook o le Korama a Aposetolo e Toasefululua i le aso 9 o Setema, 2018. Asiasi i le **YSAface2face.lds.org** mo faamatalaga ma ia auina muamua mai ia fesili.







Mataupu 7

Uso a Auauna

O le mataupu 7 leni o se faamatalaga fou e fa-voluma o le talafaasolopito o le Ekalesia ua faaautuina Au Paia: O Le Tala o le Ekalesia a Iesu Keriso o le Au Paia o Aso e Gata Ai. O le a maua leni tusi ua lolomiina, i le vaega o le Talafaasolopito o le Ekalesia o le polokalama o le Gospel Library, ma i le aupaia.lds.org. O mataupu na muamua atu sa lolomiina i lomiga muamua atu ma o loo maua i gagana e 47 i le polokalama o le Gospel Library app ma i le aupaia.lds.org.

O le tautotogo o le 1829 sa malulu ma timuga lea na oo lava ia Me. A o nonofo ai i totonu o fale ia faifaatoaga i Haramoni, ma tolopo le totoina o a latou faatoaga o le tautotogo seia oo ina faaleleia le tau, sa faaliliu pea e Iosefa ma Oliva le tele o faamaumauga i le mea na gata ai lo la mafai.¹

Sa oo ina la tau atu i le tala e uiga i le mea na tupu ia sa Nifaē ma sa Lamanā ina ua maliu Iesu i Ierusalem. Sa faamatalaina ai mafui'e tetele ma matagi ia na tetemū ai tagata ma suia ai foliga o le eleele. O nisi aai na goto ifo i le palapala, ae o isi na apoia e le afi ma mu ai. Na vaeluaina e le uila le lagi mo itula ma na mou ese le la, ma ufitia ai ē na totoe i le pouliuli mafiafia. Sa fetagisi tagata mo le tolu aso, ma faavauvau mo o latou tagata ua feoti.²

Mulimuli ane, na ulufia e le siufofoga o Iesu Keriso le faanoanoa. “Pe tou te le foi mai nei ea ia te au,” sa Ia fesilli atu ai, “ma salamo ia outou agasala, ma liliu, ina ia ou faamaloloina outou?”³ Sa Ia sii ese le pouliuli, ma sa salamo tagata. Sa lei pine, ae faapotopoto atu le toatele o i latou i se malumalu i se laueleele na taua o Nuumau, lea na latou talanoa ai i suiga ofoofogia i le laueleele.⁴

A o talanoa tagata o le tasi ma le isi, sa latou vaaia le Alo o le Atua o afio ifo mai le lagi. “O Au o Iesu Keriso,” sa Ia fetalai atu ai, “o le na molimau i ai perofeta o le a sau i le lalolagi.”⁵ Sa Ia mafuta ma i latou mo se taimi, sa aoao atu Lana talalelei, ma poloaia i latou ia papatisoina e ala i le faatofuina mo le faamagaloga o agasala.

“Soo se tasi e talitonu mai ia te au, ma papatisoina, o ia lava lea o le a faaolaina,” sa Ia tautino mai ai. “O i latou ia o i latou o e o le a maufi i le malo o le Atua.”⁶ A o lei toe afio ae i le lagi, sa Ia tuu atu i alii amiotonu le pule e papatiso ai i latou na talitonu ia te Ia.⁷

A o la faaliliu, sa taia Iosefa ma Oliva i nei aoaoga. E pei foi o lona uso o Alevine, sa lei papatisoina foi Iosefa, ma sa ia manao ai ia iloa atili e uiga i le sauniga ma le pule tatau e faatino ai.⁸

Ia Me 15, 1829, sa matafi ese le timu ma savavali atu ai Iosefa ma Oliva i totonu i le togavao e latalata ane i le Vaitafe o Susikuana. Sa la tootutuli, ma ole atu i le Atua e uiga i le papatisoga ma le faamagaloga o agasala. A o la tatalo, sa tulei mai le filemu i le siufofoga o le Togiola ia i la'ua, ma sa faaali atu se agelu i se ao o le malamalama. Sa ia faailoa mai o ia o Ioane le Papatiso ma tuu ona aao i luga o o la ulu. Sa faatumulia o la loto i le olioli a o siomia i laua e le alofa o le Atua.

“I luga o oulua o’u uso a auauna e,” sa tautino atu ai Ioane, “i le suafa o le Mesia ou te faaee atu i ai le Perisitua o Arona, ua umia ki o asiasiga a agelu, ma o le talalelei o le salamo, ma o le papatisoga o le faatofuina mo le faamagaloina o agasala.”⁹

Sa mālū le siufofoga o le agelu, ae sa foliga mai na matua tuia ai loto o Iosefa ma Oliva.¹⁰ Sa ia faamanino mai o le Perisitua Arona ua faatagaina ai i laua e faatino papatisoga. Ma ia poloaiina i laua ia papatiso e le tasi le isi pe a ia aluese. Sa ia fai mai foi o le a la mauaina mulimuli ane le mana faaopoopo o le perisitua, lea o le a la maua ai le pule e faaee ai le meaalofa o le Agaga Paia i le tasi ma le isi ma i luga o i latou la te papatisoina.

Ina ua tuua e Ioane le Papatiso, sa savavali atu Iosefa ma Oliva i le vaitafe ma savavali atu i totonu. Sa muamua ona papatiso e Iosefa ia Oliva, ma o le taimi lava na ea a’e ai o ia i luga o le vai, sa amata ai e Oliva ona vavalo e uiga i mea o le a le o toe mamao ae tutupu. Ona papatiso lea e Oliva o Iosefa, lea na tu ae mai le vai ma vavalo e uiga i le tulai ae o le ekalesia a Keriso, lea na folafola mai e le Alii e faatu i totonu o i latou.¹¹

I le mulimuli ai i faatonuga a Ioane le Papatiso, sa la toe foi atu ai i le togavao ma faauu e le tasi le isi i le Perisitua Arona. I le la suesuega o le Tusi Paia, faapea ai ma le la faaliliuga o le faamaumauga anamua, sa tele ai ina faitau Iosefa ma Oliva e uiga i le perisitua ma le pule

e galue ai i le suafa o le Atua. O lenei la ua tauaveina e i laua lava lena pule.

Ina ua mavae le la papatisoga, sa iloa e Iosefa ma Oliva, o mau ia na foliga mai na faigata ma fenumiai, ua faafuasei lava ona manino atili. Sa lofia uma o la mafaufau i le upumoni ma le malamalama.¹²

I Niu Ioka, sa matua naunau ai lava le uo a Oliva, o Tavita Uitimera e aoao atili e uiga i le galuega a Iosefa. E ui sa nofo Tavita i Faiete, pe tusa o le tolusefulu maila mai Maniseta, ae sa avea i laua ma Oliva ma ni uo a o faiaoga ai Oliva ma nonofo faatasi ma le au Samita. Sa tele ina la talanoa e uiga i papatusi auro, ma ina ua masii atu ia Oliva i Haramoni, sa ia folafola atu e tusi atu ia Tavita e uiga i le faaliliuga.

Mulimuli ane i se taimi puupuu sa amata ona taunuu atu tusi. Sa tusia e Oliva e faapea na iloa e Iosefa ni faamatalaga e uiga i lona olaga lea e leai se isi e mafai ona ia iloa sei vagana ua ala mai i se faaaliga mai le Atua. Na ia

faamatala afioga a le Alii ia Iosefa ma le faaliliuga o le talafaamaumau. I se tasi tusi, sa tusia ai e Oliva ni nai laina o le faaliliuga, ma molimau atu e uiga i lona moni.

I le isi tusi na faailoa atu ai ia Tavita o le finagalo lea o le Atua mo ia le aumaia o lana vaega ma le taavaletoso i Haramoni e fesoasoani ai ia Iosefa, Ema, ma Oliva ia masii atu i le fale o Uitimera i Faiete, lea o le a latou faamaeaina ai le faaliliuga.¹³ Sa faasolo ina le fiafia tagata

i Haramoni i le au Samita. O isi alii na taufaamatau e osofaia i latou, ae ana le seanoa le tosinaga a le aiga o Ema, semanu e matuia so latou manu’aga.¹⁴

Sa faasoa atu e Tavita ia tusi a Oliva i ona matua ma ona tei, ia na malilie e talileleia Iosefa, Ema, ma Oliva i lo latou aiga. O le au Uitimera o e na tupuga mai i tagata na tautatala faaSiamani na nofoia le nofoaga ma sa tauleleia i latou mo le galulue malosi ma le tuuto. Sa lava le latalata o la latou faatoaga i le fale o le au Samita mo se asiasiga ae sa lava le mamao e taofia ai le au gaioi mai le faalavelave ia i latou.¹⁵

Sa manao Tavita e vave alu loa i Haramoni, ae sa faamanatu atu i ai e lona tama e toe lua ona aso o galuega



Sa masani ona faitau Iosefa ma Oliva e uiga i le pule e galulue ai i le suafa o le Atua. O lenei la laua tauaveina lena lava pule.





mamafa e fai a o lei alu. O le vaitau o le toto o meatoto, ma sa manaomia ona suotosinaina e Tavita le luasefulu eka ma faalelei le elelee i mea faalelei elelee e fesoasoani ai ia ola a latou saitō. Sa fai i ai lona tama e tatau ona ia tatalo muamua ia iloa ai pe talafeagai tonu le alu loa i lona taimi.

Sa fai e Tavita le fautuaga a lona tama, ma a o ia tatalo, sa ia lagonaina le Agaga o tau atu ia te ia ia faauma lana galuega i le fale a o lei alu atu i Haramoni.

I le taeao na sosoo ai, sa savali atu ai Tavita, i le fanua ma vaaia ni atulaina paauli i le elelee na le'i suaina i le

afiafi na mavae atu. I le asiasi atili atu i le fanua, sa ia vaaia ai ni eka se ono ua uma ona suaina i le po, ma o loo faatali mai le palau mo ia i le atulaina mulimuli, ua saunia mo ia e faauma le galuega.

Sa maofa le tama o Tavita ina ua ia iloaina le mea na tupu. “Masalo o loo i ai se mana tele iinei,” sa ia fai atu ai, “ma ou te manatu e tatau ona e alu i Penisilevania i le taimi lava e uma ai ona lulu lau faalelei elelee.”

Sa galue malosi Tavita e sua le fanua na totoe ma saunia le elelee mo se totoina faamanuiaina o meatoto. Ina ua ia maea, sa ia faagutuina lana taavale solofanua i se vaega o solofanua malosi ma vave alu atu loa i Haramoni nai lo le taimi na faamoemoeina.¹⁶

O le taimi lava na masii atu ai Iosefa, Ema ma Oliva i Faiete, sa matua pisi ai lava ma le tina o Tavita. Sa toavalu le fanua a Maria Utimera ma lona toalua o Pita, i le vaitausaga o le sefululima ma le tolusefulu, ma o nisi sa lei toe nonofo ai i le fale sa nonofo lata ane i le aiga. O le taulimaina o o latou manaoga, sa faatumulia ai aso o Maria i galuega, atoa ai ma ana malō e toatolu sa faaopoopo atili i ai isi galuega. Sa faatuatuaina e Maria le valaauga o Iosefa ma sa lei faitio lava, ae sa matua lelava lava.¹⁷

O le vevela i Faiete i lona taumafanafana sa matua matautia lava. A o tataina e Maria ia lavalava ma saunia meaa, sa faalauina atu e Iosefa le faaliliuga i se potu pito i luga. Sa masani ona tusitusi Oliva mo ia, ae mai lea taimi i lea taimi sa feauaua'i ai ma Ema po o se tasi o le au Utimera e tusitusi.¹⁸ O nisi taimi, pe a lelavava Iosefa ma Oliva e faaliliu, la te o atu i se vailepa lataane ma togitogi maa e faapisipisi i luga o le vai.

Sa itiiti se taimi e malolo ai ia Maria lava ia, ae sa faigata ona onosa'ia le galuega faaopoopo ma le avega sa i ona luga.

I se tasi aso, a o i ai o ia i le pa povi i le mea sa tatau ai susu o povi, sa ia vaaia se tamaloa ulu sinā ma se taga sa amo i lona tauau. O lona tu faafuasei mai na fefe ai o ia, ae a o ia latalata mai, sa ia saunoa atu ia te ia i se leo agalelei lea na ia maua ai le toafimalie.

“O lo’u igoa o Moronae,” sa ia saunoa ai. “Ua fai lava si ou le lava ona o nei galuega faaopoopo uma e tatau ona e faia.” Sa ia to ese le taga mai lona tauau, ma sa matau e Maria a o amata e ia ona tatala.¹⁹


“Ua e faamaoni ma filiga tele i au galuega,” sa ia toe fai atu ai. “O le mea lea, ua tatau ai ona e maua se moli-mau ina ia mafai ona faamalosia ai lou faatuatua.”²⁰

Sa tatala e Moronae lana taga ma aveese ia papatusi auro. Sa ia tuu atu i luma o Maria ma suesue o latou itulau ina ia mafai ona ia vaai i tusi-tusiga o i ai i luga. Ina ua uma ona ia susue i le itulau mulimuli, sa ia uunaia o ia ia onosai ma faatuatua a o ia tauaveina avega faaopoopo mo sina isi taimi itiiti lava. Sa ia folafola atu o le a faamanuiaina o ia mo lena mea.²¹

Sa mouese atu le toeaina matua i sina taimi mulimuli ane, ma tuua ai na o Maria. Sa i ai pea ni galuega a Maria e fai, ae na le toe popole ai o ia.²²

I le faatoaga a Utimera, sa vave faaliliuga a Iosefa, ae sa luitauina nisi o aso. Sa alu solo lona mafaufau i isi mataupu, ma sa le mafai ona taulai atu i mea faaleagaga.²³ Sa pisi le tamai fale o Utimera i taimi uma ma tumu i mea faalavefau. O le masii atu iina o lona uiga ua lafoaia ai le filemu patino na la olioli ai ma Ema i Haramoni.

I se tasi taeao, a o ia sauni e faaliliu, sa le fiafia o ia ia Ema. Mulimuli ane, ina ua ia toe faatasi atu ia Oliva ma



Tavita i le potu i le falealuga lea sa latou galulue ai, sa le mafai ona ia faaliliuina se silapale.

Sa ia tuua le potu ma savali ese atu i fafo i le togalaau. Sa ia nofo ai pe tusa ma se itula, ma tatalo ai. Ina ua ia toe foi mai, sa ia faatoese atu ia Ema ma talosaga atu mo se faamagaloga. Ona ia toe foi atu lea e faaliliu e pei ona masani ai.²⁴

Ua ia faaliliuina nei le vaega mulimuli o le faamaumauga, ua faaigoaina o papatusi laiti a Nifae, lea o le a avea tonu ma amataga o le tusi. I le faaaliga ai o se talafaasolopito talitutusa i le talafaasolopito lea sa la faaliliuina ma Matini lea na leiloloa, sa faamatala ai e tamai papatusi se alii talavou e igoa ia Nifae, o lona aiga lea na taitai mai e le Atua mai Ierusalem ma avatu i se nuu folafolaina. Sa faamatalaina ai le tupuaga o faamaumauga ma tauiviga i le amataga i le va o nuu sa Nifae ma sa Lamanā. Ae sili atu ona taua, sa maua ai se molimau mamana ia Iesu Keriso ma Lana togiola.

Ina ua faaliliuina e Iosefa le papatusi mulimuli, sa ia iloa ai sa faamatalaina [e le papatusi] le faamoemoega o faamaumauga ma tuuina atu i ai le ulutala, O Le Tusi a Mamona, sa faaigoa i le perofeta tusitalafaamaumu anamua lea sa tuufaatasia le tusi.²⁵

Talu ona ia amata faaliliuina le Tusi a Mamona, sa tele mea na aoaoina e Iosefa e uiga i lana matafaioi i le lumanai i le galuega a le Atua. I ona itulau, sa ia iloa ai aooga autu na ia aoaoina mai le Tusi Paia faapea ai foi ma upumoni ma malamalamaaga fou e uiga ia Iesu Keriso ma Lana Talalelei. Sa ia mauaina ai foi fuaitau e uiga i aso e gata ai lea na valoia ai se tagatavaai filifilia e igoa ia Iosefa, lea o le a aumaia le afioga a le Alii ma toefuatai mai le malamalama ma feagai na leiloloa.²⁶

I le faamaumauga, sa ia aoaoina ai na faalauteleina e Nifae le valoaga a Isaia e uiga i se tusi faamaufaailogaina lea na le mafai e tagata aoaoina ona faitauina. A o faitauina e Iosefa le valoaga, sa ia mafaufau i le talanoaga a Matini Harisi ma Polofesa Anetone. Sa faamautuina ai ua na o le Atua lava e mafai ona aumaia le tusi mai fafo o le elelee ma faatu ai le ekalesia a Keriso i aso amuli.²⁷

A o faamaea ai e Iosefa ma ana uo le faaliliuga, sa liliu atu o latou mafaufau i se folafolaga na tuu mai e le Alii i le Tusi a Mamona ma i Ana faaaliga—ia faaali atu papatusi i ni molimau se toatolu. Sa asiasi atu matua o Iosefa ma Matini Harisi i le faatoaga a Uitimera i le taimi lea, ma i se tasi taeao sa augani atu ai Matini, Oliva, ma Tavita ia Iosefa e faataga i latou e avea ma molimau. Sa tatalo

Iosefa ma tali mai ai le Alii, ma faapea mai afai latou te faalagolago ia te Ia ma le loto atoa ma tuuto atu e molimau i le upumoni, o le a avea i latou ma molimau.²⁸

“E ao ona outou faamaulalo outou lava i luma o lo outou Atua i lenei aso,” sa ta’u patino atu e Iosefa ia Matini, “ma afai e mafai ia maua se faamagaloga o au agasala.”²⁹

Mulimuli ane i lenei aso, sa taitai atu e Iosefa alii nei e toatolu i totonu o le togavao e latalata ane i le fale o Uitimera. Sa latou tootutuli, ma auauai uma i latou e tatalo ina ia faaali atu papatusi, ae sa leai se mea na tupu. Sa latou taumafai mo le taimi lona lua, ae sa leai a se mea na tupu.

Mulimuli ane, sa tulai Matini ma savali ese, ma fai mai o ia le mafuaaga o loo tapunia ai pea le lagi.

Sa toe foi atu Iosefa, Oliva, ma Tavita e tatalo, ma sa lei pine ae faaali mai se agelu i se malamalama susulu i o latou luga a’e.³⁰ Sa ia te ia papatusi i ona aao ma susue taitasi itulau, ma faaali atu i alii nei ia faailoga na vaneina i itulau taitasi. Sa faaali mai se laulau i ona talaane, ma i luga o le laulau sa i ai meafaigaluega anamua o loo faamatalaina i le Tusi a Mamona: o mea faaliliu upu, le ufifatafata,

o se pelu, ma le tapasa faavavega lea na taialaina le aiga o Nifae mai Ierusalem i le nuu folafolaina.

Sa latou faalogaia le siufofoga o le Atua o tautino mai, “O nei papatusi ua faaali atu i le mana o le Atua, ma ua faaliliuina i le mana o le Atua. O le faaliliuga o ia [papatusi] ia ua outou vaai i ai, e sa’o, ma ou te poloaiina outou ia molimau i mea ua outou vaai nei i ai ma faalogo i ai.”³¹

Ina ua afio ese le agelu, sa savali mamau atu Iosefa i totonu o le togavao ma maua atu ai Matini o loo tootuli ai. Sa tau atu e Matini ia te ia na te lei mauaina lava se molimau mai le Alii, ae o loo ia manao pea e vaai i papatusi. Sa ia talosagaina Iosefa ia la tatalo ma ia. Sa tootuli Iosefa i ona talaane, ae a o lei matala lelei atu a la upu, sa la vaaia le agelu lava e tasi ua ia faaali maia papatusi ma isi meafaitino anamua.

“Ua lava lea! Ua lava lea!” Sa alaga atu ai Matini. “Ua vaai o’u mata! Ua vaai o’u mata!”³²

Mulimuli ane i lenei aoauli, sa toe foi atu Iosefa ma molimau e toatolu i le fale o Uitimera. Sa talanoa Maria Uitimera



*Sa uu e Moronae ia
papatusi auro i luma o
Maria Uitimera ma susue
ona itulau ina ia mafai
ona ia vaai i tusitusiga
na i ai i luga.*



ma matua o Iosefa i le taimi na faataalise atu ai Iosefa i totonu o le potu. “Tama! Tina!” sa ia fai atu ai. “E te lua le iloaina lo’u fiafia tele ua i ai!”

Sa ia faapalasi atu i lalo i talaane o lona tina. “Ua faaali mai e le Alii papatusi i isi tagata e toatolu e ese mai ia te au,” sa ia fai atu ai. “Ua latou iloa nei mo i latou lava, ou te le o fealuai e faasese i tagata.”

Sa ia lagonaina e peisea’i ua aveesea se avega mai i ona tauau. “O le a latou tauaveina nei se vaega,” sa ia fai atu ai. “E le o toe tuua na o au lava i le lalolagi.”

Sa sosoo ai ma le sau o Matini i totonu o le potu, sa matua faatumulia i le olioli. “Ua ou vaai nei i se agelu mai le lagi!” sa ia alaga ai. “Ou te faaamua i le Atua i le faamaoni o lo’u agaga ua Ia faamaualaloina a’u—a’u lava ia—e fai ma se molimau e uiga i le silisili ese o Lana galuega!”³³

I ni nai aso mulimuli ane, sa faatasi atu le au Uitimera i le aiga o Samita i lo latou faatoaga i Manaseti. I le iloaina ai sa folafola mai e le Alii e faamautu Lana afioga i “fofoga o molimau e tusa le toatele ma lona lava finagalo,” sa o atu ai Iosefa i le togavao ma lona tama, Ailama, ma Samuelu,

faapea ai foi ma uso e toafa o Tavita Uitimera—O Christian, Iakopo, Peter Jr., ma Ioane—ma lo latou uso faaletulafono o Ailama Page.³⁴

Sa faapotopoto alii i se nofoaga sa masani lava ona o i ai le aiga o Samita e tatalo faalilolilo ai. Faatasi ai ma le faatagaga a le Alii, sa aveese e Iosefa le ufi ma faaali atu papatusi i le vaega. Sa latou lei vaaia se agelu e pei ona oo i ai molimau e toatolu, ae sa tuu atu e

Iosefa ia latou uuina faamaumauga i o latou lima, suesue itulau, ma suesue ona tusitusiga faanamua. O le taulimaina o papatusi na faamautuina ai lo latou faatuatua e moni lava le tala a Iosefa e uiga i le agelu ma le faamaumauga anamua.³⁵

O lea la ua maea le faaliliuga ma ua ia te ia ni molimau e lagolagoina lana molimau faavavega, ua le toe manaomiaina nei e Iosefa ia papatusi. Ina ua tuua e alii le togavao ma foi atu i le fale, na faaali mai le agelu ma toe faafoi atu i ai e Iosefa ia faamaumauga paia i lana tausiga.³⁶ ■

O se lisi atoa o galuega ua taua ua maua i le Igilisi i le [saints.lds.org](https://www.lds.org).

O le upu *Autu* i faamatalaga ua faaalai ai faamatalaga faapoopoo i le initoneti i le [aupai.lds.org](https://www.lds.org).



*Sa tuu atu e Iosefa i
Molimau e Toavalu
ia latou uuina
faamaumauga i o latou
lima, suesue ona itulau,
ma suesue ona tusitusiga
faanamua.*



FAAMATALAGA

1. Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:14; Staker, “Where Was the Aaronic Priesthood Restored?,” 158, faamatalaga 49.
2. 3 Nephi 8; Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:15–16; tagai foi Kowallis, “In the Thirty and Fourth Year,” 136–90.
3. 3 Nifae 9:13.
4. 3 Nifae 10:9; 11:1.
5. 3 Nifae 11:10; 15:21–24; tagai foi Ioane 10:16.

6. 3 Nifae 11:33.
7. 3 Nifae 11:23–33.
8. Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:13–16.
9. Mataupu Faavae ma Feagaiga 13:1 (Joseph Smith History, 1838–56, volume A-1, 17–18, i le *JSP*, H1:292–94 [draft 2]); Oliver Cowdery to William W. Phelps, Sept. 7, 1834, *LDS Messenger and Advocate*, Oct. 1834, 1:15; Staker, “Where Was the Aaronic Priesthood Restored?,” 142–59. **Autu:** Toefuataiga o le Perisitua Arona
10. Oliver Cowdery to William W. Phelps, Sept. 7, 1834, *LDS Messenger and Advocate*,

- Oct. 1834, 1:15.
11. Joseph Smith History, 1838–56, volume A-1, 17–18, i le *JSP*, H1:292–94 (draft 2); “Articles of the Church of Christ,” June 1829, i le *JSP*, D1:371.
12. Talafaasolopito Iosefa Samita, 1838–56, volume A-1, 18, i le *JSP*, H1:294–96 (draft 2).
13. Mormonism,” *Kansas City Daily Journal*, June 5, 1881, 1; James H. Hart, “About the Book of Mormon,” *Deseret Evening News*, Mar. 25, 1884, [2]; Joseph F. Smith to John Taylor and Council of the Twelve, Sept. 17, 1878, draft, Joseph F. Smith, Papers, Church History Library; Joseph Smith History, 1838–56, volume A-1, 21, i le *JSP*, H1:306 (draft 2).



14. Talafaasolopito Iosefa Samita, 1838–56, volume A-1, 18, i le *JSP*, H1:296 (draft 2).
15. “Mormonism,” *Kansas City Daily Journal*, June 5, 1881, 1; Dickinson, *New Light on Mormonism*, 250; “The Book of Mormon,” *Chicago Tribune*, Dec. 17, 1885, 3; Joseph Smith History, 1838–56, volume A-1, 21, i le *JSP*, H1:306 (draft 2).
16. Lucy Mack Smith, History, 1844–45, book 8, [8]; Orson Pratt and Joseph F. Smith, Interview with David Whitmer, Sept. 7–8, 1878, [10], in Joseph F. Smith to John Taylor and Council of the Twelve, Sept. 17, 1878, draft, Joseph F. Smith, Papers, Church History Library; Cook, *David Whitmer Interviews*, 26–27.
17. Orson Pratt and Joseph F. Smith, Interview with David Whitmer, Sept. 7–8, 1878, [10], i le Joseph F. Smith to John Taylor and Council of the Twelve, Sept. 17, 1878, draft, Joseph F. Smith, Papers, Church History Library.
18. James H. Hart, “About the Book of Mormon,” *Deseret Evening News*, Mar. 25, 1884, [2].
19. Skousen, “Another Account of Mary Whitmer’s Viewing of the Golden Plates,” 40; [Andrew Jenson], “Eight Witnesses,” *Historical Record*, Oct. 1888, 621.
20. Orson Pratt and Joseph F. Smith, Interview with David Whitmer, Sept. 7–8, 1878, [10], i le Joseph F. Smith to John Taylor and Council of the Twelve, Sept. 17, 1878, draft, Joseph F. Smith, Papers, Church History Library.
21. Skousen, “Another Account of Mary Whitmer’s Viewing of the Golden Plates,” 40; [Andrew Jenson], “Eight Witnesses,” *Historical Record*, Oct. 1888, 621.
22. [Andrew Jenson], “Eight Witnesses,” *Historical Record*, Oct. 1888, 621; Orson Pratt and Joseph F. Smith, Interview with David Whitmer, Sept. 7–8, 1878, [10], in Joseph F. Smith to John Taylor and Council of the Twelve, Sept. 17, 1878, draft, Joseph F. Smith, Papers, Church History Library; Stevenson, Journal, Dec. 23, 1877.
23. Whitmer, *Address to All Believers in Christ*, 30.
24. “Letter from Elder W. H. Kelley,” *Saints’ Herald*, Mat. 1, 1882, 68; tagai foi Bushman, *Rough Stone Rolling*, 77.
25. Joseph Smith History, 1838–56, volume A-1, 34, i le *JSP*, H1:352–54 (draft 2). **Autu:** Faaliliuga Tusi a Mamona; Gold Plates
26. 2 Nifae 3:7–19.
27. Joseph Smith History, circa Summer 1832, [5], i le *JSP*, H1:15; 2 Nifae 26:16; 27:15–21.
28. Mataupu Faavae ma Feagaiga 17 (Revelation, June 1829–E, i le josephsmithpapers.org); Mataupu Faavae ma Feagaiga 5:11–18 (Faaliga, Mat. 1829, at josephsmithpapers.org); Joseph Smith History, 1838–56, volume A-1, 23, i le *JSP*, H1:314–17 (draft 2).
29. Lucy Mack Smith, History, 1844–45, book 8, [11].
30. Joseph Smith History, 1838–56, volume A-1, 24–25, i le *JSP*, H1:316–18 (draft 2).
31. “Letter from Elder W. H. Kelley,” *Saints’ Herald*, Mat. 1, 1882, 68; Joseph Smith History, 1838–56, volume A-1, 24–25, i le *JSP*, H1:316–20 (draft 2); “Mau a Molimau e Toatolu,” i le Tusi a Mamona, 1830 lomiga, [589]. **Autu:** Molimau a le Tusi a Mamona
32. Talafaasolopito Iosefa Samita, 1838–56, volume A-1, 25, i le *JSP*, H1:320 (draft 2).
33. Lucy Mack Smith, History, 1844–45, book 8, [11]; book 9, [1].
34. Lucy Mack Smith, History, 1844–45, book 9, [1]; 2 Nifae 27:14.
35. “Mau a Molimau e Toavalu,” i le Tusi a Mamona, 1830 lomiga, [590]. **Autu:** Molimau o le Tusi a Mamona
36. Lucy Mack Smith, History, 1844–45, book 9, [2].

O LAU TUSIGAMANATU O LE KONAFESI

Konafesi Aoao ia Aperila 2018



PERISITUA MA E UMIA LE PERISITUA

“O le Perisitua Mekisateko e le o se tulaga po o se faailoga faapiipii. O se mana faalelagi ua taofia i le faatuatuaga e faaoga mo le manuia o le galuega a le Atua mo Lana fanau. E tatau ona tatou manatua i taimi uma o alii o loo umiaina le perisitua e le o “le perisitua.” E le talafeagai le faasino atu i “le perisitua ma tamaitai.” E tatau ona tatou faasino atu i ai, ‘o e umiaina le perisitua ma tamaitai.’”

Perisitene Dallin H. Oaks, Fesoasoani Muamua i le Au Perisitene Sili, “O Mana o le Perisitua,” *Liahona*, Me 2018, 65.

Tuumoulu Loloto Atu

AUAUNAGA

Na saunoa le toatele o o tatou taitai i le konafesi aoao e uiga i le auaunaga. Ao e suesue i savali sili ona lata mai, vaai pe mafai ona e iloaina uiga o le auaunaga. O ni nai lauga nei e te amata ai:

- Henry B. Eyring, “[Maua] Lona Agaga e Faatasi ma Outou,” *Liahona*, Me 2018, 86–89.
- Henry B. Eyring, “Auaunaga Musuia,” *Liahona*, Me 2018, 61–64.
- Jeffrey R. Holland, “Ia Faatasi ma Faamalosi i Latou,” *Liahona*, Me 2018, 101–3.
- Jean B. Bingham, “Auauna Atu e pei ona Faia e le Faola,” *Liahona*, Me 2018, 104–7.

E LE TU SE PEROFETA

I LE VA O
OE MA LE

FAAOLA.

AE, E TU

o ia i ou talaane

MA

faasino atu le ala

I LE

FAAOLA.

Elder Neil L. Andersen
o le Korama a Aposetolo a Toasefululua,
“O Le Perofeta a le Atua,” *Liahona*, Me 2018, 27.

Tali i Fesili

E MAFAI MONI LAVA ONA OU LAFOAIA A’U AGASALA MA IA FAAMAGALOINA?

“[O le Faola] na tuuina ifo Lona soifua ma toe aveina a’e.

“Na la faia lenei mea mo i latou uma o e talitonu ia te la.

“Na la faia lenei mea mo i latou uma o e le talitonu ia te la.

“Na la faia foi lenei mea mo i latou o e tauemu, faatiga, ma ta’u fua Lona suafa. . . .

“Ona o Iesu Keriso, ua mafai ai ona tatou toetutu mai le faanoanoaga o le oti. . . .

“Ona o Iesu Keriso, e le gata ina mafai ona soloiesea a tatou agasala; ae e mafai foi ona faagalalo.”

Elder Dieter F. Uchtdorf o le Korama a Aposetolo e Toasefululua, “Faauta i le Tagata!” *Liahona*, Me 2018, 108, 109.

Valaaulia: O a ni au fesili na i ai lea na taliina e se mea na e faalogo i ai i le konafesi? Faaso mai ou aafiaga i la tatou itulau o le Facebook: facebook.com/liahona.

FAAAMATALAGA, AUIIILI MA I LE WHERE HAVE THEY TAKEN HIM? SAUNIA E. J. KIRK, RICHARDS; ATA O SE [TUSIGAMANATU] API MA LE LALOLAGI MAI LE GETTY IMAGES



O le a se mea o le a ou faia?

FAATAITAIA O AOAOGA A LE PEROFETA

Sa ou ootia i le savali a Peresitene Nelson i le konafesi faapea e finagalo le Atua e talanoa mai ia te a'u ma tau mai ia te a'u le mea e finagalo o la ou te faia. I le aso sa ou mafaufau ai o le a ou faaitaia lena mea. Sa ou tatalo ina ia mafai ona ou fesoasoani i se tasi i le aso. Ina ua mavae le 'aiga o le aoauli sa manaomia e utu faatumu le kesi o la'u taavale. Sa ou maua se manatu e tatau ona faatauina se kesi mo se isi tagata. Ma le masalosalo, sa ou mafaufau, "Ia se'i vaai." Sa amata ona pamu la'u kesi. Sa alu ane se tamai veni ma tu i o'u autafa, ma sa alu i fafo se fafine ma lana tama tama. Sa aumai i fafo

lana atotupe ma autitilo i totonu.

Na tau faaiuiu le utuina o la'u kesi ae ou faalogoina lona fai mai ma le matamuli, "Faamolemole lava." Sa ou faliu atu ma vaaia se vaiga popole i ona foliga.

Sa ou tau atu ia te ia e tatau ona ou faatauina se kesi mo se isi i le aso. "O oe lena tagata?" Ma le tei, na amata ona loimata [ona mata]. "O loo i ai se tasi o loo vaavaaia oe i le aso," sa ou fai atu ai. Sa ou taamilo atu i le pamu ma tuu i totonu la'u kata faifaatau. Ona ou oso lea i totonu o la'u taavale ma alu ese atu ma se faamautinoaga mautu o loo i ai se tasi i luga o loo vaavaaia foi a'u. Faafetai i le Atua mo se perofeta!"

—Jonathan Benson, tala na faasoaina i le *Liahona* i le itulau o le Facebook

E i ai se aafiaga e te fia faasoaina? Auina mai lau tala i le liahona.lds.org, po o le faasoa mai i luga o la tatou itulau o le Facebook.

Manatunatu i lenei mea ...

O LE A SE MEA O LE A OU FAIA PE AFAI OU TE ILOA E TOE TASI LAVA LE ASO OU TE OLA AI?

Tagai Elder Taylor G. Godoy o le Fitugafulu, "Toe Tasi Lava le Aso," *Liahona*, Me 2018, 34–36.

Faasoa mai ou lagona i le *Liahona* i le itulau o le Facebook, po o le tusi o ou manatu i lau api talaaga!

Numera o le Konafesi!

103,221

FAIFEAUTALAI O LOO AUAUNA ATU I LE TAIMI NEI:

67,049 faifeautalai faamisiona

36,172 faifeautalai auaua atu a le Ekalesia



malumalu fou na

faalauiloa mai e fausia i Salta, Atenitina; Bengaluru, Initia; Managua, Nicaragua; Cagayan de Oro, Filipaina; Iuta, ISA; Virginia, ISA; ma se aai e lei faamautuina mai i Rusia. Tagai i le faafanua o i luga





O LE MANA O LE FAATUATUA MA Tala o Aiga

*E sili atu ona tatou maufetuutuunai i
le taimi o faafitauli pe a tatou masani
i luitau sa fetaiai ma o tatou lava tuaa.*

Saunia e Adam C. Olson

Mekasini a le Ekalesia

Sa lagonaina i taimi uma e Rosalini Pasini se fesootaiga faapitoa i le tina, o le tina o lona tinamatua o Elisapeta Xavier Tait, ona o tala e tumu i le faatuatua sa ola ae ma Rosalini. O tala i le faatuatuaaina e Elisapeta o le Alii a o malaga mai o ia mai Pompepi e agai i Livapulu ma i Siona, faapea foi ma lona tutu-mau i tofotofoga faamafatia loto, na tosina i ai le vaaiga faalemafaufau o Rosalini a o laitiiti.

O na foi tala sa faia se sao i le saunia o Rosalini e atinae ma faalagolago i lena lava foi ituaiga o faatuatua ina ua fetaiai o ia ma luitau faapena i lona lava olaga.

TUUA O LE AIGA, LEAI O SE AIGA

Elisapeta, vaitau o le 1850, Pomepei, Initia

O Elisapeta Xavier sa o se tamaitai talavou sa lelei ana aoaoga, o le sa fiafia i le olaga faigofie o se vaega o se aiga maumea, ma mamalu i Initia. Peitai sa fetai ai le olaga ma se suiga luitauina i le 1850 ina ua ia faaiipoipo atu ia Viliamu Tait, o se taitai sa faia faatonuga i le neivi a Peretania o le sa papatisoina e Elder Parley P. Pratt i Sikotilani.

Sa matuai le taliaina e le aiga o Elisapeta lona papatisoina. O le mamafatu o mafutaga faalealofa sa sosoo ai ma le mafatia i le maliu o lana tama tama muamua i le [gasegase o le] kolera. O le taimi lea, ao valu masina o lona maitaga ae sa faananau lava ia faatasi ma le Au Paia ma avea ma se aiga e faavavau, sa auina ese atu ai e Elisapeta ia Viliamu ma le la atalii lona lua e tapena se fale mo le latou aiga i Siona.

Ina ua uma ona fanau le pepe, sa tauanau malosi e le aiga o Elisapeta o ia e lafoai lana tane ma lana tapuaiga ae latou nonofo. Peitai ane, o le tumau i lona naunautai e mulimuli i le Faaola, sa ia tuua ai lona aiga ma lona atunuu e faavavau, ma folau atu ai mo Livapulu, Egelani.

Rosalini, 2003, Colorado, ISA

Sa ola ae Rosalini o se uii o se aiga toatele i Enterprise, o se nuu laitiiti i luta i Saute, ISA. Sa ia maua le tele o avanoa e molimauina ai le mana o le faatuatua ia Iesu Keriso i le aluga o ona tausaga i le fale ma i lana misiona. Ina ua uma ona faaiipoipo i le malumalu, sa amatatia ai e Rosalini se malaga e tofotofoina ai lana lava molimau ina ua amata e lana tane se matata o le a atili ai lona mamao ese mai le aiga.

I le mavae ai o le siitia atu i le setete o Colorado, sa vaavaai mamao mai Rosalini a o tauivi lona tina ma le kanesa seia oo ina maliu o ia i nai tausaga mulimuli ane.

Fai mai o ia, "Semanu ou te fiafia e nofo i lo'u nuu i talaane o ou matua i lo'u olaga atoa." "Na ta'e lo'u fatu ina ua ou tuputupu ae ma siitia ese atu. O le maliu ai o lou tina sa nutimomoia ai le olaga. E oo mai lava i le taimi nei, e leai se aso e mavae atu ou te le misia ai o ia.

"E tatau ona ou talitonu sa i ai aso sa matuai misia tele ai e Elisapeta lona aiga. Ae sa talitonu o ia ia Iesu Keriso ma faatagaina Lona mana e galue i lona olaga. Sa lava lava lena e lagolagoina ai o ia. O lena lava foi mana sa fesoasoani ou te faalagolago ai i lo'u Tama Faalelagi mo le malosi, e tusa lava pe na latalata mai lo'u aiga faalelalolagi pe leai."



O LE TUI O LE OTI

Elisapeta, 1856, Livapulu, Egelani

I le malaga umi i le sami mai Initia i Egelani, sa faapea ona ma'i tigaina ai le tama teine laititi a Elisapeta. Sa malii o ia ma sa tanumia i Livapulu. Sa faapea mai Elisapeta mulimuli ane, o le malii ai o lana pepe sa matuai matuitui lava sa ia le iloa ai pe mafai ona ia faaaauu pea. O le lotonutimomoia ma le tuuatoatasi, ae sa faamalosiaina e Elder Franklin D. Richards o le Korama a Aposetolo e Toasefululua, o le sa auauna atu o se peresitene o le Misiona a Europa, sa folau atu ai Elisapeta mo Boston, Massachusetts, ISA.

Rosalini, 2006, Niu Ioka, ISA

E lei lava ona siitia atu e le au Pasini lo latou aiga na faasolo ina tuputupu ae i Niu Ioka, ae faatiga fanau loa Rosalini ao lei atoa masina e tatau ona fanau ai. Sa mafaufau fomai i le taotoga e faafanau ai le pepe ona sa faiifo lava le saoasaoa o le tata o lona fatu. Ae ina ua toe foi le tata o lona fatu i le tulaga masani, sa toe foi le aiga i le fale ma le lagona o le matuu ese atu [o le popole].

I se feiloaiga tulitatao ma le fomai i nai aso mulimuli ane, sa le maua ai e le fomai se tata o le fatu [o pepe]. Sa faafanau mai le la pepe tama i ni nai itula mulimuli ane—e fanau mai ua malii.

“O le oti o la'u pepe sa matuai nutimomoia ai le loto,” o le tala lea a Rosalini. “E lei i ai se taimi na ou lagonaina ai le gaogaoii e pei ona sa ou oo i ai ina ua latou aveese atu si ona tino itiiti mai ou lima.”

Sa felelei le aiga i luga e tanu ai o ia i autafa o le tina o Rosalini. Mo ni vaiaso mulimuli ane, sa le mafai e Rosalini ona aluese ma agai i luma i le olaga.

“Ou te manatu ua ou malamalama teisi i le auala na mafaufau ai Elisapeta pe mafai ona ia agai i luma,” na fai mai ai Rosalini. “Ae sa ia mafaia. Atonu tatou te oo uma lava i lona tulaga i se taimi o o tatou olaga. Ae e le mafai na tatou tutu ai. Tatou te agai i luma e ala i le faateleina o le faalagolago i lo tatou Faaola nai lo o le taimi muamua, ma mulimuli ane, tatou te iloa ai sa i ai lava vavega na siomiaina i tatou.”



IA AGAI PEAI I LUMA, SAUNIA E JOSEPH BRICKEY

O TAU MALULU O LE OLAGA

Elisapeta, 1856, Iowa, ISA

I le uma ai o le sopoia o se vasega, sa oo ai Elisapeta i se atunuu na matuai fou atoa lava. Sa malaga o ia i le nofoaafi i Iowa, ISA, o le faaiuga o le auala nofoaafi e alu i sisifo i lona vaiitimi. Sa taunuu Elisapeta ia Iulai 1856, ma auai faatasi ai ma le vaega o taavaletosolima a Uili.

O mafatiaga a vaega o taavaletosolima a Uili ma Matini ua faamaumauina lelei. Na tuai le vaiitimi o le tausaga na o ese ai vaega ma maua ai i se taumalulu na vave oo mai i Mauga Papa. O le maluluina ma le tau leai o ni meaai, sa maliluu ai le silia ma le 200 o tagata.

Sa i ai faatasi i le au laveai sa auina atu e Peresitene Polika laga ia le toalua o Elisapeta o Viliamu. Sa toe faatasia le ulugalii i le mafiafia o le kiona ma le savili maatiati.

Ina ua toe faasolo manuia i le Aai o Sate Leki, sa faaiu e le ulugalii le la faigamalaga i le Aai o Cedar, na o ni nai maila mai le mea sa amata atu ai Rosalini.

Rosalini, 2007, Hong Kong, Saina

E pei foi o augatupulaga a Elisapeta na muamua atu, sa vave ona iloa e Rosalini ua ia sopoia se vasega e aumau i se atunuu sa le masani ai ina ua maua e lana tane se galuega i Hong Kong.

Fai mai Rosalini, “O nisi tagata e alualu i luma ona o suiga ma mea e le mautinoa, ae sa toetoe lava a mamafa naua mo a'u.”

Sa ia toe maua foi le malosiaga i lona Faaola ma i le fua-fuaga a le Atua mo ia. Faatasi ai ma le lagolago a lona aiga ma uso pele i le uarota, sa oo ai ina alofa ma faapelepele Rosalini i ona siosiomaga ma aafiaga fou.



SA UIA MUAMUA FOI E ISI LENEI AUALA

A o tatou taumafai e mulimuli ia Iesu Keriso, tatou te ui uma atu lava i tofotofoga—o o tatou lava laufanua valevalenoa ma vasa e sopoia ma taumalulu maatiati e faafetaiaia. Ae sa uia muamua foi e isi lenei auala. E mafai ona tatou maua le faamoemoe ma le malosi i a latou tala o le faalagolago i le Faaola.

E manatu Rosalini atonu ua nao le ogatotonu lea o lana faigamalaga ua i ai, ae o le iloa ai o le tala atoa a Elisapeta, ua le mafai ona ia faatali ae mafaufau i le faaiuga o lana lava faigamalaga.

“Atonu e i ai ni o’u uiga auauumama e pei o Elisapeta, atonu foi e leai. Ae ou te faamoemoe a vaai la’u fanau i lo’u olaga, o le a latou vaaia ai ni mea e tutusa ai—sa ma faamaoni uma seia oo i le iuga, ma sa ma faatagaina o ma’ua tofotofoga e mamanuina i ma’ua ina ia aveva atili e pei o lo tatou Faaola.”

O le iloaina o le malosiaga sa ia maua mai ia i latou o e sa uia muamua le auala, ua pasi atu ai e Rosalini na tala i lana fanau.

Fai mai Rosalini, “O le iloaina o a latou tala, tatou te iloa ai sa latou faia ni mea faigata.” “Ma ua tatou iloa le pogai ma le faaosofiaga. O lenei la ua oo i lo’u taimi e tauave ai lena agaifanua o le faatuatua ia Iesu Keriso ma le tuuto i Lana talalelei, ma tuufaasolo atu i la’u lava fanau.” ■

O tala e uiga i o latou tuua sa fesoa-soani e faamalosi ai le faatuatua o Rosalini Pasini ma lona aiga.

TALA O AIGA I TUSITUSIGA PAIA

Ua faalia i suesuega e faapea, e sili atu ona maufetuutuunai tamaiti i luitau o le olaga pe afai ua latou masani i tala e uiga i luitau na fetiaiai ma o latou lava tuua.¹

I le Tusi a Mamona, sa iloa foi e Helamana le mana o le faafesootai atu o lana fanau i tala o aiga ia sa tuufaasolo mai e ala i le tusitusia ma le toe faamatalaina. Na ia ta’u atu i ona atalii:

“Faauta, ua ou tuu atu ia te oulua igoa o o tatou uluai matua, o e na o mai i fafo mai le lauelele o Ierusalem; ma ua ou faia lenei mea ina ia oulua manatua o oulua igoa ia oulua manatua ai i laua; ma a oulua manatua i laua ia oulua manatua a laua galuega; ma a oulua manatua a laua galuega ia oulua iloa ai ua taua, ma ua tusia foi, e faapea na lelei.

“O lea, ou atalii e, ou te manao ina ia oulua faia le mea ua lelei, ina ia taua ma tusia e uiga ia te oulua, e pei ona taua ma tusia e uiga ia te i laua” (Helamana 5:6–7).

FAAMATALAGA

1. Tagai Robyn Fivush, “Collective Stories in Families Teach Us About Ourselves,” *Psychology Today*, Feb. 2, 2017, psychologytoday.com/blog/the-stories-our-lives/201702.




FAATAATIAESEINA O LE OLAGA SA OU FUAFUAINA

Ile ono po o le fitu o o'u tausaga, sa ou iloa ai sa ou manao ia avea ma se tagata e suesuea ogasami. Sa ou taulai atu i la'u sini, galue malosi, ma ou sao atu i se kolisi lelei. Sa ou aveina ni nai kosi mo suesuega o meaola eseese [sulosi]. Ae a o faasolo pea a'u aoaoga, sa oo ina ou tosina atu i le tino o le tagata, ae maise lava i le tulaga o sela ola. Sa tonu o le a avea a'u ma se tagata e suesuea faama'i i le suesueina o tino maliu.

E le'i leva ae ou fetau i la'u tane o le lumanai, ma tonu ai ma te faaiipoipo. Sa i ai lava o se vaega o la'u fuafuaga le faia o se aiga, ae e ui sa ou iloa e mafai ona avea a'u ma se fomai maoae ma se tina maoae, sa ou lagonaina e le mafai ona ou maoae i ia mea uma e lua i le taimi e tasi. Talu ai o le aiga e taua i le ata o le faaolataga a le Alii, o lea na ou filifili ai e avea muamua ma se tina. Sa ou faapea, o le taimi lava e aoga ai la'u fanau, ona mafai loa lea ona ou toe alu foi a'u i le aoga.

Ina ua alu lau uii i le aoga faataitai, sa ou amataina loa le faagasologa o talosaga mo se polokalama o le Fomai [PhD] i suesuega o taumafa paleni, i le Iunivesite o Texas i Austin. A o lei auina atu la'u talosaga, sa ou iloa ai ua ou maitaga ae lei fuafuaina i la'u tamaitiiti lona fitu. Sa 40 ma ona tupu lo'u matua, ma e oo ane i le taimi e aoga ai le tamaitiiti lenei, o le a toeitiiti lava atoa lo'u 50.

Sa ou mafaufau ane, "Ua fai si tuai ona amata se matata fou lea e umi se taimi e aoga ai."



E ui sa ou iloa e mafai ona avea a'u ma se fomai maoae ma se tina maoae, sa ou lagonaina e le mafai ona ou maoae i ia mea uma e lua i le taimi e tasi.

O le taimi lava lea sa ou vaaia ai a'u miti mo se matata i le olaga, ua solofa ifo i lalo. A o amata ona ou faavaivai, sa oo mai i lo'u mafaufau ma lo'u loto se mau: "E le sili lava le alofa o se tasi i lenei alofa, ia tuuina atu e se tasi lona ola e sui a'i ana uo" (Ioane 15:13). Sa ou mafaufau lava o lenei mau e faauiga i se tagata e oti mo se isi tagata, ae o lenei ua sili atu le loloto o lona uiga.

Sa ou iloina, o le alofa aupito sili e

mafai ona ou faalia, o le faataatiaese lea o le olaga sa ou fuafuaina mo a'u lava, ae tuu atu lo'u taimi ma le malosi e tausi ai la'u fanau. Sa ou lagonaina o le mea lena mo a'u, o le mea lenei e finagalo le Alii ou te faia. Ioe, na semanu e mafai ona ou fesoasoani i ni tagata e toatele i le avea ai ma se fomai, ae ua ou iloa foi, o le aafiaga silisili e faavavau e mafai ona ou maua, o loo i olaga ia o la'u lava fanau. ■
Jeannette Cox, Texas, ISA



FAATAUPEPE MA LE UMI O LE TIETIE VAALELE MA LE UPU O LE POTO

Efeoloolo nai taimi o le tausaga, e manaomia ai e lau galuega ona ou malaga mai Taiuani i San Francisco, Kalefonia, ISA mo ni aoaoga faamasani. O le lave o le femalagaai i le va o nei nofoaga e lua o le 15 itula e eseese ai ia taimi. O le faataupepe ma le umi o le tietie vaaalele sa ou fia moe ai i le ao, ae ou le moe ai i le po atoa.

E auai mai le aufaigaluega mai le lalolagi atoa i nei aoaoga faamasani. Sa latou fai mai ia te au, latou te taulimaina le faataupepe ma le umi o le tietie vaaalele i le inuina o le kofe e faaala ai i latou ae inu le uaina mumu e fesoasoani ia latou momoe ai.

Sa ofo mai e nisi o nei aufaigaluega ia nei meainu, ae sa ou fai atu ma le faaloalo ia i latou o a'u o se tagata O Le Ekalesia a Iesu Keriso o le Au Paia o Aso e Gata Ai, ma sa [ou] folafola atu i le Alii o le a ou le inuina se uaina po o le kofe. Sa taufaailili mai nisi o i latou ma fai mai, o poloaiga na ua faigata tele ai le olaga. E i ai taimi, ou te lagonaina ai le pei sa ulagia au e tagata i totonu o le faletele ma le

ateatea i le miti a Liae (tagai 1 Nifae 8:26–27).

Ae peitai, i le aluga o taimi, sa amata ai ona pei le tausaga o le Upu o le Poto o se avega faalemalie foi. I se tasi o po sa le mafai ai ona ou moe, sa ou iloa ai, ua faasolo lava ina vaivai lo'u faatuatua. O le mea e faafetai ai, sa auina mai e lo'u toalua se savali i le aso lena, sa faamalosiauina ai a'u e taofimau i lo'u faatuatua, faalagolago i le Atua, ma tausi Ana poloaiga e tusa lava po o a tulaga [e i ai]. Faatasi ai ma lana faamalosiauga, sa amata ai ona ou tatalo mo le fesoasoani ma amata ona ou vaai atu i mea i se vaaiga ese mai.

I se tasi o malaga, sa ou maitauina ai se tasi o le matou aufaigaluega na uuina mai ni ipu kofe se lua. Sa ou fesili atu ia te ia e uiga i le ipu lona lua.

Sa ia tali mai, "Ua le toe lava le malosi o le ipu e tasi e faaala ai au."

Sa ou te'i i le maitauina, na faapena foi le moni mo i latou sa inuina le uaina. Sa latou manaomia le inuina o ni [ipu] se tele ina ia momoe ai. O nisi taimi, sa moeuumi ai ona sa tele naua la latou inu.

O le vaavaai atu i le matou aufaigaluega ua faasolo ina faalagolago tele i le ava malosi ma le kofe, na ou iloa ai le taua o le tausaga o poloaiga. Ana ou filifili e le usitaia le Upu o le Poto, semanu ou te oo lava foi i le mea lena e tasi.

E lei aluese atoa lou faataupepe ma le umi o le tietie vaaalele, ae ua faasolo manuia le tulaga. I se tasi taeao, sa ou ala ae i le mavae ai o se moe lelei i le po ma vaaia ai le oso ae o le la. A o susulu mai ave o le la i le faamalama, sa ou iloa ai, faatasi ma le fesoasoani a le Tama Faalelagi, e mafai ai ona ou taulimaina soo se tofotofoga e tusa lava po o le a le tele po o le laititi. Pau lava le mea e tatau ona ou faia o le faaaauu ona usitai, tausisia le malosi o lo'u faatuatua, ma tumau seia oo i le iuga. ■

Andrew Lee, Aai o Niu Taipei, Taiuani

Ole tausaiaina o le Upu o le Poto na amata ona pei o se avega mamafa, seia oo ina ou maitauina se tasi o le matou aufaigaluega o manaomiaina ni ipu kofe e lua ina ia mafai ai ona mataala.



ATA NA TUSIA E ALLEN GARRIS

I LE UMA AI O LE AFA O MARIA

Sa matou siitia atu ma lo'u aiga i le motu o Tominika i le Kerepiane ia Aokuso 2016. Sa vave ona matou faamemelo i le matagofie o le motu, aganuu, ma tagata. Sa matou auai i le paranesi i le lotoifale ma aoao ai ni mea e tele mai le au paia iina.

I le Aso Gafua, 18 o Setema, 2017, sa taia ai e se afa e Vaega 5 [le malosi], o Maria, si o matou motu laititi. Sa ma vaavaai atu ma lo'u toalua a'o feato solo e le afa malosi ia fale ma taavale i le auala. Sa ui tonu ae lava le ma'ema'ea o le Afa o Maria i luga o le motu, ma sa matuai leaga le faatamaia. O le aso na sosoo ai ina ua uma le afa, sa matou savalia ai magaala ma maua ai, o le vaomatua lausiusi ma le lauolaola o Tominika ua foliga nei o se fanua taalaelae.

O lena lava taeao, sa matou savali atu i fale o nai tagata o si o matou paranesi. Sa nao le lua lava fale sa lei afaina ma na mafai ona nofoia. O le toaono o aiga e toavalu o le au paia o

e sa nonofo i le itu i matu o le motu ua faaleagaina mea uma. O le valusefulu pasene o fale ma maota i Tominika sa ta'u mai ua le aoga ona nofoia. E ui lava i lenei pagatia, ae sa [faaalua lava] laufofoga ataata o le tele o aiga. Ina ua matou fesiligia po o a mai i latou, sa latou tali mai, "Ua faamanuiaina i matou i le feola pea."

Ona sa faalogo ma usitai lo matou aiga i le fautuaga a le perofeta ia ola tutoatasi, sa i ai lava a matou meai na teu. Sa mafai ona matou fafagaina le toatele o tuaoi, faifeautalai, ma tagata o le matou paranesi. I taumafataga taitasi, sa matou fafagaina ai le averesi o tagata e 20. A o faaoga a matou meai na teu e auauna atu ma tausai ai i latou na siomia i matou, sa faapea ona mama teisi ai a matou lava avega.

O lenei aafiaga sa ou manatua ai Alema ma lona nuu, o "sa oo ina faamamaina avega . . . ; ioe, sa faamalosia i latou e le Alii ina ia mafai ona latou

tauave ma le faigofie a latou avega" (Mosaea 24:15).

E ui lava o loo matou nonofo pea e aunoa ma le ola o paipa, eletise, ma mea e aumaia ai le lagolelei i lea aso ma lea aso, ae sa faamalosia i matou ia a'ea ma ia sii ae isi. I masina talu mai le Afa o Maria, ua faapea ona ou iloa ai, e ui ina taua le saunia faaletino, ae e tatau foi ona tatou saunia faaleagaga. A o tatou usitai ma fausia a tatou molimau i le faatuatua ia Iesu Keriso, o le a tatou maua se faavae mautu lea o le a le toilalo pe a pesi solo mai matagi ma afa o le olaga ia i tatou. ■

Brianne Anderson, Virginia, USA

Ia Setema 2014, sa taia ai e se afa e Vaega 5 [le malosi] le motu o Tominika. Sa ma vaavaai atu ma lo'u toalua a'o feato solo e le afa malosi ia fale ma taavale i le auala.



“O A’U EA O SOU AFAFINE?”

Eui lava ina sa na’o ni nai taimi na ou alu ai i le lotu, ae sa asiasi mai ma le faamaoni o’u faiaoga o aiga ia te a’u. O se tasi o po sa valaau mai ai ma fai mai pe mafai ona ou faasoa atu nisi o manatu e uiga i aiga e faavavau i le vasega e sosoo ai o Mataupu Faavae o le Talalelei.

“Ioe, o le a ou fiafia e fai lena mea,” o la’u tala atu lea.

Ou te lei ano tele i ai, seia oo i le taeao na sosoo ai. O le taimi lena na ou iloa ai, sa ou malie e talanoa e uiga i aiga e faavavau i se vaega o tagata o e atonu ua uma ona latou iloina mea uma e uiga i ai. Sa matuai ou le iloina po o le a se mea e mafai ona ou fai atu ai ia i latou.

I le aluga o tausaga, sa ou faia ai ni filifiliga sa faapea ona vavaeeseina ai a’u mai le talalelei. E faapefea ona faasoa atu ou manatu e uiga i se mea ou te le mautinoa pe na ou talitonu i ai? Sa ou lagona le le mautonu. Ona oo mai lea i lo’u mafaufau o upu o le viiga “O

Le Atua Lo’u Tama” (*Viiga*, nu. 184). Ua loa tausaga ou te le’i toe faalogo i na upu, ae sa ou taulotoina lava. Ona ou iloa lea: E tatau ona ou ole atu i le Atua pe o a’u moni o Sona afafine.

I le taimi lena, sa ou toe faatulagina ai au meafale i lo’u potumoe, o lea la, faatasi ai ma lo’u moega sa faalava i le ogatotonu o le potu, sa ou tootuli ai i ona autafa ma faatalitali mo le oo mai o upu. O le a se upu e mafai ona ou fai atu i le Atua? Ou te lei mautinoa pe o i ai foi o Ia. I lona taimi, na aumai ai e le manaoga loloto o lo’u loto nei upu faatauvaa i o’u laugutu: “Le Atua e, o E i ai moni ea iina? Ma afai o loo e i ai iina, o a’u ea o Sou afafine?”

Sa vave lava ona oo mai le tali. Sa peiseai na faatalitali mai o Ia ia ou fesili atu. Sa ou lagonaina le faapea mai o le Atua, “Ioe, Camille, o loo ou iinei, ma o oe o lo’u afafine.”

Ina ua pupula ou mata, sa ou i ai lava i le gasu o lo’u potumoe. O mea uma sa siomia ai a’u sa paepae solo, ae

na ou lagonaina le pei lava sa faatulaga lo’u olaga i se faatulagaga lelei atoatoa. Sa ou iloa o au o se afafine o le Atua, ma na o le pau lona o le mea e taua.

I le vasega i le Aso Sa, sa na ona ou faamatalaina o la’u tala i le auala na ou iloa ai o a’u o se afafine o le Atua. Sa ou faapea atu, “Afai o a’u o Lona afafine, e faapena foi i isi tagata uma.”

Sa alu le isi tolu ma le afa tausaga i lo’u faia o suiga lelei uma sa manao-mia ona fai, ae e lei toe tutusa lava lo’u olaga. Talu mai lona aso, ou te lei toe masalosalo lava po o ai a’u. Ua ou iloa o loo i ai pea iina le Tama Faalelagi. E alofa o Ia ia te a’u aua o a’u o Lona afafine. ■

Camille Nelson, Iuta, ISA





Saunia e Elder
Kevin W. Pearson

O Le Fitugafulu

Aua Le Tuua le Faaola

**Ua tatou ola i
taimi vevesi. Peitai
o le fesili e le o le
pe o le a faapefea
ona ola ai le
Ekalesia; ae, pe o
le a faapefea ona e
ola ma ou ola ai?**

Onai tausaga ua tea, sa ma feiloai ai ma sa’u uo mo se ma ‘aiga i le aoauli. Ua tele ni tausaga ma te lei toe vaai i le tasi ma le isi. I le aso o ou aoga i le aoga maualuga ma popofou i le kolisi, sa avea o ia o se tasi o au uo sili ona lelei. O ia o se tasi o alii talavou na ou iloina sa sili ona malosi ma sili ona tuuto.

Sa ma auai faatasi i le seminare, taaalo faatasi i taaloga, auai faatasi i le iunivesite, sauni faatasi mo ni misiona, ma sa o ni nai masina sa va ai le [ma] o ese atu i misiona. Ina ua uma a maua misiona, sa faaipoipo atu o ia i se tamaitai talenia ma maoae mai lau siteki.

A o mavae atu tausaga, sa faapea ona eseese auala sa agai i ai o ma’ua olaga. Sa ma siitia atu i nuu eseese ma iu ai ina ma le toe fesootai ma le tasi ma le isi. Ou te manatua lava lo’u te’i ina ua ou faalogo ua o ese i la’ua ma lona toalua mai le Ekalesia. Mai ia i latou uma lava sa ou iloina i lou talavou, o ia le tagata mulimuli na ou mafaufau o le a aluese ma le Ekalesia.

I le [ma] ‘aiga i le aoauli, sa ma talatalanoa ai i mea e manatua o le ma faauoga lea sa faapitoa tele ia i ma’ua uma. Sa ma toe talie i nisi o aafiaga faavalevatea o o ma aso a o laiti. Sa ma talanoa e uiga i o maua aiga ma taumafai e sosoo le ava o taimi [na ma le fesootai ai].

Mulimuli ane, sa ou fesili atu ai i le fesili manino: “Timo, o le a le mea na tupu? Sa e matuai liua ma tuuto! Aisea na e aluese ai ma le Ekalesia? O le a le mafuaaga na e savali ese mai au feagaiga o le malumalu? Pe ua e aluese foi ma le Faaola? Sa ta folafola atu i le tasi ma le isi o le a ta faamaoni ma faatuatua seia oo i le iuga o o taua olaga!”

Sa tali mai o ia, “Kevin, ua ese la’u vaai i mea i le taimi lenei. Ua sui lou manatu e uiga i le Ekalesia ma ana aoaoga. Ou te le ita i le Ekalesia—ae ua ou le toe manaomiaina.”

A o faaiu le ma feiloaiga, sa ou faailoa atu lo'u alofa ma le agaga faafetai mo se faauoga ou te faatauaina pea. Ma, faatasi ai ma se lagona loloto, sa ou faailoa atu ai la'u moli-mau: "Timo, ua ou iloa ua moni nei mea. Ma ua e iloa foi, ua moni nei mea. Ua leva lava ona e iloa. Ua leai ma oe le manino lea sa ia te oe muamua. Ae e mafai ona e toe maua le susulu ma le malamalama o le Agaga Paia lea sa ia te oe muamua. Faamolemole toe foi mai."

Sa ma feofoofotai a o ma faatofa, sa ia musumusu mai, "Ou te faamemelo i lou talitonu mausali ma le naunautai. Ae e mafai faapefea ona e matuai ma'utinoa?"

A o ou savali ese atu, sa ou tomanatu loloto i filifiliga sa ma faia, ma i o latou aafiaga i o maua olaga ma i olaga o le ma fanau ma fanau a fanau.

Au uo talavou e, faamolemole aua le faatagaina le mea na tupu i lau uo o Timo e tupu ia te outou. Pe o e tutumau, mausali, ma liua e pei ona e manatu o loo e i ai? Pe a e fetai ai ma luitau lemaalofia ma alagatau o le olaga, o fea o le a faliu i ai mo le filemu ma le malamalama? Pe a oo ina pogisa ma faigata le olaga, pe o le a e mafaufau pea e tatalo i le taimi lava lea ma i taimi uma?¹

A o faateleina faitioga e uiga i le Ekalesia, lona talafaa-solopito, ona taitai, ma ona aoaoga, o fea o le a e tu ai? A o fetoai talitonuga ma faiga masani a se lalolagi ua faateleina le amioleaga ma mataupu faavae o le talalelei toefua-taiina, o le a se mea o le a e faia?

"Pe Tou Te Fia O Ese Foi?"

O nisi o auupega aupito lelei a Satani o le le magafagafa i mea faalavefau, taufaasese, ma faaleagaga. O ia mea taitasi e faaumatia faatuatua, faapunitia malamalama, ma faasese manatu. Faatasi ua latou faavae ai le luitau maoae o o tatou aso. E faaaoga e Satani ia mea e le gata ia faavaivaia ai Iosefa Samita, le Tusi a Mamona, aoaoga faavae o le Ekalesia, ma taitai o le Ekalesia, ae ia osofai ai foi le fuafuaga a le Faaola ma le Tama. O le mea lava lea ua leva ona i ai.

Pe a oo ia tulaga maemaea lemaalofia o faaososoga ma tofotofoga i le Vaega 5 o afa faaleagaga, pe mata o le a faalagolago pea i le Atua ma pipii i le upu-moni? O le fesili mamana a le Faaola i le Toasefululua o loo faaaoga pea i aso nei:

"Pe tou te fia o ese foi?"

"Ona tali mai lea o Simona Peteru ia te ia, Le Alii e,



a matou o ea ia te ai? O ia te oe upu o le ola e faavavau.

“Ua matou talitonu, ma ua matou iloa o oe o le Keriso, o le Alo o le Atua soifua” (Ioane 6:67–69).

Ua ou manatua se saunoaga mamana mai ia Peresitene Heber C. Kimball (1801–68), Fesoasoani Muamua i le Au Peresitene Sili. Ua taunuu saogalemu le Au Paia i le Vanu o Sate Leki ma sa fai si o latou fiafia ia i latou lava. O le faatoilaloina ai ma le onosaia ai o mea e tele, sa tau faamaualuluga ma faasausili. Sa saunoa Peresitene Kimball:

“Ou te fai atu ia te outou, o le toatele o outou o le a vaai i le taimi o le a oo mai ai faalavelave uma, o tofotofoga, ma sauaga e mafai ona outou tatalia, ma avanoa e tele e faaalua ai lo outou faamaoni i le Atua ma lana galuega. Ina ia faafetaiaia faigata o le a oo mai, o le a tatau ia te outou ona i ai se malamalama mo outou lava i le moni o lenei galuega. . . . Afai e le o ia te oe le molimau, ia ola amiotonu ma valaau atu i le Alii ma ia le tuua seia oo ina e mauaina. Afai e te le faia o le a le mafai ona e taulimaina.

“. . . O le a oo mai le taimi o le a leai se tane po o se fafine e mafai ona toe ola i se malamalama nono. O le a tofu taitaiina tagata taitoatasi e le malamalama o i totonu ia te ia lava. Afai e le o ia te oe, e mafai faapefea ona e taulimaina?”²

Ua tatou ola i taimi vevesi. Peitai o le fesili e le o le, pe o le a faapefea ona ola ai le Ekalesia; ae, pe o le a faapefea ona e ola ma ou ola ai? “Ua faatuina le Tulaga o le Upumoni; e leai se lima eleelea e mafai ona taofia le galuega mai lona alualu i luma.”³ Pe e te alualu ma ou alualu faatasi ai i luma, na pau lena o le mea e le mailoa.



Auala e Sao ai Faaleagaga

Ou te fautuaina atu ni mea taua se ono e ao ona fai e i tatou taitoatasi e ola ai pea faaleagaga.

1 Ia alofa ma usitai muamua i le Atua. O le alofa ma le usitai i le Atua e mautinoa lava e muamua i le alofa ma le auauna atu i isi. E taua le faasologa. Na aoao mai Nifae, “Aua ua foai mai e le Alii le Atua le malamalama i le mafaufau; aua foi ua tautala mai o ia i tagata i o latou mafaufau e tusa ma la latou gagana” (2 Nifae 31:3). E alofa le Tama Faalelagi ia i tatou ma e nau-nau i taimi uma e tuuina mai le malamalama ia i tatou. Ae peitai, e ao ona tatou faamuamua o Ia i o tatou olaga.

2 Fai tatalo faaletagata lava ia. E matuai taua lava le tatalo. Na aoao mai le Perofeta o Iosefa Samita, “O le auala sili ona lelei e maua ai le upumoni ma le potu e le o le fesili i ai mai tusi [atonu na te faaopoopo i ai ma “itulau i le uepi”], ae ia alu atu i le Atua i le tatalo, ma ia maua mai le aoaoga mai le lagi.”⁴ O le a le mafai lava ona e le agavaa e tatalo! Afai e te manao i nisi tali, ia fai atu nisi fesili. Ia saili e le aunoa mo ma tatalo mo le faatosinaga a le Agaga Paia (tagai Moronae 10:5). O le malamalama lea e auina mai e le Tama lea e aumaia le malamalama.

3 “Saili i le aoaoina, e ala lava lea i le suesue ma le faatuatua foi” (MF&F 109:7). O le aoaoina o se tiute paia. O sui e saili le aoaoina; o mea faitino e faatalitali ina ia tau faagaoioi. O taitai maoae o tagata aoaoina maoae ia. E manaomia e le Ekalesia ni taitai maoae—o tamaitai ma alii e sailia le susulu ma le potu sili atu, malamalama ma le liua e loloto atu (tagai MF&F 93:36). O lenei mea e manaomia ai le tautino ma le tuuto. E le mafai ona e maua upumoni loloto i le sueina i se uiki po o le saili i uepisaite. Manatua, o le faatuatua e faamalosi e ala i le faalogo i molimau a i latou o loo i ai faatuatua, ae le o le faalogo i masalosaloga a i latou o e ua leai ni faatuatua.

4 Suesue i tusitusiga paia, ae maise lava le Tusi a Mamona, i aso uma. O le Tusi a Mamona sa tusia faapitoa lava e puipui ma faasaosao ai i tatou a o tatou fefolauai i tulaga o o tatou aso. E faatatau i lona mana, sa molimau mai Nifae e uiga i le ai uamea, “Ma sa ou fai atu ia te i latou o le afioga lea a le Atua; ma ai se e faalogo i le afioga a le Atua, ma pipiimau i ai, e lē fano lava i latou; pe mafai foi e faaosoosoga ma ufanafana mu a le fili ona faatoilaloina i latou i le faatauasoina, e taitai ese atu ai i latou i le faafanoga” (1 Nifae 15:24). Afai e amata ona e lagona le nunumi ma le feeseeseai, ia toe amata i le itulau muamua, ma faatofu oe lava i le Tusi a Mamona.



5 Ia taulai atu i le vaaiga aoao. O oe o se vaega o le faatinoga aupito maoae i luga o le foga-eelele: o le faapotopotoina o Isaraelu ma sauniuni ai mo le Afio Mai Faalua o Iesu Keriso. Ua i ai sau matafaioi taua e fai! Na e sau i le lalolagi ma tautino ia lototoa i lau molimau o le Faaola. O lou faasinomaga paia lena. Ia taulai atu i le vaaiga aoao: O le fuafuaga o le fiafia a le Tama Faalelagi. O tioata o le upumoni. O le siosiomaga mo fesili, faafitauli, ma atugaluga uma. “Aua e tau-tala mai le Agaga i le upumoni ma e le pepelo. O le mea lea, e fetalai mai o ia e uiga i mea e pei ona i ai moni lava, ma e uiga i mea e pei o le a i ai moni lava” (Iakopo 4:13).



6 O le mea sili o ia mea uma, ia faalagolago ia Iesu Keriso. O Ia lava “o le malamalama ma le ola o le lalolagi” (3 Nifae 11:11; tagai foi Ioane 8:12). Pe a oo ina siomia oe ma lofituina e le le mautonu, faigata, ma faaosoosoga, ia faalagolago ia te Ia. Pe a oo ina le ogatusa le olaga ma le mea sa e faamoemoeina, ma faatiga ma faalata oe e i latou sa e faatuatuaina, ia faaauau pea ona faalagolago atoa atu ia te Ia. Tau ina ia e tali atu e pei ona sa faia e Nifae anamua i vaitaimi sa tutusa lava le faigata: “E ui i lea, ua ou iloa le ua ou faalagolago i ai. . . . Le Alii e, ua ou faalagolago ia te oe, ma o le a ou faalagolago pea ia te oe e faavavau” (2 Nifae 4:19, 34).



Po o le a lava le mea e te faia, ia aua lava nei [e] tuua le Faaola! Ona o Lana Togiola, ua avea ai i tatou ma sui, e saoloto e galue ae le seiloga e tau faamalosiā. O le a tatou tutu taitoatasi i luma o le Atua Silisili Ese ma tali atu mo le malamalama ma le upumoni ua tatou filifilia.

Ou te folafola atu ia te outou afai o le a outou mulimuli i nei mataupu faavae ma pipiimau i le upumoni, o le a le mate lava lo outou faatuatua. Ia faamanuia outou e le Atua ia filifili e le aunoa e tilotilo atu i tioata o le upumoni e ala i le mana o le Agaga Paia. ■

Mai se saunoaga i le faigalotu, “The Lens of Truth,” na tuuina atu i le Lunivesite o Polika Iaga-Idaho i le aso 7 o Mati, 2017.

FAAMATALAGA

1. Tagai “Pe na Faia Sau Tatalo?” *Viiga*, nu. 75.
2. I le Orson F. Whitney, *Life of Heber C. Kimball* (1945), 449–50.
3. Joseph Smith, i le *History of the Church*, 4:540.
4. Iosefa Samita, i le *History of the Church*, 4:425.



**I le mavae ai o
tausaga o tauiviga
ina ia talia a’u lava,
sa iu ina ou maua
se vavega sa faapea
ona fesoasoani ou
te malamalama
ai i lo’u tulaga e
faavavau.**

Mauaina o Lo’u Tulaga Paia

Saunia e Daiane Korth da Silva

Mai lava i lo’u laitiiti, sa ou tauivi ai ma lo’u mamafa ma le taliaina o a’u lava. I le amataga, o igoa tauvalaau sa ou mauaina ona o lo’u mamafa sa foliga mai e le afaina, ae i le aluga o taimi, sa amata ona ou talitonu o faamatalaga le lelei sa faia e uiga i o’u foliga vaaia sa faauigaina foi i mea le lelei e faata-tau i o’u uiga.

I le avefa ai ma se tagata talavou, sa amata ona ou iloa e faapea, e ui lava sa ou fiafia i o’u vaaiga faaletino, ae sa lei fetau i lo’u ituaiga tino ma faamoemoega a le lalolagi. Ma sa ou fiafia i o’u uiga filemu, ae sa le o le mea lea sa faamoemoeina mai foi e tagata ia te au—sa mananao faiaoga ia ou tautala i le vasega, sa sili atu le fiafia o tama i teineiti tautalatala, ma sa faafia ona fai mai ia te a’u, sa manaomia ona faateleina lo’u fiafia e faamasani solo nai lo o le mea moni sa ou i ai. Sa faasolosolo malie lava ona amata faiifo lo’u taua faaletagata lava ia.

O o’u tausaga o se tagata talavou matua sa oo ai ina ou le fiafia, sa ou le maua ni lagona lelei i lo’u tino, ma fesiligia ai pe aisea na le mafai ai e le Alii ona fai a’u ia aulelei teisi atu ma sili atu ona agamalie. E tele atu ni faiga e tipi ai le ai sa ou faataitaia nai lo le mea sa tatau ona ou faia, ma o

le mea sa le manuia ai, o le tele lava o lo’u taumafai e faapau o’u pauna, o le tele foi lena o o’u pauna na faaopoopo. O le avefa o se tagata talavou matua nofofua, matamuli, ma putatele, sa lei foliga mai e moomia tele.

Sa ou lagonaina le toilalo ma tonu ai o le ituaiga tagata lava lea na ou i ai, o lena lava, e tusa lava pe le taitai lusi ia pauna sa ou manao ai, pe avefa foi ma se tagata tiotio. E ui ua tuu lo’u soona ita tele ia te a’u lava, ae sa lei taitai lava o’u vaaia ia te a’u lava o se afafine aulelei, ma taua o le Atua. O le mea lava ia, sa tuu lo’u toe taumafai e sue lo’u taua.

O Se Malamalama sa Ou Manaomia

O se tasi o aso, sa tupu ai se vavega a’o o’u faitau i se tautalaga a Sister Mary G. Cook, le faletua o Elder Quentin L. Cook o le Korama a Aposetolo e Toasefululua, mai le faigalotu a le lalolagi atoa ia Setema 2016 mo talavou matutua na faaautuina “Find Joy in Everyday Life.” E faitauina faapea: “Ina ua tatou o mai i le lalolagi, sa tatou aumaia faatasi ma i tatou o tatou natura paia o ni fanau a le Atua. O o tatou taua faaletagata lava ia, na mai i le lagi.” Sa ou lagonaina le pei ua iu ina matala lo’u mafau-fau i se malamalama lea sa matuai

o’u manaomia ae sa faapea e le mafai lava ona ou mauaina. Sa ou iloa, o le taimi muamua, sa ou lagona ai e pei o se mea sese le fiafia ia te au lava, ona ou te lei fetau ma ata faafoliga a le lalolagi e tatau ona i ai se tamaitai aulelei ma taua. O lea ua ou sauni e tautino e faapea, ou te fiafia i lo’u uiga matamuli ma atamai tele, lauulu minimini felefele, mata lanueena, isu e pei o se pateta, ataata lapoa, ma faapena foi i lou tino puta lea e faia mea tonu lava ou te manaomia ona ia faia. Sa amata ona ou faafetai mo le foafoaga a le Atua. Sa iu ina ou malamalama e le foafoaina e Ia ni measese.

I le tuanai ai o le tele o tausaga o tauiviga ma mafatiaga faalelagona ma faaletino, ua iu ina ou aoaoina se upumoni, mo le toatele atonu sa manino lava: o lo’u taua faaletagata lava ia, e le fesootai pe faatatau i le lalolagi lenei! Na mai le lagi. Sa i ai lava i taimi uma ia te au, e tusa lava pe sa ou tauaso i ai. E le filifilia e ala o faasalalaua, e la’u tupulaga, pe o soo se tasi lava, ae o le Tama Faalelagi ma Iesu Keriso, ma Laua te silasila mai ia te au, ua lava lo’u taua ua faapea ona maliu ai le Faaola mo a’u.

O Se Faavae ia Keriso

O le a’oa’o mai le Agaga e uiga i lo’u taua i le silafaga a le Atua, ua ou sui ai i le tele o itu. Ua ou toe alofa faamamā i le olaga. Ua ou lagona le faafetai faateleina mo o’u faamanuiaga e le mafaitaulia. Ua ou lagona se manao tele e taumafai malosi atu e fai le mea sao ma faateleina le talitonu ia te a’u lava ma i a’u moemitiga. Ua ou manao ai e faateleina lo’u agalelei atu ma le onosai i tagata e siomia a’u ma ou latalata atili atu ai i le Faaola.

O loo faaauau pea ona valaau mai ma faamasino mai leo o le lalolagi, ae

o le taimi nei, ua ou maua se malamalamaaga malosi e uiga i lo’u taua lea ou te le toe manao e faagalo. O lena malamalamaaga na aumaia ia te a’u le toafilemu ma le olioli lea ou te manao e faasoa atu i tagata uma ou te feiloai i ai. E ala mai i lena tautalaga i le faigalotu, ua ou aoaoina ai, e manaomia foi e lo’u taua faaletagata lava ia ma lo’u talitonu ia te a’u lava ona i ai se faavae mausali ia Keriso o lea, “pe a faaoo mai e le tiapolo ana matagi tetele, ioe, o ana u fanafana i le asiosio, ioe, pe a pesi mai ia te [au] lana uatoa uma lava ma ana afa, e le malo ai ia te [au], e toso ifo ai [au] i

le vanu o le puapuaga ma le auega e le gata, ona o le papa ua atiina ae ai [au], o le faavae mau lea, o le faavae foi lea, afai e ati ae tagata i ona luga, e le mafai lava ona pauu i latou” (Helamana 5:12).

Ou te faafetai i le Alii ma le taua e faavavau o loo Ia vaai i totonu o i tatou uma. Ou te faafetai mo tamaitai musuia e pei o Sister Cook o le o loo taumafai e ola i le talalelei ma faasoa mai lona atamai. Ou te faafetai mo lenei olaga, mo le vavega o o tatou tino ma mafaufau, ma mo le paia o loo i totonu o i tatou taitoatasi. ■

E alala le tusitala i Niu loka, ISA.





PE O OE O SE
*Uo e
Saogalemu
Ai?*

Saunia e Marissa Widdison

Mekasini a le Ekalesia

Ina ua leiloa ia Apelu, sa fesili le Alii i lona uso o Kaino po o fea o i ai [Apelu]. Sa tali Kaino, “O a’u ea o se leoleo o lo’u uso?”

I se isi faaupuga, sa tali atu Kaino, “E faafefea ona ou iloa? E le o sau galuega le vaavaaia o ia.”

O le eseese, ua aoao mai e Iesu Keriso ia i tatou se savali e matuai ese lava e uiga i le vaavaaia o isi. Na fetalai mai o Ia, e tatau ona tatou faia isi tagata i le ala tatou te mananao e faia ai i tatou, lea e aofia ai le fesoa-soani i le tasi ma le isi, tausia o le tasi ma le isi, ma le vaavaaia o le tasi ma le isi (tagai Luka 6:31).

O loo i ai tagata o loo siomiaina oe o loo i ai se mea o loo tauivi ai. Atonu o loo e tauivi foi oe ia ma taimi faigata. Po o le a lava le tulaga o i ai, e mafai ona e faia se eseese e ala i le filifili e mulimuli ia Iesu Keriso?

UO E SAOGALEMU AI

Ua maua e se tasi o vaega o ni uo se auala ese lava e aapa atu ai i le tasi ma le isi. Latou te o mai mai tulaga eseese faaleaiga ma siosiomaga, ae e alolofa uma lava i latou i le tasi ma le isi ma mananao e faamalosi la latou faauoga.

Sa i ai se tasi o a latou uo sa feagai ma se taimi faigata lava i lona aiga. Sa ia tau atu ia i latou, o nisi taimi e talotalo ai ia mafai ona nimo, ae sa ia nanaina ona lagona i tua o se ataata, ona sa popole ina nei faamasino o ia e isi.

Sa mananao ana uo ia ona iloa, sa saogalemu o ia ia i latou, ma ua lelei atu le lalolagi ona o lona i ai. O lea sa latou mafaufauina ai se fuafuaga: o le a latou faapipii ni pine saogalemu [i o latou ofu]. Sa tofi i latou ma se pine saogalemu e faapipii i o latou ofu i aso taitasi e faamanatu ai ia te ia, ma le tasi ma le isi, ua latou tuuto e fatu se faauoga saogalemu, mausali, ma talitonuina—ma e faapea, latou te mananao i le tasi ma le isi ia latalata atu pea.

O ni tausaga mulimuli ane, o loo manatua lava e lenei tamaitai talavou ana uo pine saogalemu ma e faafetai mo le malupuipua sa ia lagonaina i le iloa sa latou alolofa ia te ia.

O le a se mea e te faia e faaali atu ai i au uo o loo e i ai iina mo i latou?

O LE A SE MEA E MAFAI ONA E FAIA?

Leai, e le manaomia lou faia o se pine saogalemu e lagolago ai au ou. Ae e mafai ona e fesili ifo ia te oe lava, po o le a se mea e mafai ona e faia e te vaavaaia ai au uo, faamalosia i latou o e atonu o tauivi, ma avea ma se uo saogalemu mo soo se tasi lava e manaomia le fesoasoani.

“O i tatou, mai tagata uma, e tatau ona sili ona lelei i le alolofa i tagata nai lo o le faamasinoina o i latou. O i tatou, mai tagata uma, e tatau ona sili

“O i tatou, mai tagata uma, e tatau ona sili ona lelei i le alolofa i tagata nai lo o le faamasinoina o i latou. O i tatou, mai tagata uma, e tatau ona sili atu ona tatou faa-aofiaina [tagata uma].”

atu ona tatou faaaofiaina [tagata uma],” o le saunoaga lea a Elder Dale G. Renlund o le Korama a Aposetolo e Toasefululua. “Ia alofa atu, ma ia faatatau’ (Iuta 1:22)—o le mea lena e tatau ona tatou faia.”¹

O le a la se mea e mafai ona e faia e fesoasoani ai ia i latou o loo siomia oe? Ua lisi atu i lalo nisi o manatu atonu o le a musuia ai lou fatufatuai:

- Tatalo ma ole atu i le Atua mo se fesoasoani. E foliga mai e

faigofie lenei mea, ae e mafai ona avea ma se meafaigaluega malosi. Ua silafia lelei lava e le Atua au uo. Ua Ia silafia lelei lava foi oe, ma e mafai ona fesoasoani ia te oe ia avea ma se uo lotoalofa.

- Ia e nofouta mo faailoga e iloa ai atonu o loo tauivi au uo.
- Sue ni auala laiti, ma patino e te auauna atu ai. E pei ona saunoa mai Sister Linda K. Burton, o le sa avea muamua ma peresitene aoao o le Aualofa, “Muamua matau, ona auauna atu ai lea.”² O le a se mea e te matauina e uiga i au uo? O a mea latou te fiafia i ai ma e le fiafia i ai? O le a se mea o latou manaomia? Ona mafai lea ona e fesoasoani atu i se tasi i se auala tulaga ese ma patino.
- Ia manatua o le avea ma se uo agaalofa, ma lagolagosua e le faapea, o oe ua nafa mo amioga a isi. E le o oe foi e nafa mo lo latou fiafia.
- Sau ma se mea malie e mafai ona outou faia ma au uo, e pei o le faapipii o pine saogalemu [i ofu], e faamanatu ai i le tasi ma le isi ina ia felagolagomai. O nisi o talavou sa faia ni totini faavalevlea ma tautino ai e avea ma “e sailia le lototele, agalelei, ma auaunaga [seekers of courage, kindness, and service]” (i le faaPeretania e fatuina ai se faapuupuuga mo le *socks [totini]*). O le isi vaega e siaki e le tasi le isi e faaoga ai lanu e faatusa i o latou lagona e i ai. Mo

se faataitaiga, afai sa lagona e se tasi ua “viole” i se aso, na iloa e isi uo na manaomia e le tagata lena se faaopoopoga o le alofa.

- Aua le faatapulaaina au uo! Sa faauo atu Iesu i tagata sa inoino i ai isi tagata uma o le lalolagi. A e aapa atu e faaofia mai isi—ae maise lava i latou e faigata ona maua ni uo—o loo e mulimuli i Lana faataitaiga.

E i ai taimi e faigata ai le olaga. Ae o loo e malosi, ma o loo e mamana. O lou agalelei ma lou magafagafa e mafai ona suia ai le olaga o se tagata. E manaomia oe e au uo! Saili le taitaiga a le Alii, ma o le a Ia lagolagoina oe e ala i ou tofotofoga ma fesoasoani i lou faia o le laolagi o se nofoaga e sili atu le lelei. ■

O le tusitala o se tagata o le komiti a le Ekalesia e pui-pui i le pule i le ola.

FAAMATALAGA

1. Faatalanoaga ma Elder Renlund i le aso 23 o Ian. 2018.
2. Linda K. Burton, “Muamua Matau, Ona Auauna Atu ai Lea,” *Liahona*, Nov. 2012, 78.



FAITAU ATILI

Faitau le “Amepasa o le Faamoemoe” o loo i le lomiga lenei e iloa ai le auala na aumaia ai e se tasi o vaega o tagata talavou i luta se fuataga faaopoopo o le faamoemoe i le latou aoga maualuga.

AMEPASA O LE
FAAMOEMOE:

Galulue Faatasi e Puipui le Pule i le Ola



E MAFAI ONA E FAAMALOSIA AU MOLI-
MAU E ALA I LE FAASALALAUINA ATU O
LE MALAMALAMA MA LE FAAMOEMOE
O IESU KERISO.



Saunia e Maryssa Dennis

Mekasini a le Ekalesia

I le lalolagi o faiga faaupufai, o amepasa e fai ma sui o o latou atu-nuu i se isi vaega o tagata. Ae e mafai ona avea oē ma se amepasa e aunoa ma le tau manaomia o se tusifolau! I se lalolagi lea e foliga mai i nisi o taimi ua leaga tele, e mafai ona avea ai oe ma se amepasa o le faamoemoe ma le malamalama. Tau lava o le fesili ia Jackson L. (agavale, i ofuvae enaena), mai Iuta, ISA, o se sui auai o le Vaega o le HOPE a le latou aoga—o se polokalama a le tupulaga mo le tupulaga e puipuia ai le pulē i le ola. E ala atu i se faalapotopotoga e taua o le Hope4Utah, ua ia aoao ai ia iloa faailo lapatai, avea ma se uo, ma aumai le faamoemoe i lana aoga.

Matou te manaomia OE

Fai mai Jackson, “O le i ai i le Vaega o le FAAMOEMOE ua matuai pupula ai o’u mata.” “E i ai tagata o vasega, uo, ma tagata o aiga o e o loo tauivi.”

Ua aoaina e Jackson, e ui e le nafa o ia ma faaiuga e fai e ana uo, ae e i ai mea e mafai ona ia faia e fesoasoani ai ia latou sao mai i se faalavelave. Ua faalia i suesuega e faapea, e toa 7 mai le toa 10 o le tupulaga o e faanoanoa pe e mafafau i le pule i le ola, o le a tauina atu i se uo ona faatoa tau ai lea i se tagata matua.¹ O le uiga o lena mea, o loo e i ai i se tulaga malosi lava e fesoasoani ai i au uo.

E pei ona saunoa Sister Carol F. McConkie, sa avea ma se Fesoasoani Muamua i le Au Peresitene Aoao a Tamaitai Talavou, e faapea: “Ua i ai sa tatou tiutetauave o le feagaiga e vaai e le tasi le isi, ia uulima o le tasi ma le isi ma savavali faatasi i lenei auala. I se isi faaupuga, ia tuu i lalo le telefoni ae tilotilo ma vaai po o ai o manaomia lau fesoasoani.”²

E le tau manaomia ona avea oe ma se vaega o se faalapotopotoga aloaia e faia ai se esesega i le aoga po o i au uo. O ni motugaafa nei e mafai ona aoga i soo se taimi, ma i soo se mea.



O Le A le Mea e Fai

Ina ia avea ma se amepasa o le faamoemoe, taumafai ia **iloa**, **aapa atu**, ma **lipoti atu**.

1. **ILOA** ia faailo o lapataiga o loo manaomia e se tasi le fesoasoani.³ Ia vaavaai mo i latou o e o:

- Lagona le faanoanoa po o le leai o se faamoemoe.
- Amio faalemafau.
- Aloese mai uo ma gaioiga e fai.
- Foai ese atu o meatotino taua.
- Taulimaina tulaga o le faanoanoa e pei o le oti, suiga ogaoga o le olaga, faasaunoa, ma isi mea.
- Suia aga masani o le moe, ai po o le tumama.
- O le talanoa e uiga po o le faia o ni fuafuaga mo le pule i le ola—o le faia o faamatalaga faapea, “Maimau pe ana aua nei ou fanau mai” po o le “O le a sili atu i tagata uma pe a ou leai.”

2. **AAPA ATU.** O le avea ma amepasa e faatatau uma i le fesootai atu. Sue se taimi e mafai ai ona oulua talanoa faamaoni ai ma lau uo. Atonu e te popole faapea, o le lagaina ae o le faatamaiaga o le tagata lava ia po o le pule i le ola o le a atili leaga ai, ae ua o se tala-fatu lena mea. A ia te oe le lototele e tautala atu ai, ua e tuuina atu moni i le tagata se maeafaola ma faailoa atu i ai e te alofa ia i latou. “Aua le fefe e fesili atu i se uo po o latou faia se tauiviga,” o le tala lea a Dr. Greg Hudnall, o se tagata tomai faapitua i le puipui i le pule i le ola ma le tagata faavae o le Hope4Utah. “Ia tuusao [le fesili], ae aua le lauga atu pe faamasino atu.” Ua ia fautuaina le faaoga o se savali “Ou”, lea e oo atu o se savali alofa ma le popole nai lo o se



“Mo i latou o loo i ai i ni tauiviga ma se manatu e uiga i o latou lava aoga patino, po o tauivi foi ia maua se faamoemoega e ola ai, ou te fia tuuina atu lau lava faamautinoaga patino, e alofa faapelepele le Atua ia te oe. . . . Na te silafia lou tagata. Na te silafia ou tauiviga. Ma o loo i ai le Faaola iina e fesoasoani ia te oe. E mafai ona e lagona lena mana i lou olaga ao e sailia le Agaga Paia. . . . Ou te fautuaina outou e aoao atu ma ia naunau e talanoa atu ia i latou e te talitonuina, aua o le talanoa e uiga i nei mea, ua e i ai i le ute o le faasoa atu o au avega i se tasi e te alofa i ai ma se tasi e alofa ia te oe. O se faagasologa lea o le faamalologa.”

Sister Carol F. McConkie, sa avea ma se Fesoasoani Muamua i le Au Peresitene Aoao o Tamaitai Talavou

lauga. Mo se faaitaiga: “Sa ou maituina i le vasega ananei sa e tauivi lava. O loo o’u mafaufau po o a mai oe. Pe o e mafaufau e faatiga oe lava?”

Tatalo mo le Agaga e fesoasoani ia e iloa mea e te fai atu ai. Afai o loo tauivi au uo ma manatu o le pule i le ola po o isi luitau ogaoga e pei o le faanoanoa, po o le atuavale, ia aua le tau o le ta’u atu ia i latou ia vave tuu ese ia lagona! Na aoao mai Elder Dale G. Renlund o le Korama a Aposetolo e Toasefululua e faapea, “O le ala tatou te talanoa ai i se tagata o loo maloloina ma atonu o loo aafia i se faanoanoaga e le tumau, e ese mai i le auala tatou te talanoa atu ai i se tagata o i ai se gasegase faalemaufau.” Ua ia fautuaina mai le fai atu o se faamatalaga e pei o le, “E le o tuua nao oe. O loo matou i ai faatasi ma oe. O le a matou fesoasoani atu ia te oe i lenei tulaga.”

Ma ia manatua ia faalogo moni nai lo o le tau fuafuaina po

o le a le isi au tala e fai atu. E pei ona fai mai Elder Renlund, “O le talanoa ma faamatala mai e le tagata o ona lagona, ma faamalosia i latou e talanoa, atonu e sili atu le taua nai lo o le tuuina atu o se fautuaga.”⁴

3. **LIPOTI.** Pe a e iloaina o loo tauivi se uo, atonu e faasoosoina oe e taofi nei popolega ia te oe lava. Atonu foi e fai atu lau uo e aua nei e ta’uina i se isi. Ae o amepasa e tautatala e faailoa atu! Ofo atu tou te o e talanoa i se tagata matua faatuatua, e pei o se matua, faufautua a le aoga, po o se taitai o le ekalesia. Ia faasino atu i latou i le laina telefoni fesoasoani a le atunuu mo le pule i le ola po o le telefoni mo tesi mo faalavelave. Afai ua latou taufaamatau ane e faatiga i latou lava po o isi, ia ave i latou i se falemai pe valaau i auaunaga mo mea e tutupu faafuasei, ma nonofo ma i latou seia oo ina latou maua le fesoasoani faapolofesa. Afai



AFAI O LOO E TAUIVI [MA SE FAAFITAULI]

Aua le fiu! E taua ma e alofagia oe. Ua sili atu le lelei o le lalolagi ona o loo e i ai iinei, ma e matuai aoga le laveaiina o lou ola. Talanoa i se tagata matua faatuatua mo se fesoasoani—se matua, fomai, faufautua o le aoga, po o se taitai o le Ekalesia. Afai ua e aafia i se faalavelave, valaau i le laina telefoni mo fesoasoani a le atunuu mo le pule i le ola (sue i “Punaoa”). E mafai e lesu Keriso ona fesoasoani ina ia e maua le malamalama ma le faamoemoe pe afai e foliga mai ua pogisa ma faanoanoa mea uma.

PUNAOA

- befrienders.org
- suicide.org/international-suicide-hotlines.html
- iasp.info
- suicide.lds.org

e le o i ai se tulaga i le taimi lea e ono lamatia ai, ia vaavaai mo auala faifaiepea e faaafia ma lagolagoina ai i latou. Fai mai Dr. Hudnall, “Ia fatufatu ni avanoa mo i latou e avea ai ma se vaega o se mea. Taumafai e valaaulia i latou tou te faia faatasi ni gaoioiga e tiotio ai, e pei o le tamoega, tietiega uila, po o le feausiga.” E lelei gaoioiga faaletino ona o le feminoia e mafai ona faaleleia ai uiga fesuisuia.

Aua le Taufaatauvaaina Lou Malosi

Ia vaai faalemafaufau mo se minute i le ese o le a i ai le lalolagi pe afai e tofu tagata uma ma se uo e lagolagosua. E le mafai ona tatou faasaoina le lalolagi atoa, ae e mafai ona avea i tatou o se uo ia i latou o e manaomia se uo.

Ua uunaia i tatou e Sister McConkie ina ia “naunau e faa-lautele lau li’o o uo” ma “talía isi, e tusa lava pe foliga e ese nai lo o oe.” Sa ia faailoa mai, o le faauoina o se tasi e mafai ona faia ai se eseese i le va o lo latou agai i luma ma le faamoemoe po o le faia o se mea e faataumaioia, e pei o le pule i le ola. “Ia avea [oe] ma eseese,” sa ia faamalosiau mai ai. “Ua ia te oe lena malosiaga tele mo le lelei.”

E ala i le aapa atu, ua e mulimuli ai i le faataitaiga a le punavai tupito o le faamoemoe: o Iesu Keriso.

Fai mai Jackson, “Ua fai mai le faufautua a le matou vaega o le FAAMOEMOE, o i matou o ‘amepasa o le faamoemoe.’” “Ou te fialia i lena mea, aua e le gata o i tatou o amepasa o le faamoemoe, ae o ni amepasa o Iesu Keriso. O le iuga lava, o Ia o lo tatou faamoemoe.”

A tatou faaali atu le alofa FaaKeriso i isi, e mafai ona tatou fesoasoani ia i latou ia maua le faamoemoe ma le faamalologa.

“Ou te iloa ana faapea e iinei Iesu Keriso i le lalolagi, o le a Ia aapa atu i isi e pei lava ona tatou faia,” o le tala lea a Jackson. “E aumaia ai ia te au le mafanafana i le iloa, o loo ou faia e pei o le a Ia faia.” ■



PE O OE O SE UO E SAOGALEMU AI?

Faitau le tusiga na muamua atu e iloa ai pe o lenei mea e faamatalaina ai oe!

“Afai tatou te taumafai ia tau lava ina tatou au atu i le isi aso e sosoo ai, sosoo ai ma le isi aso, ma le isi aso, ... o le a fesoasoani mai le Alii ia i tatou i lena mea. E i ai le fuaiupu faapitoa lenei e ese le manaia na tuuina mai e Isaia. Fai mai o ia, ‘Pe a outou vaivai e maleifua mai o ia’—le Faaola—‘i le taeao i lea taeao’ [2 Nifae 7:4]. E i ai o la iina i aso uma. ... O lea la, afai o le mea sili e te mafaia o le nofo i luga ma aluese mai lou moega i le taeao, tau lava ina e iloa o loo i ai o la iina faatasi ma oe... la faitauina o se manumalo, ona faaaau ai lea. Afai o le mea sili lena e mafai ona tupu i lena aso, ia taumafai pea.”

Elder Dale G. Renlund o le Korama a Aposetolo e Toasefululua

FAAMATALAGA

1. Tagai “What Are Hope Squads?” Hope4Utah, hope4utah.com/hope-squad.
2. Faatalanoaga ma Sister McConkie i le aso 19 o Ian. 2018.
3. Tagai “The Warning Signs of Suicide,” Befrienders Worldwide, befrienders.org/warning-signs, and “Suicide: What to Do When Someone Is Suicidal,” Mayo Clinic, mayoclinic.org/diseases-conditions/suicide/in-depth/suicide/art-20044707.
4. Faatalanoaga ma Elder Renlund i le aso 23 o Ian. 2018.

LEILOA

ILE AAI FAASAINA

Saunia e Sarah Keenan

Sa ou i ai i le ogatotonu o le Aai Faasaina i Beijing i Saina. Sa nao ni nai minute na muamua atu, sa siomia ai au e uo ma faiaoga, ae sa faafuasei ona matuai tuua lava nao au.

Sa vave ona ou malamalama i le lamatia o le mea sa ou i ai. O se tagata Amerika e toatasi e 15 tausaga le matua sa matilatila ese ai lava i totonu o le maota mataaga pisi. Sa ou sau i Saina faatasi ma isi tamaiti o le matou vasega i le aoga maualuga mo se malaga a le aoga, ma sa tele taimi na lapataia ai i matou e faiaoga ma taiala e uiga i mea e ono lamatia ai le malaga taamilo i se atunuu ese pe afai matou te le faaeteete.

Sa ou savalivali solo i le eria, ma faavava atu i le motu o tagata tafafao—o tagata Saina faapea ma tagata mai fafo—ma sa ou tu tetee e taumafai ai e sue ia pea ofutino lanumumu ma paepae sa ofuina e tagata taitoatasi o le matou vaega. Ae sa leai ni mea na ou vaaia. I se auala, sa o ese atu ai la'u vaega e aunoa ma a'u, ma sa matuai ou le iloa po o le fea le itu na latou o i ai. Sa ou nofo i lalo ma autilotilo atu i faitotoa e o mai ai i totonu ma o ai i fafo. Ua mavae minute e sefulu, sosoo ai ma le 30, faapea ma le



**Sa ou lagonaina
muamua le Agaga, ae
ou te lei lagonaina lava
se mea fitoitonu—ae
mautinoa lava e le o
faatonuga i le mea
e alu i ai.**

45 minute. Sa leai se tasi mai la'u vaega na aliali mai.

Sa mau se tagata i lo'u lima. Sa ou tepa ae ma vaaia ai se fafine puupuu ma ni mata pei e tau faavalevalea ma ni atigilima uumi. Sa ia tosoina lo'u lima. "Mulimuli mai ia te a'u," sa ia fai mai ai i se Igilisi le sa'osa'o. "Teine aulelei, mulimuli mai ia te a'u."

Sa ou lagonaina se lagona le mau-tonu i lo'u loto. "Alu i tua," sa ou ee ai, ma se'i ese mai lo'u lima. A'o le'i ona toe tosoina atu, sa ou momo'e saosaoa atu i se faitotoa e alu ai i fafo ma ulu atu i se isi vaega o le aai.

Sa ou momo'e mo sina taimi seia oo ina atili ai ona ou se nai lo le taimi muamua. Sa ou saofai ifo i se faasitapu na latalata ane, ma taumamao ese mai i vaega o tagata, ma amata ona ou tagi. Sa ou iloa ni nai upu faaSaina ae mautinoa lava sa le lava e maua ai ni faasinoga e toe foi atu i le matou faletalimalo, i se vaimea i le isi itu o le aai tele o Beijing. Ma i le vaega lenei, sa ou le mautonu po o fea sa i ai se faitotoa e alu ai i fafo.

Ma le maligi o ou loimata, sa amata ai ona ou tatalo. Sa ou ioeina lava sa ou faavalevalea ma le aluese mai le vaega, e ui lava sa mo sina taimi, ma ou augani ai i le Tama Faalelagi e fesoasoani ia ou toe maua lou auala i le matou vaega.

Sa ou tu i luga ma toe savali i tua i le itu lautele sa ou sau ai. Ou te lei maua se faaaliga i le taimi lava lena—ma sa ou le mautinoa pe o le a faapei le leo po o le lagona o lena faaaliga e tusa lava pe ou *te* mauaina.

Sa ou lagonaina muamua le Agaga, o se lagona mafanafana i le uma ai o se auunaga i se tasi po o le faalogoina o se tautalaga i le lotu, ae ou te lei lagonaina lava se mea fitoitonu, e mautinoa lava e le o faatonuga i le mea e alu i ai. Sa amata ona ou savali i luma ma le le mautinoa, ma faaauau le tatalo i lo'u loto.

Sa iu ina ou tau atu i se magalua o le auala. Sa amata ona alu i le taumatau ae ou faalogoina loa le musumusu o se leo, "Nofo."

O le leo sa matuai malu lava lea sa toeititi a ou le amanaiaina atoa e faapea o se tasi o ou lava mafaufauga. Peitai sa i ai se mautinoa lea e mautinoa lava ou te lei lagonaina i lena taimi. "Saofai i luga o le nofoaumi lena," sa fai mai ai le leo. Sa ou ea ae ma vaaia ai se nofoaumi i le ogatonu o le auala magalua. Sa ou alu ma saofai ai. E nao le tolu minute mulimuli ane, ae onoono ae loa se ofutino lanu paepae ma lanu mumu na ou masani ai i totonu o le mano o tagata ma talotalo mai ia te au. O le matou taitala malaga lea mo le aso.

Sa ou oso ese mai le nofoaumi sa ou saofai ai. Sa matuai ou fiafia lava, lea sa toeitiiti lava a ou opoina le fafine.

Sa fai mai o ia, "ua atoa le itula o matou sueina oel!" "O fea sa e i ai?"

Ao ia taitaiina atu au i le matou vaega, sa ou faamatala atu ia te ia

le mea sa ou i ai, e amata mai i lou motuese mai le vaega ae faaiu i lau filifiliga e saofai i lalo nai lo o le alu i le taumatau i le magalua i le auala.

"Matuai e laki lava," o lana tala lea. "Ana fai e te alu i le taumatau i le afega lena, semanu e ave ai oe i le itu faafeagai mai isi tagata uma o le vaega. E tele tele le aai, semanu e le mafai ona ou mauaina oe."

Sa ou tuua Saina i nai vaiaso mulimuli ane, na mafai ona ou le toe lei-loa i le taimi o le malaga, ae e tele ni taimi na ou toe mafaufau ai i le taimi na ou faalogoina ai le musumusu mai o le leo o le Agaga ia te au. Sa le o le ituaiga o uunaiga sa ou mauaina muamua, ae o le mea sa silafia e le Alii sa manaomiaina ina ia taofi ai lou alu atu i le auala sese. Sa ou iloina foi le matuai faigofie na semanu e oo i ai le le amanaiaina pe ana ou le faalogo.

Talu mai lena aso, ua tele taimi ua ou faalogo ai i le Agaga i le tele o auala eseese, o lapataia au i mea e lamatia ai faaletino ma faaleagaga. O nisi taimi na ou vaai ai i taunuuga o le mulimuli po o le le usitaia o lena leo e pei ona sa ou faia i lena aso muamua i le Aai Faasaina. Ua faatele atu, ona ou le vaai i taunuuga. Ae ua ou aoaoina, a ou faalotomauualoina au lava ma ou naunau e faalogo, o le a fesoasoani mai le Alii ia ou iloa uunaiga a le Agaga ma o le a Ia taitai atu au i le mea e tataua ona ou i ai. O le faatasi ai ma Ia, e le mafai ai ona tuua nao a'u. ■

E alala le tusitala i Iuta, ISA.



FAAALIGA i le Perofeta o Iosefa Samita—ma ia te Oe

Saunia e Ryan Carr

Mekasini a le Ekalesia

Mafaufau i mea ofoofogia uma lava sa ausia e Iosefa Samita: faaliliuga o le Tusi a Mamona, faatulagaina o le Ekalesia, mauaina o le perisitua, fausia o malumalu, aoaoina atu o le talalelei toefuataiina, auina atu o faifeautalai. Ae o le mea e sili atu ona ofoofogia ai, sa ia faia na mea a’o talavou lava o ia.

Na faapefea ona ia iloa ona fai o na mea? O le mea e lelei ai, na te lei taumateina—sa taialaina o ia e faaaliga. E ala atu i nei faaaliga, o le tele o na faaaliga ua aofia nei i le Mataupu Faavae ma Feagaiga, sa aoaoina o ia e le Alii i aoaga faavae, taiala o ia i le faatulagaina o le Ekalesia, ma tali i fesili taua. O nisi nei o nai faataitaiga.

O Fesili na Taliina i Faaaliga

- O ai o i ai le pule e papatiso ai? I le aso 15 o Me, 1829, sa tatalo ai Iosefa Samita ma Oliva Kaotui e uiga i le papatisoga. Sa faaali mai Ioane le Papatiso ma tuuina mai ia i laua le Perisitua Arona ma poloaiina i laua e papatiso e le tasi le isi. (Tagai MF&F 13.)
- E LELEI le faaagaina o le tapaa? O le lamuina ma le ulaula tapaa sa o ni faiga masani i vaitaimi o Iosefa Samita. I le 1833 sa tatalo ai o ia mo le taitaiga i lea atu ma maua ai le faaaliga ua lauiloa nei o le Upu o le Poto, lea o loo faapea mai, o le “tapaa e le mo le tino” (tagai MF&F 89).

- Aisea tatou te faia ai galuega faalemalumalu mo e ua maliliu? I lalo o le taitaiga a le Perofeta o Iosefa Samita, sa fausia ai e tagata o le Ekalesia le Malumalu o Katelani ma sosoo ai ma le Malumalu o Navu, ina ia mafai ai ona latou faia papatisoga ma isi sauniga o le malumalu. Ua faamalamalama mai e le Mataupu Faavae ma Feagaiga 128 e faapea, “o i tatou e aunoa ma i latou [o e ua oti] e le mafai ona faaatoatoaina; pe mafai foi ona faaatoatoaina i latou e aunoa ma i tatou” (fuaiupu 18).

E mafai ona e maua le taitaiga a le Alii i lou olaga ma tali i au fesili e ala i faaaliga faaletagata lava ia. O nisi o taimi, o na tali o le a oo mai mai tusitusiga paia pe mai musumusuga e te lagonaina i lou loto ma lou mafau-fau. Ae o nisi o taimi e te agai i luma i le faatuatua, ma le le iloa tonu pe o le a faapefea le iuga o ia mea, ae o lou taumafai lava i le mea sili e te mafaia ina ia e ususitai.

E masani lava ona umi se taimi e maua ai musumusuga ma taitaiga e te manaomia. E pei lava o le Perofeta o Iosefa, e mafai ona e iloa le finagalo o le Alii i “lea fasifuaitau ma lea fasifuaitau, o le mataupu i lea mataupu” (MF&F 98:12). E pei ona sa faia e le Perofeta, ia amata i le tatalo. Ole atu i le Tama Faalelagi mo musumusuga mai le Agaga Paia. Suesue i tusitusiga paia ma aoaoga a perofeta o aso nei.

Fai lau faaiuga ona e ole atu lea pe ua tonu (tagai MF&F 9).

Aoaoina i le Aluga o Taimi

Tagai i le faafanua lenei, ma o le a vaai ai i le mea sa i ai Iosefa i le taimi sa ia mauaina ai nei faaaliga mai le Alii. Sa oo mai faaaliga i le taimi ma le nofoaga sa manaomia ai e Iosefa Samita i latou, e tusa ai ma le finagalo o le Alii.

Sa maua e Iosefa ni faaaliga e 46 i Katelani, Ohaio, ae sa lei faapea na tatau ona nofo ai pea o ia iina ia faaauau ai ona taialaina e le Alii. Sa ia mauaina foi ni faaaliga i Penisilevania, Niu Ioka, Misuri ma Ilinoi.




Ua faaali mai e le Mataupu Faavae ma Feagaiga le ala na taialaina ai e faaaliga ia le Perofeta o Iosefa Samita ma tuu atu ia te ia se mamanu mo le ala e mafai ai e musumusuga ona taiala lona olaga.

O nei faaaliga sa oo mai i se periota o ni tausaga se tele. Ai lava se manaia pe ana faaali mai e le Alii ia mea uma sa manaomia ona silafia e Iosefa Samita e uiga i le, mo se faataitaiga, o le perisitua, i se faaaliga e tasi? Nai lo o lena, sa tuuina mai e le Alii i le Perofeta ia faaaliga e uiga i le perisitua i le 1829, 1830, 1832, 1835, 1841, ma isi (tagai, mo se faataitaiga, MF&F 13; 20; 84; 107; 124).

O le a tuputupu ai foi lou malamalama o le talalelei i le aluga o taimi.

A o e aoao i le talalelei faatasi ai ma le fesoasoani a le Agaga Paia—e ala i tusitusiga paia, konafesi aoao, sauniga a le Ekalesia, seminare, ma isi—o le a faapea ona tuputupu ae lou malamalama i le aluga o taimi, e pei foi ona sa tupu ia Iosefa Samita. ■



● Aofai o faaaliga i le Mataupu Faavae ma Feagaiga sa maua e Iosefa Samita i se nofoaga faapitoa



MEA NA AUSIA I AO TALAVOU LONA MATUA

“Sa 14 tausaga o [Iosefa Samita] i le Uluai Faaaliga ae 17 i le taimi o le asiasiga muamua a le agelu o Moronae. O le 21 o ona tausaga na ia maua ai papatusi auro, ae na o le 23 ona tausaga ae maea ona faaliliuina le Tusi a Mamona (e le sili atu ma le 60 aso faigaluega). E sili atu ma le afa o faaaliga o loo i totonu o le Mataupu Faavae ma Feagaiga na tuuina mai e le ala i le Perofeta o Iosefa Samita ae faatoa 25 ona tausaga po o le itiiti ifo foi.”

Peresitene Dallin H. Oaks, Fesoasoani Muamua i le Au Peresitene Sili, “Iosefa, o le Tagata ma le Perofeta,” *Liahona*, Iulai, 1996, 84.



*E tau
lou tau
mo lou
faitalia.*

O Le Taua mo Lou Faitalia

Saunia e David Dickson

Mekasini a le Ekalesia

O le tausia o poloaiga a le Atua e aumai ai le saolotoga. I se tagata e lei mauaina se moli-mau i lena upumoni, o se faamatalaga faapena atonu e nenefu ai. Ma le isi, afai e alu atu se tasi o ou tuaoi ma avatu ia te oe se lisi o mea e tatau ona e faia (po o mea e le mafai ona e faia), atonu e *faaititia* e lena mea lou saolotoga patino.

Ae peitai, o le tausia o poloaiga a le Atua e faasaoloto moni ai oe—saoloto mai taunuuga le lelei o le agasala ma saoloto e olioli i faamanuiaga ia e oo mai mai le amiotonu.

Peitai, o le solia o poloaiga a le Atua, e taitai atu ai i le faatagataotauaina. O le tasi auala e mafaufau ai i le faatagataotauaina o le aveesea o le faitalia. E faigata ona fai le tele o filifiliga mo lou olaga pe afai o loo faatagataotauaina oe.

Ua tatou iloa mai tusitusiga paia, sa “saili [Satan] e faaumatia le faitalia a le tagata” (Mose 4:3) i le muai olaga. Ua tatou iloa foi, e le'i malo o ia i le taua, ma sa e i ai i le itu na manumalo!

O le itu e faafaigata ai, o loo tau-mafai pea Satani e faoa lou faitalia. Ae aua lava le fefe. E mafai foi ona e manumalo i le taua lenei.

OLA I LE FAATAGAOTAUAINA

I le Tusi a Mamona, o loo aoao mai ai Iesu, “E ao ina outou mataala ma

tatalo e le aunoa, nei faaosoosoina outou e le tiapolo, ma taitai ese atu ai outou faatagataotaua e ia” (3 Nifae 18:15).

O le faatagataotauaina e le tiapolo o se mea e fefe tele ai! Ae a e vaai-faalemafaufau i se malaia faapena, pe matele ina e mafaufau atu i tulaga o le faamasinoga mulimuli? O le mea moni e i ai se ituaiga o lenei faatagataotauaina e sili atu ona vave [oo mai]. Ma e masani foi ona maaleale teisi.

Na aoao mai Elder Quentin L. Cook o le Korama a Aposetolo e Toasefulua e faapea, “E mafai ona faapologaina tagata pe tuu i latou lava i le nofo pologa e le gata i vailaau lamatia ua fai ma vaisu ae faapena foi i filosofia lamatia ua fai ma vaisu lea ua o ese ai mai le ola amiotonu” (“O Tagitui a Ieremia: Ia Faaeteete i le Faapologaina,” konafesi aoao Oke. 2013).

O le faapologaina i valaau lamatia e pei o vailaau faasaina po o le nikitini e faigofie ona malamalama i ai. Ae e faapefea le oo ina faapologaina i se vaisu o le pepelo? O le nao se pepelo e tasi, e faigofie ai ona lavelavea i sa tatou lava mailei.

Ae e faapefea le oo ina faapologaina i le vave ona ita, po o se vaisu o le faitatala?

Ae faapefea le *le faia* o faatinoga amiotonu i aso taitasi (tatalo, suesue i tusitusiga paia, ma isi mea faapena.) lea ua talosaga mai e le Atua ia i tatou? Pe oo foi lena mea ina aveesea ai o le faitalia?

Ioe, o lea lava. O se auala e tasi lea e mafaufau ai i ai. O le a le mea e tupu i tagata taaalo po o fai musika pe afai e taofi atoa lava le faiga o

koleniga/faataitaiga? Tali: e le umi ae le toe i ai le tomai e taaalo pe tata ai i o latou tulaga e sili ona lelei. E ui o lena mea e foliga mai e le o se aveesea o le faitalia, ae o le mea moni e aveesea ai. O le tagata taalo po o le fai musika e le galue i lona tomai, o le a le toe mafai ona faia ni filifiliga se tele i le ala e faaoga ai lena tomai. O le faaititia o o latou tomai, ua itiiti ai mea e mafai ona latou faia nai lo o le taimi sa i ai muamua. Ua faaititia ai mea latou te filifili ai.

I se auala e talitutusa lava, e le mafai moni ona fai oe lava ma tagata e sili ona lelei e aunoa ma le mafutaga a le Agaga Paia. E te manaomia Lana fesoasoani i aso taitasi uma lava. O se tasi lea o meaalofa silisili e mafai ona e faamoemoe e maua i lenei olaga, ma o le ola amiotonu i aso uma o le auala lea e te maua ai lena meaalofa.

SAILIA O LE SAOLOTOGA MONI

Na aoao mai le Aposetolo o Paulo, “O lenei ia outou tumau i le saolotoga ua faasaoloto mai ai Keriso ia te i tatou, ae aua nei toe taofia outou i le amo o le pologa” (Kalatia 5:1). I le Tusi a Mamona, o loo aoao mai ai le Tupu o Peniamina, “Ma o lalo o lenei ao ua faasaoloto ai outou, ma ua leai se isi lava ao e mafai ona faasaoloto ai outou. Ua leai foi se tasi igoa ua foaiina mai e oo mai ai le olataga; o le mea lea, ua ou manao ai ina ia outou ave i luga ia te outou le suafa o Keriso” (Mosaea 5:8).

O le saoloto moni e oo mai i le mulimuli ia Keriso. O lea, ina filifili ia e saoloto! ■

O LA TATOU AVANOA



O LE TALI SESE E SA'O

INA UA OU LESITALA i se vasega faafilosofia i le aoga maualuga, sa fai si popole teisi o lo'u tama. I le faafilosofia, e fesiligia ai mea uma, e aofia ai le i ai o le Atua. Sa aoao i matou e le matou faiaoga i mea sa faasagatau i mea tau lotu ma teena ai le i ai o le Atua.

Sa fesili mai se tasi o suega o le faafilosofia, "Aisea ua tatou o mai ai i le lalolagi?" O le tali sa tatau ona ou tuuina atu o le, ina ia mafai ona tatou iloa ai o tatou gafatia uma ma fai mea e manao ai le lalolagi natura tatou te faia. Ou te lei tusia le tali lena aua e le o le mea lena ou te talitonu i ai.

Nai lo o lena, sa ou tusia ai, "Ua tatou o mai i le lalolagi ina ia tofotofoina ma ia toe foi atu e nonofo faatasi ma lo tatou Tama oi le Lagi e faavavau ma o tatou aiga."

"Ina ia amiosao ia i tatou lava, o lona uiga o le avea ma se faataitaiga o le ola amiotonu i tulaga ma mea uma."

Peresitene Gordon B. Hinckley, "Ia Tutu Atu Ma le Faamaoni ma le Faatuatua," *Liahona*, Iulai 1996, 110.

Mulimuli ane, sa valaau mai le faiaoga ou te alu atu i luma ma fesili mai pe na ou iloa le tali sao i le fesili. Sa ou fai atu i ai sa ou iloaina, ae e le mafai ona ou tusia se mea sa ou iloaina e le sao.

Sa ia fesili mai pe o au o se tagata lotu ma po o le fea le lotu ou te auai ai. Sa ou tau atu ia te ia, o au o se tagata O Le Ekalesia a Iesu Keriso o le Au Paia o Aso e Gata Ai. Sa fai mai o ia, e leai ma se tamaitiiti aoga lotu ua ia iloaina sa lava le lototele e tu atu mo ona talitonuga ma tusi ai se tali faapea.

Sa ia faapea mai, "Ou te lei tuuina atu le togi atoa ia te oe ona o lau tali e le o le tali sao lea." "Ae na ou tuuina atu ia togi ia te oe ona o lou lototele e tusi i lalo le mea e te talitonu i ai."

Sa ou fiafia ona sa ou tali e tusa ai ma ou tautinoga ma e tusa ai ma upumoni o le talalelei ua ou iloa ma o loo ou taumafai e ola ai. ■

Benjamin M., Chile

E faapefea ona ou tu mo le upumoni?

1. Ia filifili nei i auala o le a e tali atu ai pe a fesiligia lou faatuatua (tagai I Peteru 3:15).
2. Tatalo mo le lototele e faatino ma ia iloa ai le tala e fai atu (tagai Teuteronome 31:6; MF&F 100:5-7).
3. Suesue i tusitusiga paia ma sau-noaga a perofeta i onaponei e faamalosi ai lou faatuatua (tagai MF&F 88:118).
4. Ia faailoa atu e le aunoa lau molimau, i le fale ma i le lotu, ia faataitai ona faailoa atu mea ua e talitonu i ai (tagai MF&F 58:6).

MALAMALAMA O LE MALUMALU


O NI TAUMAFANAFANA UA MAVAE, sa o ai alii talavou o le matou uarota e tietie uila i luga o le mauga. Sa fai si ou fefe ona o lou taimi muamua lea. O lau uo o Iakopo o se tietie uila atamai tele, o lea sa ou fuafua ai ia ou pipii lava ia te ia.

Ina ua uma se malologa puupuu i luga o le tumutumu, sa amata loa ona matou toe foi ifo i lalo o le mauga. O au sa aupito sili ona tuai o le vaega ma sa ou mamao lava i tua, ae maise lava ina ua uma ona ou pau faalua i luga o pioga tu. Sa faatali mai Iakopo e fesoasoani ia te au i taimi taitasi sa ou pau ai, ma sa ma taumafai ai ia maua atu le vaega.

A o faasolo ina goto le la, sa mautinoa lava ua ma leiloloa. Na silia ma le afa itula talu ona ma iloa atu le matou vaega, ma ua faasolo ina pogisa tele o lea sa tau le mafai ona ma iloa atu le auala. Sa ou tatalo, ma talosaga i le Tama Faalelagi mo se fesoasoani ma le lototele ma te o ai pea. Ona tonu lea ia i maua ma Iakopo e faaauau ona ma tietie atu i se itu faapitoa. A o ma oo atu i se tulimanu, sa ma vaaia ai se vaaiga sa sili ona matagofie ma faafiafiaina—o le Malumalu o Draper Iuta! Sa faamalamalamaina e le sulu sa atagia mai i le malumalu lo ma auala, ma sa mafai ona ma taunuu saogalemu atu i o matou taitai ma uo.

Soo se taimi lava ou te vaaia ai le malumalu, e faamanatu mai ai ia te au le toafilemu ma le fesoasoani e maua mo i tatou iina. Soo se taimi lava ou te lagona ai le leilola i le pogisa o le lalolagi, e mafai ona ou tepa atu i le malumau mo le sulu ou te manaomia. ■

Joel G., Iuta, ISA



FAIA O SE UO FOU

SA MATOU SAOFALAI i se laulau e aai ai faatasi ma au uo, ae ou maituina loa se tamaitiiti fou—o Mikaele. Sa filifili o ia e nonofo faatasi ma se vaega o ni tama matutua atu, o e na amata ona latou taufaalili ia te ia. Sa ou iloa mulimuli ane, o Mikaele e i ai si faaletonu o lona mafaufau.

Sa ou fesili atu ia Mikaele pe fia nofo i o matou tafatafa ma au uo. Sa ia teena, atonu ona o le fefe i tagata i toe ulagia o ia.

O le aso na sosoo ai, sa ou faailoa atu ai o ia i au uo. Na mafai ona ou iloa sa fiafia o ia ona ou te lei fiu ia te ia. E ese le tele o ana tala e faamatala. O ia o se tama maoae!

O aso taitasi, sa ou iloa ai ua amata ona avea Mikaele ma se tagata fiafia lava. Sa amata ona tulimatai o ia i le aai faatasi ma ana uo. O le saofafai ai ma Mikaele i le malologa, sa vave ona fatuina ai se faauoga anoa. Sa le gata ina fesoasoani ia Mikaele, ae sa fesoasoani foi ia te au.

O le lagona mai le auuana atu i isi, o se tasi o lagona aupito sili ona matagofie i le lalolagi. ■

Laura P., Illinois, ISA



E MAFAI ONA FAATUMULIA

LE OLAGA I LE

FAATUATUA,

OLIOLI,

FIAFIA, 

FAAMOEMOE,

ma le **ALOFA**

PE A TATOU FAAAOGAINA SINA

LUUTAGA ITIITI O LE FAATUATUA

MONI IA KERISO.

Peresitene M. Russell Ballard,

Sui Peresitene o le Korama a Aposetolo e Toasefululua,

“O Meaalofa Faapelepele mai le Atua,” Konafesi aoao ia Aperila 2018

Perofeta: O Se Faatusa o le Alofa o le Atua

Saunia e Elder Ulisses Soares
O Le Korama a Aposetolo e Toasefululua

O u te fia molimau atu ia te outou o Peresitene Russell M. Nelson o le perofeta a le Atua i le lalolagi. Ou te lei vaai lava i se isi e sili atu le agalelei ma le alofa nai lo ia. E ui ina ou lagonaina lo'u matua le agavaa lava e auauna atu o se tasi o le Korama a Aposetolo e Toasefululua, o ana upu ma le silasila agamalu i ona fofoga a o ia tuuina mai leni tiutetauave na mafai ai ona ou lagonaina le opoina o a'u i le alofa o le Faaola.

Pe le o se faamanuiaga ea le i ai o perofeta, tagatavaai, ma talifaaaliga i le lalolagi i nei aso ua tatou ola ai, o e o saili ia iloa le finagalo o le Alii ma mulimuli ai? O se faamafanafanaga lava le iloa e le o tuua na o i tatou i le lalolagi, tusa lava po o a luitau o tatou feagai i le olaga. O le i ai o perofeta o se faailoga o le alofa o le Atua i Ana fanau. Latou te faailoa maia folafolaga ma le natura moni o le Atua ma Iesu Keriso i lo La'ua nuu.

Mai le taele o lo'u loto, ou te molimau atu e saunoa mai perofeta e ala i le mana o le Agaga Paia. Latou te molimau atu e uiga ia Keriso ma Lana misiona paia i

le lalolagi. Latou te suitulaga i le mafaufau ma le finagalo o le Alii ma e tofia i latou e suitulaga ia te Ia ma aao mai i tatou i mea e tatau ona tatou faia e toe foi atu ai e mau i le afoaga o le Atua ma Lona Alo, o Iesu Keriso. Ua faamanuiaina i tatou a o tatou faaaogaina lo tatou faatua ma mulimuli ia latou aooaga. O le mulimuli ia te i latou, o le a sili atu ai ona fiafia o tatou olaga ma tuuitiitia le faigata, e faigofie atu foi ona onosaia o tatou faigata ma faafitauli, ma tatou fatuina se ofutau faaleagaga o le a puipuia ai i tatou mai osofaiga a le fili i o tatou taimi.

Ou te molimau atu ma le paia ua toetu mai Iesu Keriso, o loo soifua o Ia, ma o loo Ia taitaia Lana Ekalesia i le lalolagi e ala i Ana perofeta, tagatavaai, ma talifaaaliga. Ou te molimau atu o Ia o le Faaola ma le Togiola o le lalolagi ma e ala mai ia te Ia e mafai ai ona laveiina ma faaeaina i tatou i le afoaga a lo tatou Atua pele. Ou te alofa ia te Ia; ou te faamemelo ia te Ia. Ou te manao e mulimuli ia te Ia ma faia Lona finagalo ma avefa atili e faapei o Ia. ■

Mai se saunoaga i le konafesi aooa ia Aperila 2018.



Sa soifua mai i **São Paulo, Pasila**, i le aso 2 Oketopa, 1958.

Na auai lona aiga i le Ekalesia ina ua 6 ona tausaga.

Sa auauna atu o se faifeautalai faamision i le **Misiona a Pasila Rio de Janeiro.**




Auai i le **Iunivesite o São Paulo Pontifical Catholic**

(faailoga o le tagata malaga i le accounting ma le economics, faailoga o le matuaofaiva i pulega faapisinisi).

Na faaipoipo atu ia Rosana Fernandes i le

Malumalu o São Paulo Pasila

ia Oketopa 1982. E toa 3 o laua alo ma fanau a fanau e toa 3.



E ese mai lana lava gagana Potukale, e tautala foi o ia i le Igilisi, FaaFarani, ma le Sipaniolo.

Na lagolagoina o se Aposetolo

i le aso 31 Mati, 2018.



Tausia ma le Faasoa Ātu

Mālō e
lelei!

O a'u o Lui,
ma ou te faasusulu
atu lo'u malamalama
e ala i le faasoa
atu i isi o mea ou
te maua.

**O se Motu Tele ma se
Aiga Toatele**

Ou te nofo i le motu tele i Toga.
E toaono o'u tuafafine ae toafa
o'u uso, ma ou te nofo latalata i
le Maulmalu o Nuku'alofa Toga.

1



3

Fetufaai Atu o a Matou Meaai

E toto e lo'u tama ia faatoaga, o lea e tele ai a matou mea e ai. Ae o le toatele o fafine ua oti a latou tane ma isi aiga, e leai ni a latou lava meaai toto. O lea e ave atu ai e ou matua nisi o a matou meaai ia i latou. Ou te fiafia ou te alu ai foi e fesoasoani i ai!



2

O se Tagata e Fiafia i le Saienisi

E tele a matou laau ma meaola mananaia i le matou motu. O loo o'u i le vasega fa i le Aoga Tulaga Lua a Ocean of Light, ma o le saienisi o le mataupu lea ou te fiafia tele i ai.



4



Fesoasoani i Pulu Popo

O fafine ua oti a latou tane matou te asiasi i ai, e faaaogaina pulu popo e tafu ai afi e kuka ai a latou meaai. A matou o e avatu ni a latou mea taumafa, ou te faamanatu atu i taimi uma lava i o'u matua e ave ai foi ma ni pulu popo. Ou te fesoasoani e la'u pulu i totonu o le veni ma toe la'u i lalo pe a matou taunuu i fale o fafine ua oti a latou tane.



Faamanuiaga o le Fesoasoani Atu

E tuuina mai e le Tama Faalelagi ni faamanuiaga e tele ia te au pe a ou fesoasoani atu i isi—e le o ni faamanuiaga o tupe ae o faamanuiaga o le potu ma le malamalama. Ou te manao lava i taimi uma e fesoasoani ma faasoatu i isi ni mea ou te maua.



E MAFAI FAAPEFEA ONA E SUSULU ATU?

- Ave mea taumafa i se tasi e manaomia.
- Ave mea taumafa i se faalapotopotoga i le lotoifale e ai fesoasoani i tagata e leai ni meaai.
- Ave lavalava i se nofoaga mo tagata e leai ni malutaga.

AUINA MAI IA I MATOU SE FETU!

Sa talosagaina i tatou e lesu ia “pupula atu lo outou malamalama i luma o tagata” (Mataio 5:16). E faapefea ona e faapupula atu lou malamalama? Imeli mai ia i matou se ata o lou fetu ma lau tala, ata, ma se faatagaga a matua i le liahona@ldschurch.org.





O se Tatalo sa Taliina

Saunia e Megan Armknecht

E faavae i se tala moni

O Grace o se teineitiiti e 11 ona tausaga sa nofo i Holani i le taimi o le Taa Lona II o le Lalolagi. O lona tama sa aveeseina atu o se pagota o le taua.

Ina ua uma ona aveese atu Tama, sa tausi le Tina ia Grace, ma ona tuagane e toalua ma ni ona tausoga e toalua. Sa tele gutu e fafaga ae sa le lava ni meaai e fafaga ai. Sa nao ni nai falaoamata, fualaaui faisua, ma pateta laiti lava a le latou aiga.

I se tasi aso sa tatagi ai le logo o le faitotoa. Na mulimuli atu Grace ia Tina e vaai po o ai. Ina ua tatalaina e Tina le faitotoa, sa tu mai iina i le faitotoa se alii ofisa talavou o le Nazi. Sa amata ona tatavale le fatu o Grace, ma sa ia taofia lana manava. O le a le mea sa manao i ai o ia?

“E toa fia ni tagata o loo nonofo i totonu o le fale lenei?” sa ia fesili ai ma le pau.

Sa faapea atu Tina, “E na’o a’u, la’u fanau e toatolu ma nai o’u tei tama e toalua.”

“E leai sou toalua iinei?” na fesili ai le alii ofisa.

“Leai,” o le tali atu lea a Tina. “Na aveesea atu o ia.”

Sa autilo solo le alii ofisa i le fale. “O i ai sau leitio? Matou te le mananao tou te faalogologo i polokalama mai o tatou fili i Egelani ma Amerika.”

Sa aumai e Tina le leitio ma tuu atu i le alii ofisa.

“O se fale tele lenei,” sa ia fai mai ai, ma toe autilo solo ai. “Ua tele tele mo nao ni nai tagata o loo nonofo

ai iinei. E tatau ona outou o ese taeao. O le a matou pule i le fale lenei.” Sa masau lana liliu ma savali ese loa.

Sa le talitonu Grace i le mea sa ia faalogoina. Sa ia vaai atu i mata o Tina ua puputetele i le te’i. Ona tapuni lea e tina le faitotoa ma alu atu sa’o i tua o le fale.

Sa mulimuli lemu atu i ai Grace, ma lona fatu ua tatagase. Mata e toe sau mo’i lava le fitafita e ave lo latou fale, e pei ona ia avea la latou leitio? O lea se mea o le a latou faia? O fea o le a latou o i ai? O le a faapefea ona iloa e Tama le mea e toe maua i ai i latou?

Sa tu Grace i fafo o le faitotoa o Tina ma autilo atu i totonu. Sa tootuli Tina, e tatalo. Sa toe foi filemu Grace i le potu malolo seia oo ina toe alu atu Tina.

“Tina ea, o le a le mea o le a tatou faia?”

Sa fesili atu ai Grace.

Sa mapuea Tina. “Na pau le mea e mafai ona tatou faia o le tatalo ma faatuatua i le Alii o le a Ia puipuia i tatou.”

Sa lei toe foi mai le alii ofisa talavou o le Nazi i le aso na sosoo ai po o le isi aso. Sa lei toe foi mai lava! Sa mafai e Grace ma lona aiga ona taofi pea i lo latou fale.

Sa iloa e Grace sa fesoasoani mai le Atua i lona aiga. E ui lava ina sa lei uma le taua, ae sa ia tausua pea lava i latou.

E toe faaauau . . . ■

E alala le tusitala i New Jersey, ISA.





“Na fetalai mai le Faaola, ‘Ou te le tuua outou o matuaoti: ou te sau ia te outou’ [Ioane 14:18]. O Lana folafolaga lea ia te oe. Ou te iloa e moni lenei folafolaga. Ou te iloa o loo soifua o Ia.”

Saunia e Elder Neil L. Andersen

O Le Korama a Aposetolo e Toasefululua

“O *Asiosio Faaleagaga*,” Liahona, Me 2014, 21.



Saunia e Elder
Joaquin E. Costa

○ Le Fitugafulu

SAOGALEMU mai le AFA



“A o le faalogo mai ia te au, e nofo o ia ma le fifilemu, e filemu o ia e le fefe i se mea leaga” (Faataoto 1:33).

Na ou ola ae i Atenitina. Sa le o a'u o se tagata o le Ekalesia a o o'u laitiiti. Ae sa teu e lo'u aiga i luga o le matou fata se Tusi Paia. Sa lapoa ma sa i ai ni ata mananaia. Sa le masani ona matou faitauina faatasi. Ae sa ou fiafia lava e susue ona itulau ma tilotilo i ata ma tala.

O le tala e sili ona ou fiafia i ai o le tala ia Noa. E ese lo'u fiafia e tilotilo ia Noa, le lolo, ma meaola. Sa ou fiafia i le vaa ona o le saogalemu ai o Noa ma lona aiga mai le afa.

Mulimuli ane, sa ou papatiso ai i le Ekalesia, faaipoina, ma i ai lo'u lava aiga. I se tasi o po o le afa faaleaiga, sa ma talanoa ai ma lo'u toalua, o Renee e uiga i le tele o auala e faapei ai le vaa o Noa o le

matou fale. E tuuina mai e ia mea taitasi le saogalemu mai afa taufaamatau o le lalolagi.

E i ai se mea sa ou aoaoina e uiga ia Noa. Na ia maua le perisitua ae sa na o le 10 ona tausaga. A o tuputupu ae o ia, sa ia vaaia amioleaga uma i le lalolagi. Ae sa tumau pea lona agavaa. Sa ia fauina le vaa e laveai ai lona aiga. Sa fesoasoani le Tama Faalelagi e faasaogalemu i latou.

O nisi taimi tatou te vaaia ai le tupupu o mea taufaafefe i lo tatou lalolagi. Ae e mafai ona tatou maua le saogalemu mai le afa. E mafai ona tatou saunia e pei ona sa faia e Noa. E mafai ona tatou filifili e usitai i le Atua. E mafai ona tatou faia o tatou fale o se nofoaga saogalemu faaleagaga.

Afai tatou te faatuatua i le Tama Faalelagi, e le tatau ona tatou fefefe. Ona o Ia, e mafai ai ona tatou lagona le toafilemu, e tusa lava po o a afa e oo mai i o tatou ala. ■

Kalapu Faitauo


le Tusi a
Mamona

AUAI MAI I LE FAITAUINA O LE TUSI A MAMONA!

E mafai ona e faitau na o oe, faatasi ma lou aiga, pe faatasi ma se uo. Ona auina mai lea ia i matou o sou ata o loo e faitauina le Tusi a Mamona ma ta'u mai ia i matou se mea ua e aoaoina po o sau tala e te fiafia i ai mai le Tusi a Mamona. Auina mai i le liahona.lds.org (kiliki le "Auina mai se Tusiga").

O le mau o le masina lenei: Mosaea 2:17

~~~~~  
"Pe a outou auauna atu i o outou  
uso a tagata, ua nao lo outou  
auauna atu lava lea i lo outou Atua."





Ou te fiafia i le Tusi a Mamona ona o se tusi moni. O le tusitusiga paia mai le Atua, ma ou te talitonu i ai.

**Joel S. (taumatau), 8 tausaga, Maharashtra, Initia**



Sa lu'iina tamaiti Peraimeri o le uarota lena i **Ile-de-France, Farani**, e faitau le Tusi a Mamona i aso taitasi. Sa latou maua se pepa faamaonia mo le ausiaina o la latou sini!



Ou te fiafia i le tala i le faaaliga vaaia a Liae ona ou te lagona ai le fiafia. E aoao mai ia te au e fai filifiliga lelei ina ia ou oo atu i le laau o le ola. O le laau o le ola o se faailoga o le ola faatasi ma le Tama Faalelagi, Iesu Keriso, ma tagata uma tatou te alolofa i ai.

**Sadie S., 9 tausaga, Lusaka, Zambia**



Matou te fiafia i le Tusi a Mamona ona matou te aoao ai e uiga i le talalelei ae maise lava o Iesu Keriso. Matou te matuai faafetai lava i le Atua mo le Tusi a Mamona ona ua matou aoao ai o Iesu Keriso o lo tatou Faaola, ma ua fesoasoani tele lena mea i lo'u olaga.

**Allfie ma Anna B., 6 ma le 8 tausaga, Maharashtra, Initia**



Sa uma ona ou faitauina le lomiga o le Tusi a Mamona a tamaiti ae ou te le'i papatiso. I le faaiuga o le tusi, sa fai mai lo'u tina ou te tatalo e uiga i le Tusi a Mamona. Sa ou lagonaina lava e moni ia upu i le taimi na ou faitauina ai.

**Sean I., 7 tausaga, Somerset, Egelani**



O le Tusi a Mamona o le tusi lea e sili ona ou fiafia i ai. Ou te fiafia i le faaitaiga a Nifae. O ia o la'u tama toa i le Tusi a Mamona. E usiusitai tele o ia i poloaiga a le Atua. Ou te fia faapei o ia.

**Jhetro F., 10 tausaga, Iloilo, Filipaina**



ATA NA TUSIA E MERCÉ TOUS

# Tatalo i Tua o le Tulaga



**Saunia e Emily B., 12 tausaga, Iuta, ISA**

O se tasi o mea ou te fiafia lava e fai o le siva Aialani. Ou te taumafai malosi e faataitai lau choreography [koriokalafi] i le fale ina ia mafai ona ou saunia e faafiafia. E matuai maeaea lelei au faataitai-iga, ae ou te oo loa i tua o le tulaga e sauni e faafiafia, e masani lava ona ou popole i tua o le tulaga. I tauvaga uma lava, ma te sueina ai ma lo'u tina se nofoaga paganoa e fai ai se tatalo. O nisi taimi o tua o se pupuni po o totonu o se potu e i autafa ane. Ou te iloa e le afaina ia Tama Faalelagi po o fea tatou te i ai, ae tau lava ia tatou faatuatua ia te Ia.

I la'u faafiafiaga mulimuli, sa lei i ai lo'u tina e fai faatasi le ma tatalo. Sa faatalitali o ia i le mea sa i ai le au maimoa. Sa matuai o'u popole lava ae sa ou filifili o le a le afaina pe i ai faatasi o ia ma a'u pe leai. Sa ou laa ese mai a'u uo e fai se tatalo. Sa ou ole mo le saogalemua o'u siva, ma ia mafai ona ou faia le mea sili. Sa lelei tele la'u taumafai i lena aso, ma ou te manatua le lagona o le toafilemu na ou lagonaina a o o'u savali atu i luga o le tulaga.

E tatau ona tatou faalagolago i taimi uma i le Tama Faalelagi. E le afaina po o fea tatou te i ai po o le a foi le taimi, e faafofoga mai o Ia i taimi uma. ■



**Christian B., 7 tausaga, Holani i Matu, Netherlands**

I le amataga o le tausaga lenei, sa sau ai la'u paga faitautusi ma tusitusi i le vasega ma se lagona faanoanoa. Sa i ai ni ana mea sese i ana galuega i le matematika. Sa fai mai o ia, "Ua ou le aoga."

Sa ou popole i lau uo, o lea sa ou faamatala atu ai ia te ia mea uma e uiga ia Iesu ma Lona alofa ia i tatou. Sa ou ta'u atu ia te ia o le uiga o lona mea, e le faapea tatou te le aoga! Ona ou usuina lea o le "O au o se atalii o le Atua" ia te ia. Sa fiafia i ai o ia ma fesili mai po o fea na


ou aoaina ai nei mea. Sa ou faamatala atu ia te ia, e o lo matou aiga i le lotu i vaiaso uma ma e tele mea ou te aoaina e uiga ia Iesu i le Peraimer.

O le po lena, sa ia ta'uina ai i lona tina ia le ma tala-noaga. Sa fesili atu o ia i lona tina pe mafai ona latou o mai faatasi ma lo'u aiga i le lotu. Sa fai mai lona tina, ioe!

Sa nofo la'u uo i ou talaane i le sauniga o le faamnatuga i lona lava Aso Sa! O lea ua toetoe o vaiaso uma ma e auai faatasi ai i le lotu. O loo aoaina e ia ma ona matua ni mea e tele atu e uiga i le talalelei a Iesu Keriso mai faifetautalai ma isi aiga o le matou uarota.

Ou te lagona le fiafia tele ona sa mafai ona ou mulimuli i le faaitaiga a le Faola ma faamafanafana i se uo ua faanoanoa. E tusa lava pe filifili lona aiga e papatiso pe leai, o le itu e sili ona lelei, o lea ua ia iloa e alolofa le Atua ma Iesu ia te ia, e le afaina lava po o le a! ■

# E Le Afaina Lava Po o le A!



# Elia ma le Fafine ua Oti Lana Tane

Saunia e Kim Webb Reid



Sa lapataia e se perofeta e igoa ia Elia ia tagata e faapea, o le a oo mai se oge. O le a le toe timu, ma o le a le ola ni laau toto. I le taimi o le oge, sa inu Elia mai vai o se alia. Sa auina mai e le Atua ni manulele e aumai ni meaai ia te ia. Ae, sa faapea foi ona matutu le alia. Sa fetalai atu le Atua ia Elia e alu e sue se fafine i le aai, ma o le a ia fafaga ia te ia [Elia].

Sa tau atu Elia i le fafine o loo faaputu ni fafie mo se afi. Sa fai atu Elia ia te ia mo se meaai e ai ai. Na fai mai le fafine, sa na'o sina potoi ma sina suauu itiiti na totoe la te aai ai ma lana tama tama.



Sa folafola atu e le perofeta, afai na te faasoa atu ana meaai ia te ia, o le a le uma ana meaai. Sa faatuatua le fafine ua oti lana tane i le perofeta o Elia ma faasoa atu ana meaai.

O aso taitasi uma, sa lava meaai mo i laua e aai ai. O se vavega lava! Ona ma'i lea o le tama a le fafine ua oti lana tane ma maliu ai, ae sa toe faaola mai o ia e Elia. Sa faamanuiaina le fafine ona o le faalogo i le perofeta.





E faamanuiaina a'u pe a ou faalogo i le perofeta. ■

# E Mafai Ona Ou Ta'uina le Mea Sa'o





**Saunia e Elder Mark E. Petersen (1900–84)**

O Le Korama a Aposetolo e Toasefululua

## TAITAIINA E PEROFETA SOIFUA

*E fetalai mai i taimi uma le Atua i tagata e ala i perofeta soifua.*

*Faamatalaga a le faatonu: Ia Iulai 1972, sa maliu ai Iosefa Fielding Samita, le Peresitene o le Ekalesia. Sa lagolagoina Peresitene Harold B. Lee i le konafesi aoao ia Oketopa 1972 o le Peresitene Fou o le Ekalesia. O lenei fasifuaitau na aumai mai se saunoaga a Elder Mark E. Petersen i lena konafesi.*

O se perofeta fou a le Atua . . . O se tasi i le faasologa o tamalii musuia na valaauina faalelagi e auauna atu i le taimi lenei e aumai se faaaliga fou mai le lagi i alii, tamaitai, ma tamaiti uma o e o le a faalogo.

O le tofaina o [se] perofeta fou e matuai taua tele i tagata uma o e talitonu i le Atua, ae maise lava i tagata uma e talitonu i le Alii o Iesu Keriso. . . .

O taimi uma lava na tuuina mai ai e le Alii le tagata i luga o le fogaelele, o e na Ia taua o Ona lava tagata, na Ia taitaia ai i latou e ala i perofeta soifua o le ua Ia tuuina i ai le taitaiga mai le lagi. . . .

O se faasologa tutusa faapena o tamalii musuia ua faatulagaina i



onaponei. Sa ausia lenei mea o se tau-nuuga o le Toefuataiga o le talalelei a le Alii o Iesu Keriso e ala i Lana tagata vaai o aso e gata ai, o Iosefa Samita . . .

E ese mai i le talitonuga taatele, o le Alii o se Atua o fesootaiga, o se Atua o faaaliga. O Ia o le Atua o le malamalama ma le poto, o le atamai ma faamatalaga. E le faifaimea o ia i le pogisa, pe faasaoina e Ia se tasi i le valea. O Lana ata atoa o le faolagata e faavae lea i luga o le fesootaiga ma se nuu ua faamalamalamaina.

O ai e mafai ona tapuai ma le atamai pe afai e tumau i le valea?

O ai e mafai ona i ai se faatuatua anoa e aunoa ma se malamalama e uiga i le Atua?

Ma o afea o le a oo mai ai lenei malamalama pe afai e le mai le Atua lava Ia? . . .

Ua telegese tagata soifua ona aoao i auala o le Alii, aemaise lava i latou e faiaga ona gaoioi e talia le mea moni e faapea, e ui lava o loo naunau o Ia e fetalai mai ia i latou, o Lana auala i le faiga o lea mea, ua ala mai lea i tamalii soifua musuia o e ua Ia atofaina o ni perofeta.

O se mamamu lea ia te Ia. O Lana auala lea e fai ai, ma e lei suia lava e Ia. O Ia e tutusa lava o ananafi, o le asō, ma le faavavau, ma e faapena foi Ana faiga. . . .

Matou te molimau faamaoni atu, ua toefaavaeina ia fesootaiga i le va o le lagi ma le lalolagi i o tatou aso. Matou te tautino atu, e le o vavaeesea le Atua mai le lalolagi.

E le o maliu o Ia. O loo soifua o Ia.

E le o po o Ia. O loo silasila mai.

E le logonoa o Ia. O loo faafofoga mai.

E le gugu o Ia. O loo fetalai mai o Ia, ma le manino i ana perofeta soifua, ma e ala mai ia i latou e oo mai i le lalolagi atoa.

O le auala lenei o loo fetalai mai ai le Atua ia te outou i aso nei. ■

*Mai le "Ua Oo Mai Se Isi Perofeta!" Ensign, Jan. 1973, 116–18. Ua faaonaponei le faasaoga.*




**IA OUTOU LOTOTETELE:  
O AU LAVA; AUA TOU  
TE MATATAU  
SAUNIA E LOZANO MORENO**

*Ina ua oo mai le po, sa tu nao Iesu i paumatu ma silasila atu i le vaa o aveina atu. Ona soo i le ogatonu o le sami. Sa faafeagai le matagi ia i latou, ma sa latou galulue malosi ao taualoina [le vaa]. Sa alu atu Iesu ia i latou e ala i le savali i luga o le sami. Ina ua latou vaai mai ia te Ia, sa matatau i latou.*

*“Ona fetalai atu loa lea o ia ia te i latou, ua faapea atu, Ia outou loto tetele; o a’u lava, aua tou te matatau.*

*“Ona maliu ae lea o ia i luga o le vaa ia te i latou; ona malu ai lea o le matagi: ona matua segia ai lea o latou mau i ua latou ofo ai.” (Tagai Mareko 6:47–51.)*



AUTALAVOU MATUTUA

**O FAUTUAGA E ONO  
MO LE FAASAOINA  
FAALEAGAGA**

44

AUTALAVOU  
**GALULUE FAATASI  
E TAOFI LE PULE  
I LE OLA**

50, 52

AUTU MO LESONA  
A LE AUTALAVOU

**POLOAIGA:  
AUALA LATOU TE  
FAASAOLOTOINA  
AI I TATOU**

60

O LE EKALEZIA A  
**IESU KERISO**  
O LE AU PAIA O ASO  
E GATA AI



SAMOAN